

ბუნების მნიშვნელობა



ქეთქილის

ქილიკეთსა

საქართველოს სსრ
საბავშვო და ახალგაზრდობის ლიტერატურის
სახელმწიფო გამომცემლობა

„ნ ა კ ა დ უ ლ ი“

19 თბილისი 62


საქართველოს სსრ მეცნიერებათა აკადემიის ფიზიოლოგიის ინსტიტუტის ახალგაზრდა მეცნიერ მუშაკთა ჯგუფი ზაფხულობით თითქმის ყოველწლიურად აწყოებს ტურისტულ ლაშქრობას ჩვენი ქვეყნის სხვადასხვა კუთხეში. ერთ-ერთი ისეთი ლაშქრობა მოეწყო სვანეთში.

ჩვენ მოგზაურთა აღწერილობებიდან ვიცნობდით სვანეთის წარსულს, და ახლა, როდესაც შევცქეროდით მარადიული მყინვარებით თავშემკობილ მის ბუშბერაზ მთებს, ამ მთათა კალთებზე მცხოვრებ ადამიანებს, ჩვენს სიხარულს საზღვარი არ ჰქონდა. ყოველ ნაბიჯზე ვხედავდით იმ დიდ გარდაქმნებს, რომელიც ახალმა ცხოვრებამ მოახდინა მთაში.

წიგნში ჩართული ფოტოსურათების ნაწილი გადაღებულია ჩვენი ტურისტული ჯგუფის მონაწილეთა მიერ, ნაწილი კი ამოღებულია აკად. ნ. კეცხოველის ფოტოარქივიდან.

ვსარგებლობ შემთხვევით და გულითად მადლობას ვუხდით ყველა იმათ, ვინც დიდი სტუმართმოყვარეობით მიიღო ჩვენი ჯგუფი და კიდევ უფრო გაგვიმტკიცა სიყვარული თავისა შრომისმოყვარე, ამაყი ხალხისადმი.

ა ვ ტ ო რ ი.



შორეული მთების სურნალი

24 იელისის დილას ჩვენი ინსტიტუტის კარი შევალე. დერეფნის ბოლოს რამდენიმე ახალგაზრდა გაცხარებით კამათობდა.

— სწორედ დროზე მოხვედი, — მითხრა ერთ-ერთმა, — შენი დახმარება გვჭირდება.

— რა მოხდა?

— სვანეთში წასვლა გვინდა.

გულში სიხარულმა გამკრა. ექსკურსიაში მონაწილეობის სურვილი მეც გამოვთქვი.

— მაშ მარშრუტის დაზუსტება შენთვის მოგვინდვია. — დამავალეს ამხანაგებმა ხანმოკლე საუბრის შემდეგ და ჩვენ-ჩვენი სამუშაო ოთახებისაკენ წავედით.

იმ დღეს განსაკუთრებული ხალისით ვმუშაობდი. მომავალ ექსკურსიაზე ვფიქრობდი, ჩუმაღ ვლიღინებდი და საქნით გართული ნარკოტიკების სუნს აღარ ვგრძნობდი. პირიქით, თითქოს შორეული მთების სურნელება აღწევდა ჩემამდე და სუნთქვას მიმსუბუქებდა.

საღამოს, შინ რომ დავბრუნდი, საქართველოს რუკები გადმოვალაგე. გულმოდგინედ ვეძებდი იმ პუნქტებს, სადაც უნდა გვევლო და ღამეები გვეთია. შეღალამემდე ვუკირკაბტე რუკებს და მარშრუ-

ტის წინასწარი სქემა შევადგინე. მეორე დღეს ჩემი შედგენილი მარ-
წრუტი ამხანაგებს გადაეცანი. ყველა კმაყოფილი დარჩა, ექსკურსიის
წარმატებით ჩატარებაში ეჭვი არავის ეპარებოდა.

გეგმის თანახმად, თბილისიდან ქუთაისში მატარებლით უნდა
ჩავსულიყავით. ქუთაისიდან თვითმფრინავით ჩემ მშობლიურ სო-
ფელში გადავფრინდებოდით, იქ ერთ-ორ დღეს დავყოფდით, მერე
კი ყორულდაში ავიდოდით და იქიდან ლასდილის ქე-
დით უშგულში გადავიდოდით; უშგულიდან — კალაში, კალადან —
ულვირის გავლით მულახში, ხოლო მულახიდან — მესტიაში.
მესტიიდან ორი გზა გვქონდა: თუ ამინდი და ჭგუფის შემადგენლო-
ბის განწყობილება ხელს შეგვიწყობდა, მესტიიდან უკან დავბრუნ-
დებოდით კალაში და იქიდან ლატფარის ულამაზესი მთით ისევ
ქვემო სვანეთში გადმოვიდოდით; იმასაც ვფიქრობდით, რომ ლატ-
ფარის მთაზე მთვარიან ღამით გვევლო; წაკითხულიც მქონდა და
გავგონიცი — მთვარიან ღამეში ლატფარის თხემიდან შეუდარებ-
ლად ლამაზი და დიდებულია კავკასიონის ყინულოვან მწვერვალთა
პანორამაო; მაგრამ, თუ უამინდობა ლატფარის მთაზე ხელს აგვალე-
ბინებდა, მაშინ ერთადერთი გზაა გვრჩებოდა — მესტიიდან ზუგ-
დიდს ავტობუსით უნდა ჩავსულიყავით. ამ გზის სილამაზეზეც ბევ-
რი რამ გაგვეგონა და, ცხადია, არც ეს გზა დაგვწყვეტდა მაინცდა-
მაინც გულს.

25 ივლისს გამგზავრებისათვის ყველაფერი მზად გვქონდა, ჭგუ-
ფი საბოლოოდ იყო დაკომპლექტებული. ექვსი ქალი და სამი ვაჟი.
ასეთი შეფარდება ბარე არ მოგვეწონდა, მაგრამ არცთუ ისე საშიში
იყო, რადგან ჩვენი გზა სამანქანო შარას დიდი მანძილით არსად
სცილდებოდა და, თუ რომელიმე მანდილოსანი დაიღლებოდა, შეგ-
ვეძლო ავტოტრანსპორტით გვესარგებლა.

27 ივლისს ქუთაისში ჩავედით. როგორც ზემოთაც ვთქვეით.
აქედან გადაფრინას ვაპირებდით, მაგრამ უამინდობამ ფრენაზე
ხელი აგვალებინა. დილიდანვე წვიმდა. დღის დაკარგვაც არ გვინ-
დოდა. ამიტომ ავდექით და .ლენტეხში მიმავალ ავტობუსს
გავყევით.

ავტობუსში სულ უკანა რიგში ვიჯექი. ჩემს გვერდით 24-25
წლის ახოვანი ვაჟაკი იჯდა. თავზე კეპი ეხურა და საწვიმარი ლა-
ბადა ეცვა. პირველად უბრაღ იყო. შემდეგ ჩვენი ვინაობით დაინ-

ტერესდა და გაგვეცნო. სამთო ინჟინერი გამოდგა, ტყიბულის ქვანახ-
შირის მადაროებში ეძუშავა და ახლა მშობლიურ კუთხეში შიდიო-
და შევბულებით. თურმე ნუ იტყვი, თანასოფლელები და სახლიკა-
ციებიც კი ვყოფილვართ.

ჩემი სახლიკაცი მეტად სასარგებლო კაცი გამოდგა. მან კარ-
გად იცოდა ახალი ელსადგუოების მშენებლობის გეგმები და ვატ-
ციებით გვიყვებოდა მათ შესახებ.

სასაუზმოდ ტვიშში გავჩერდით. შოფერს არც კი უკითხავს
მგზავრებისათვის, ისე გააჩერა მანქანა. ანდა კითხვა რა საჭიროა!
ტვიშში ტრადიციული სასაუზმო და სასადილო ადგილია. ჩამვლელე-
ბიც აქ ჩერდებიან და ამვლელელებიც. ცხელ საკმელს გვახლებიან,
ტვიშური ღვინით ყელს ჩაისველებენ და შემდეგ კვლავ თავის გზას
გაუდგებიან.

შოფერი გვაჩქარებდა. ხუმრობა ხომ არაა, ლენტეხში უნდა
ასულიყო და იმავე დღეს იქიდან ხალხი ქუთაისში ჩამოეყვანა. წარ-
მოიდგინეთ, რამდენიმე ათეული წლის წინ რომ ვინმეს ასეთი რამ
ეთქვა! ვინ დაიჯერებდა, რომ ერთ დღეში კაცი ქუთაისიდან ლენ-
ტეხს ავიდოდა და იქიდან ქუთაისს დაბრუნდებოდა. ერთი კვირის
დამქანცველი მგზავრობის შემდეგ ძლივს უწევდნენ ხოლმე ქვემო
სვანეთიდან წასულნი ქუთაისს და ისიც ისე, რომ მგზავრების სი-
ცოცხლე ბეწვზე ეკიდა. კლდოვან ბილიკზე ერთი ფეხის დასხლტომა
და, ლაშდარენილ უფსკრულში გადაიჩეხებოდნენ! კიდევ უფრო სა-
შიში იყო მეწყერი და კლდიდან მოწყვეტილი ლოდები. დღეს კი.—
არა თუ ერთ დღეში, ფრენა რომ ყოფილიყო, ქუთაისიდან 25 წუთ-
ში ჩემს სოფელში ვიქნებოდით.

ჩვენი მანქანა ისევ ზევით მიჰყვება რიონის ნაპირს. შოფერი
გამოცდილი კაცი ჩანს. მანქანა დიდი სისწრაფით მიჰყავს, მაგრამ
მანინც არ გვანჯღრევს. პატარა ორმოებსა და უსწორმასწორო ადგი-
ლებსაც მარჯვედ უქცევს გვერდს. მალე ალბანამდე მივალწიეთ. აგერ
შოვისკენ მიმავალმა ავტობუსმა მარჯვნივ გადაუხვია, ხიჯზე გადა-
ვიდა და ისევ რიონის ნაპირს გაჰყვა. ჩვენი კი ლაჩანურის ხეობა-
ში შევიდა.

გემრიელი საუზმის შემდეგ მანქანაში მხიარულებამ იმატა. ჩე-
მი ამხანაგები საამო ხრით მღერიან. დანარჩენი მგზავრები კმაყოფი-

ლი სახით უგდებენ ყურს. ზოგი მათგანი კიდევ შეეღის მომღერლებს.

მალე ორპირის მაღალი კედლები გამოჩნდა. უცებ, თითქმის ავტობუსი გვირაბში შევიდაო, ბინდ-ბუნდში მოვექეციო. შარაგზა კლდის ფერდშია შექრილი; მარჯვნივ ტინის კლდეა ამართული, ზევიდანაც ვეება ტინები გვფარავს. მხოლოდ მარცხნივაც კლდე გახსნილი და ჩვენც აქედან გადავცქერით ლაჩანურის ლოდინ კალაპოტს. უზარმაზარ ქვებს შორის კლაკვნით მიედინება მდინარე. ლაჩანურის იქეთა მხარესაც სალი კლდეა ამართული. უთუოდ ამის გამო ჰქვია ამ ადგილს ორპირი.

ერთ ხანს ასე ვიარეთ კლდის სახურავქვეშ. წინათ აქ გავლისას შოფრები წამდაუწუმ ყვიროდნენ — „თავები თავებიო!“ საქმარისი იყო ცოტაოდენი ყურადღების მოდუნება და კლდის გამოშვებრილ ქიმს შეახებთქებდით შეზბლს. ახლა კი გზა გაუფართოვებით, კლდის ქიმებმ მოუმტვრევიათ და შოფერიც უდარდელად მიაქროლებს ღია ავტობუსს; იცის, რომ მის მგზავრებს ფათერაკი არ ელოს.

ორპირის ვიწროებს რომ გავცდით, თვალწინ ლაჩანურის ნაყოფიერი ჰალეები გადაგვეშალა. ირგვლივ ყველაფერი ვაზს დაუფარავს. ავტობუსმა სწრაფად გაიბრინა ვენახიანი ჰალეები და ლაჩანურჰესის მშენებლობის უბანში შევიდა.

დიდი მოძრაობა იყო ლაჩანურჰესის მშენებლობაზე. მოდიოდნენ საშენი მასალით დატვირთული მანქანები. მდინარის ნაპირებიდან მოისმოდა ბულდოზერებისა და ექსკავატორების გუგუნი. ჩვენი თანამგზავრი ინჟინერი ორპირში დაწყებულ საუბარს განაგრძობდა. ახლა ის ლაჩანურჰესის შესახებ გველაპარაკებოდა. გრანდიოზული გეგმაა დასახული. ცხენისწყალი თავისი კალაპოტიდან ლაჩანურის კალაპოტში უნდა გადმოაგდონ. ამისათვის საჭიროა ამ ორი მდინარის ხეობათა გამყოფი ქედი გვირაბით გაიხვრიტოს. ამ გვირაბით იდენს ცხენისწყალი ლაჩანურის ხეობაში. მდინარე მდინარეს აუბამს მხარს, ბუნების სტიქიურ ძალას ადამიანი მოთოკავს, სულ მალე ამ ხეობაში უძლიერეს ელსადგურთა სისტემის მშენებლობა დამთავრდება და ჩვენი ქვეყანა ელექტროენერჯის კიდევ ერთ დიდ ნაკადს მიიღებს.

ჩვენმა მანქანამ სოფელი ორბელიც უკან მოიტოვა და მაღალ უღელტეხილს შეუდგა. აქედან ხელისგულივით გამოჩნდა ლაჩანურ-

რის ქალებში და ფერდობებზე შეფენილი სოფლები. ჩემს ამხანაგებს ფოტოაპარატები აქვთ მომარჯვებული. დროდადრო კინოაპარატიც მუშაობს. ლეჩხუმის ბუნების სილამაზეს ადვილად გამოკყავს წონასწორობიდან ჩვენი დინჯი ოპერატორი. სანახაობებით ყველა აღფრთოვანებულია. ახლა უამინდობას ვუმაღლით კიდეც, რომ ექსკურსიის განზრახულ მარშრუტში ცვლილება მოხდა.

მანქანამ აღმართი აათავა, სერზე ავიდა და თავქვე დაეშვა. გამოჩნდა ცხენისწყლის ქალები, ფერდობებზე შეფენილი ვენახიანი სოფლები და ქვევით, მდინარის მარჯვენა სანაპიროზე გაშენებული ლეჩხუმის რაიონული ცენტრი ცაგერი. დამრეც ფერდობზე მიმავალ დაკლაკნილ გზაზე შოფერს მანქანა დინჯად მიჰყავს. ჩვენც კმაყოფილნი ვართ ნელი სვლით, უფრო დამშვიდებით შეგვეძლია ფოტოაპარატების მომარჯვება.

სამი ციხე და ხალხის ისტორია

ჯერ კიდეც ქუთაისში დავპირდი ამხანაგებს, რომ ცხენისწყლის ხეობაში, მურის ხიდთან, ვნახავდით სამ საინტერესო ციხეს, უფრო სწორად, ციხის ნანგრევებს. ჩემმა ამხანაგებმა ამ ციხეთა სახელებიც იცოდნენ. ამიტომ, როცა ორბელის მთაზე ავედით და თავქვე დავეშვით, ამხანაგებმა პირობა შემახსენეს.

თვალი გავაყოლე ორბელის მთიდან ქვევით ჩამყოლ ქედს. ქედი ჩრდილო-აღმოსავლეთისაკენ მიემართება და ცხენისწყლის ნაპირას კედელივით ამართული მაღალი კლდით მთავრდება. ამ კლდის თავზე ერთმანეთის მიყოლებით სამი ციხის ნანგრევი მოჩანს.

— აი აქეთ, პირდაპირ ქედზე რომ ციხის ნანგრევი ჩანს, მაგას „დაუხვდი“ ერქვა, — დამასწრო ჩვენმა თანამგზავრმა ინჟინერმა, — ეს ციხე პირველი ხვდებოდა მტერს, პირველი არტყამდა მომხდურს და, თუ მტერი არც ისე ძლიერი იყო, საქმე ამით მთავრდებოდა. მაგრამ ზოგჯერ მტერი ზღვასავით აწევებოდა, ციხე „დაუხვდისთან“ სისხლის ტბას აყენებდა და წინ მოიწევდა. ამ დროს მას ზურგიდან მოეშველებოდა ხოლმე ციხე „დაჰკარი“, აი, ის — „დაუხვდის“ ქვემოთ, ქედს ოდნავ აქეთ რომ მოჩანს. ციხე „დაჰკარიდან“ ხეობაში მიმავალი ყველა ბილიკი ჩანს და მასში ჩასაფრებულ მებრძოლებს ხელიდან ვერავეინ გაუსხლტებოდა, თუნდაც გასხლ-

ტომოდა, მტერი მაინც შორს ვერ წავიდოდა. მაშინვე ბრძოლაში ჩაებმებოდა ციხე „არ გაუშვა“. ამ ციხის მხოლოდ თავი ჩანს აქედან ქედის ბოლოში... ხალხში მრავალი თქმულება და ლეგენდაა ამ ციხეების შესახებ შემონახული. თურმე არ ყოფილა ისეთი შემთხვევა, რომ მტერს სამივე ციხე აეღოს და წინ გზა გაეკაფოს. თვით ვახუშტი ბატონიშვილის ნაბრძანებიც ამას ადასტურებს. აი, რას ამბობს ჩვენი სახელოვანი მეცნიერი თავის „საქართველოს გეოგრაფიაში“: „მას ზეით ცხენის-წყალზედ არა კავკასიის ძირს მურის ციხე, არვისგან შემუსვრილ-აღებული“. სხვათა შორის, ამ ციხეების ნანგრევებს შესანიშნავი ლექსი უძღვნა ჩვენმა პოეტმა იოაკლი აბაშიძემ, — დასძინა ინჟინერმა, — დასაწყისი ახლაც მახსოვს:

მურის ძველ ხიდთან, სადაც გორმახებს
თიბქოს მდინარემ დანა დაუსვა,
სამი ციხე დგას: ციხე—დაუხვდი“,
ციხე „დაჭარი“ და „არ გაუშვა!“

ამასობაში ჩვენი მანქანა საგრძნობლად ქვევით დაეშვა. კვლავ გამოჩნდა ლეჩხუმის ვენახიანი სოფლები, ლამაზი ოდა-სახლები, მოვლილი ეზოები, წალკოტები და ირგვლივ გაშლილი ყანები. სოფლიდან ჩვენი ავტობუსი ცხენისწყლის ჰალეებში ჩასრიალდა. ჯერ ორლობებში ვიარეთ, შემდეგ კლდოვან შარაზე გადავედით და მალე მურის ძველ ხიდს მივადექით.

ხმაურითა და ალიაქოთით მორბოდნენ ცხენისწყლის მღვრიე ტალღები მურის ხიდის ქვეშ. ჩანდა, იმ მთებში, საითკენაც მივდიოდით, კოკისპირულად წვიმდა. ამას მთების თავზე დაწოლილი შავი ღრუბლებიც ადასტურებდნენ.

მურის ხიდს რომ გავცდით, ერთმა ჩემმა ამხანაგმა იკითხა, ცხენისწყალი რატომ დაერქვა ამ მდინარესო. პასუხის გაცემა ლენტეხელმა გლახმა დამასწრო.

— ამას ჩვენ ცხენისწყალს კი არა, ლაშხურას ვუძახით.—თქვა მან. — ლაშხურა კი იმიტომ ჰქვია, რომ ლაშხეთის მთებში გამოდის და ლაშხეთზე ჩამოივლის. არ ვიცი, ბარში ცხენისწყალს რატომ ეძახიან.

— თუ ლაშხურა ჰქვია, მაშ ცხენისწყალი რაღა შუაშია?! იქნებ ძველად ბევრი ცხენი ძოვდა ამ ჰალეებში. ვილაც მოგზაურმა ნახა და ცხენისწყალი შეარქვა. ასეთი შემთხვევები ცოტა როდია.

— გადაწყვეტით ვერც მე გეტყვიოთ რამეს, — ჩავერიე ლაპარაკში, — ძია-კაცი სწორს ამბობს, მაგრამ ლაშხეთში ამ მდინარეს მართო ლაშხურა კი არა, ცენისწყალიც ჰქვია. უფრო სწორად, ამ მდინარის მთავარ ტოტს ჰქვია ცენისწყალი. ეს ტოტი ცენის მთებიდან მოედინება. იქაა სოფელი ცენა და, ვფიქრობ, ცხენისწყალი ცენისწყალიდან უნდა იყოს ნაწარმოები.

ჩანს, ჩემმა პასუხმა ყველა დააკმაყოფილა, რადგან შემდეგ არავის არაფერი უკითხავს ამის შესახებ. მე კი ძალაუნებურად ერთხელ კიდევ ჩამაფიქრა ცხენისწყლის ეტიმოლოგიის საკითხმა. საქართველოს გეოგრაფიაში მდინარე რიონის შენაკადთა შორის ვახუშტი ასახელებს ცხენისწყალსაც და მის შესახებ შემდეგს წერს: „ხოლო ამას რიონს მოერთვის ჩრდილოდამ აბაშა-ტეხურის მდინარე, უნაგირსა მთის ზეით, ისულეთს. ამას ზეით რიონს, ტყეურს, მოერთვის ჩრდილოეთიდანვე ცხენის-წყალი. ეს გამოსდის ლეჩხუმისა და სვანეთის შორის კავკასსა და მოდის აღმოსავლეთს ჩრდილოს შუადამ სამხრეთ-დასავლეთს შუა. არამედ მდინარისა ამის სახელი არს პირველ მდინარე თაკვერისა, ხოლო ოდეს მოაშთო ცხენი ანაკოფიიდან უკუმოქცეულის ყრუს სპათა, ამისთვის უწოდეს ცხენის-წყალი“.

ეს მდინარე ცხენისწყლის სახელწოდების წარმოშობის შეტად გონებამახვილური განმარტებაა, მაგრამ მურვან ყრუს ლაშქრობამდე ცხენისწყალს ძველი ბერძნები ამავე სახელით მოიხსენიებენ. უნდა ვიფიქროთ, რომ ცხენისწყალი ბერძნების მიერ შერქმეული სახელწოდებაა. ჩანს, მათ ცენისწყალი გაიგეს როგორც ცხენისწყალი, ხოლო შემდეგ ქართულ ლიტერატურაში და მეტყველებაში ბერძნულიდან გადმოვიდა ამ სახით. ამგვარი შემთხვევები იშვიათი როდია.

მურის ხიდს იქეთ ავტობუსი გაჩერდა. ჩვენს მიერ გამიზნული ექსკურსია ფაქტიურად აქედან იწყებოდა. ახლა ვიდექით სწორედ იმ ადგილას, რომლის შესახებაც დასძენს ვახუშტი: „მუნიდამ გარდავალს სვანეთის გზა“.

სვანეთი დასავლეთ საქართველოს მთიანი მხარის ერთი მნიშვნელოვანი ნაწილია. ის შეიცავს ორ რაიონს — მესტიის და ლენტეხის რაიონებს. თვით სახელწოდება სვანეთი, ჩანს, სვანთა ტომიდან მომდინარეობს, რომელსაც, ძველი ბერძენი გეოგრაფის, სტრაბონის

თქმით, ეჭირა „კავკასიის მწვერვალები, რომლებიც დიოსკურიის ზემოთ არს“. ცხადია, სტრაბონის დროს და შემდეგ საუკუნეებშიც სვანთა ტომს, ანუ ი. ჯავახიშვილის სიტყვებით რომ ვთქვათ, „ქართ-ველების მესამე შტოს“, ვაცილებით ფართო ტერიტორია ეჭირა, ვიდრე დღევანდელი სვანეთია. ტომობრივი წყობილების დაშლისა და ქართველი ერის ჩამოყალიბების პროცესში ბარში მცხოვრები სვანები უფრო ადრე შევიდნენ საერთო ქართულ ოჯახში. პტოლომესა და სომეხი ისტორიკოსის ფაუსტი ბიზანტიელის ცნობით, სვანები ჯერ კიდევ ადრეულ საუკუნეებში გაითქვიფნენ კოლხებში. შემდეგ ბარს მთაც მიჰყვა და სახელწოდება სვანეთი დარჩა, როგორც საქართველოს ერთ-ერთი კუთხის გეოგრაფიული სახელი.

ასეა თუ ისე, სვანეთის მთები განუქმულია სილამაზით, მოსახლეობა—სტუმართმოყვარეობით, და ჩვენ თამამად, ალალი გულით მივემართებით მათი სოფლებისაკენ.

ჩვენი მანქანა ისევ აღმა აუყვავა ცხენისწყლის ხეობას. უკან მოვიტოვეთ სალი კლდეები და გორმახები. დაიწყო გაშლილი ადგილები. თითქოს ამინდმაც მოწყალების თვალთ მოგვხედა. ქალებში ჩამოწოლილმა ნისლმა მალლა აიწია და ტყით დაბურული ლამაზი ხეობა მთელი სიმაღლით გამოჩნდა. მალე დრუბლების კედელიც გატყდა, ბზარში მზემაც გამოიჭყიტა და ზაფხულის ძალა გვაგრძნობინა.

მენახიანი სვანეთი

— ვაზი თუ ხარობს სვანეთში? — შეკითხებიან ამხანაგები და გაფაციცებით ათვალეირებენ ცხენისწყლის ქალებს, ვაზს ეძებენ, მაგრამ ჯერჯერობით მხოლოდ სიმინდის ყანები ჩანს.

— ხარობს ზოგიერთ სოფლებში, — ვეუბნები მე და ბევრობაში გაგონილ თქმულებას ვუამბობ, — ერთხელ თურმე ღმერთმა გადაწყვიტა, მთელი ჩვენი ქვეყანა ვენახებით დაეფარა. ყველა კუთხე ფეხით შემოიარა და ყველგან ვაზი ჩაყარა. ბოლოს მთებისაკენაც წამოსულა. ღმერთს უნდოდა აქაც გაეშენებინა ვენახი. გზად ლეჩხუმში გამოიარა და ვაზი ჩაყარა. როდესაც მურის ხილამდე მიადგინა, წინ ზევიდან მომავალი ეშმაკი შეხვდა.

— საით მიბრძანდებიო? — ჰკითხა მან ღმერთს.

— ზევით, მთებში მივდივარ! — უპასუხა ღმერთმა, — ყველ-
გან ვაზი ჩავეყარე და ეს მხარეღა დამრჩაო.

— მაშ ეს წვალეზა ამიციდენია შენთვისო, — მიუგო მზაკვარმა
ეშმაკმა ღმერთს, — ამის ზევით საშინელი გზებია. ვიცოდი სიარუ-
ლი გაგიჭირდებოდა და მთელი ეს ხეობები მე შემოვიარე, ვაზი
ყველგან მე ჩავეყარეო!

ღმერთმა ეშმაკს დაუჭერა და უკან დაბრუნდა. ასე დარჩა სვა-
ნეთი უვენახოდ.

— მაშ სვანეთი მთლიანად უვენახოა?

— ეს ძველი თქმულებაა, — ღიმილით ამბობს ლენტეხელი
გლეხი.

მე კი ჩემის მხრით ვთხზავ და ვუმატებ:

— შართალია, ღმერთმა ეშმაკს დაუჭერა და უკან დაბრუნდა,
მაგრამ მერე მის ნათქვამში მაინც ეჭვი შეეპარა და შესაძოწმებლად
წამოვიდა. ნახა, რომ სვანეთს ვაზის ნაცვლად მოცხარი, მოცივი, ჭნა-
ვი და ჭახველა მოსდებოდა. განრისხდა, მაგრამ რალა უნდა ექნა.
ვაზის თესილი ცოტალა ჰქონდა და სვანეთის ზოგიერთ სოფლებში
ის მოაპნია. მას შემდეგ ამ სოფლებში პატარა-პატარა ვენახები
გაჩნდა.

ამხანაგებს ეღიმებათ, მაგრამ, ჩვენი თანამგზავრი ლენტეხელი
გლეხები კი გულისყურით მისმენენ.

ავტობუსი აღმართს აუყვია და მალე ბორცვზე გაშენებულ სო-
ფელში შევედით. ესაა რცხმელური. შარაგზის ორივე მხარეს სახ-
ლებია ჩამწყკრივებული. ეზოები ზოგან მიღალი, ზოგანაც დაბალი
ნესრითაა შემოღობილი. ეზოში ყველას ვენახი აქვს ჩაყრილი და
იმერული ყაიდის ოდების ქვედა ქვიტკირის სართულებს მხოლოდ
ვაზებს შორის ან ეზოში მიმავალი ბილიკების გასწვრივ სწვდება
თვალი. ალაგ-ალაგ ოდების წინ ლამაზი ტალავრებია გაკეთებული.
ვაზი მწვანე მტევნებითაა დახუნძლული. ჩანს, ოჯალეში ჰარბობს.
ყველა ეზოში დგას ვაშლის, მსხლის, ქლიავისა და ბლის ხეები. ვე-
ნახში სიმინდია შეთესილი. სიმინდში კი ლობიო ან კარტოფილი
შეურავათ, ასე, რომ მიწის ნაკვეთი მაქსიმალურად აქეთ გამოყე-
ნებული. სამაგიეროდ, მიწას კარგად უვლიან. სასუქად ნაკელს იყე-
ნებენ. აქ ნაკელი იმდენად ფასობს, რომ გლეხები „შავ ოქროსაც“
კი უწოდებენ. ყანაში არც ერთი კენჭი არ უნდა დარჩეს. მოხნავენ,

მოფოცხავენ და, თუ სადმე კიდევ გამოჩნდა ღორღი, იმასაც მოაცი-
ლებენ. დათესვით პირველად სიმინდი ითესება. თუ გოგრაყ უნდათ,
სიმინდის თესლში ურევვენ. ლობიოს და კარტოფილს შემდეგ შერ-
გავენ სიმინდის ნათესში. სიმინდს ორჯერ-სამჯერ თოხნიან. ამის
გარდა, გლეხი ყოველდღიურად ყანაშია და საგულდაგულად აშო-
რებს სარეველა ბალახებს. თუ ყანა სქელია, „გამოჩალავს“. ამრი-
გად, ის მთელი წლის განმავლობაში თავს დასტრიალებს მიწას. ცხა-
დია, არანაკლებ უვლიან ხორბლეულის ნათესებსაც. სიმინდი და
ხორბალი აქ თანაბრად ხარობს და თანაბრადაც ფასობს. ამიტომაც,
რომ კოლმეურნეობის ფართობთა ნახევარი სიმინდს უკავია, ნახე-
ვარი კი ხორბლეულ კულტურებს. საინტერესოა, პურის გამოცხო-
ბის ადგილობრივი წესი. ოჯახისათვის, ჩვეულებრივად, ე. წ. „სი-
მინდიან“ პურებს აცხობენ. სიმინდიანი პური შემდეგნაირად მზად-
დება: აიღებენ სიმინდის და პურის ცომის დაახლოებით თანაბარი
ზომის გუნდებს. პურის გუნდას გააგრძელებენ და სიმინდის ცომის
გუნდას გარს შემოაკრავენ. ამგვარად მიღებულ მრგვალ გუნდას გაა-
ბრტყელებენ და თონეში ჩააკრავენ. ხშირად სიმინდის ცომში
ნედლ ყველს შეურევვენ და ისე აცხობენ. ასე, რომ მიიღება ნახე-
ვრად ხაჭაპურის მსგავსი რამ. გარდა ამისა, აცხობენ სუფთა პურსა
და მჭადსაც. იციან ხაჭაპურებიც, რომელთაც შემდეგში ჩემი ამხა-
ნაგების ქებაც დაიმსახურეს.

როგორც კი სოფელ რცხმელურს გავცდით, კვლავ ცხენის-
წყლის ქალებში აღმოვჩნდით. აქ სოფლის თავიდან ზევით მიიმარ-
თება გრძელი, მაგრამ არცთუ ისე ფართო მინდორია. ქვედა ნახე-
ვარზე სიმინდი თესია, ზედაზე კი ხორბალი. მინდვრის თავში შვიდ-
წლიანი სკოლის თეთრი შენობა დგას. სკოლის ეზო ახალი მესრი-
თაა შემოღობილი და შიგ მწვანე მოლი ბიბინებს. ეზოში ღერძი,
ზრძელი და სხვა სპორტული იარაღები ჩანს.

სკოლის შენობას ცოტაზე გავცდით და ქალაც დაიღია. შარა
უკვე წყლის ნაპირს მისდევს; მხოლოდ ალაგ-ალაგ შეიჭრება თნი-
ლის ან თხმელის ტანმორჩილ ტყეში და მალე ისევ მდინარის ნაპირ-
ზე გადის. ცხენისწყლის ხეობა ამ ადგილას შემოსილია ფოთლოვა-
ნი ტყით. ხეობის მზიანეთში, რომელ მხარეზეც ჩვენი ავტობუსი
მიჰყვება შარას, წაბლის ხშირი კორომებია. არის რცხილა და წიფე-
ლიც. სამხრეთ ფერდობზე კი უფრო მაღალი ტყეა, უმეტესად

წიფლნარი. წიწვიანები მხოლოდ ხეობის ფერდობის ზედა ზოლში ჩანს.

მდინარე აქ სწრაფად მოედინება. ამღვრეული ტალღები გამეტებით ეხეთქებიან ვეებერთელა ლოდებს. ხშირად ასეთ ლოდებს შორის ძლიერი ჩქერალები იქმნება. თუ ცაგერის ჯალასთან ფიქვის და ნაძვის მორები აქა-იქ ეყარა, აქ უკვე ყოველ ნაბიჯზე ჩანს ზედახორად შეწყობილი მორები. მათი რაოდენობა მით უფრო მატულობს, რაც ზევით მივიდევართ. ეტყობა, ახლაც ეზიდებიან ფერდობებიდან ხე-ტყეს, დაცურება ეს-ეს არის დაიწყო.

რაც აღმა მივიდევართ, ტყის მასივები უფრო იზრდება. მალე წიწვიანები ხეობის ფერდობთა ქვედა ზოლშიც შემოერია. ზევით კი მთლიანად ნაძვის და სოკის კორუმებია. აი საიდან გამოაქვთ ხე-ტყე. ალაგ-ალაგ ციკაბო ფერდობებზე ჩამომავალი შუროებიც მოჩანს. მათზე დასრიალებული მორები პირდაპირ ცხენისწყალში ცვივა.

ტყეს ახლა გამორჩევით ჰრიან. ასე რომ, ახლად გაჩეხილი და გატიტვლებული ადგილები არსად ჩანს. ადგილობრივმა მცხოვრებლებმაც იციან ტყის ფასი და მთავრობის ღონისძიებას მხარს უჭერენ. ხე-ტყის დამზადების მუშები უმეტესად ადგილობრივი გლეხები არიან. ისინი ისე ფრთხილად „გამოჩალავენ“ ხოლმე ტყეს, როგორც სქლად დათესილ სიმინდის ყანას. სიფრთხილე, დიახაც საჭიროა, თორემ რა იქნება სვანეთის მთები და ხეობები უტყეოდ? გადახრიოკებული ადგილები, სადაც არა თუ ადამიანს, ხელიკსაც გაუჭირდება ფეხის მოკიდება და არსებობა.

რცხველურიდან წამოსვლის შემდეგ კიდევ რამდენიმე ვენახიანი სოფელი გავიარეთ და ლენტეხის რაიონულ ცენტრში — ლექსურაში შევედით.


ლექსურასთან ცხენისწყალს ორი მდინარე უერთდება: ხელედურა და ლასკადურა. ხელედურას ხეობა ქვემოთაა და ცხენისწყალს სოფლის ბოლოს მარცხენა მხრიდან უერთდება. მდინარე ლასკადურა კი პირდაპირ ლექსურაზე ჩამოდის.

„სოიუზტრანსის“ ავტობუსის უკანასკნელი სადგურიც ლექსურაა. აქედან უკვე სხვა ტრანსპორტზე უნდა გვეზრუნა, ლაშხეთისაკენ მიმავალი მანქანისთვის უნდა დაგვედარაჯნა. მალე ისიც გა-

მოჩნდა. სწრაფად მოვთავსდით მანქანაზე და ერთი ორი საათის შემდეგ სოფელ სასაშში ვიყავით.

სოფელი სასაშში ცხენისწყლის მარცხენა ნაპირას მდებარეობს, ზღვის დონიდან 1.100 მეტრის სიმაღლეზე. სოფლის ზემო და ქვემო ნაწილები გაშენებულია ცხენისწყლის ჭალაში, ხოლო შუაგული—მდინარე სგიმრაშულის გამოტანის კონუსზე. მდინარე სგიმრაშული ჯვრის მთიდან მოედინება და სოფელ სასაშის ბოლოს უერთდება ცხენისწყალს. ის კარგ ამინდებში საშუალო სიდიდის დეღეა, ანკარა და დასალევად გემრიელი. ამ დროს თვალი რომ ააყოლოთ მის კალაპოტს, რამდენიმე ადგილას შენიშნავთ თოვლივით ქათქათა ზოლებს—ჩანჩქერებს. წვიმიან ამინდში მდინარე სგიმრაშული მრისხანე და დაუნდობელია; მისი ტალღები ამ დროს ნაფოტებივით მოაქროლებს ძირფესვიანად მოგლეჯილ ხეებს და კენჭებივით მოაგორებს უზარმაზარ ლოდებს.

სოფელი სასაშში სიდიდით თითქმის ყველაზე დიდი სოფელია მთელ ლენტეხის რაიონში, ხოლო სილამაზით ერთ-ერთი პირველთაგანი. დასახლება, ჩვეულებრივად, როგორც ლენტეხის რაიონის ყველა სოფელში, მჭიდროა. სახლები ერთმანეთისაგან პატარა-პატარა ეზოებითაა გამოყოფილი. ამ ბოლო დროს კი სოფლის დასახლების სტრუქტურა მნიშვნელოვნად იცვლება. ისინი, ვინც წინათ მდინარე სგიმრაშულის ნაპირას ცხოვრობდნენ და წყალდიდობისას საფრთხე მოელოდათ, ახლა უშიშარ ადგილებში სახლდებიან. მგზავრი, რომელიც ამ რამდენიმე ათეული წლის წინ უამინდობის დროს მოხვდებოდა სოფელ სასაშში, ალბათ განცვიფრებული დარჩებოდა იმის გამო, თუ რატომ აირჩია ხალხმა სამოსახლოდ ისეთი „ცოფიანი“ მდინარის ნაპირი, როგორც სგიმრაშულია. მაგრამ საკმარისია, აღამიანმა ოთხივ მხრით მიმოიხედოს და მიზეზიც ნათელი გახდება. ცხენისწყლის არცთუ ისე ფართო, მაგრამ შედარებით ნაყოფიერი ჭალები ხალხს სამოსახლოდ არ ემეტებოდა. ამ ჭალას ტყით შემოსილი ფერდობი ესაზღვრება. ეს ფერდობი ჯვრის მთის ძირს წარმოადგენს. ტყე ქვედა ზოლში უმეტესად ფოთლოვანია. მხოლოდ აქა-იქ ჩანან ცალკეული ნაძვები და სოჭები. შემდეგ მოდის ნამდვილი შერეული ტყის ზოლი. ნაძვის გარდა არის ახოვანი სოჭის ხეები. სულ მაღლა კი სუბალპები და ალპები. ცხადია, ჰაერი სოფელ სასაშში სანაქებო იქნება. წიწვიანი ტყეები კარგ საავარაკო პირობებს ქმნის,



დაზვეილის სიყვარული.

და მართლაც, სოფლიდან ერთი კილომეტრის დაშორებით მდებარეობს პატარა, მაგრამ ლამაზი აგარაკი მოაში.

სახლები სოფელ სასაშში თითქმის მთლიანად ახალი ტიპისაა. მხოლოდ აქა-იქ მოჩანს ძველი მაჩუბები, რომლებსაც დღეს საქონლის სადგომად იყენებენ. ახალი სახლები უმეტესად ორსართულიანია — ფართო კარ-ფანჯრებით და აივნებით. სახლები ყავრითაა დახურული, თუმცა ალაგ-ალაგ ფიქალიც გვხვდება. ეს ძველი კარგი ტრადიციის აღდგენაა. ფიქალი ხომ ყავართან შედარებით დიდხანს ძლებს და ტყეც დაიზოგება!

მეურნეობის ძირითადი დარგი სოფელ სასაშში, ისე როგორც მთელს ლენტეხის რაიონში, მემინდვრეობაა. მინდვრის კულტურებიდან უპირატესობას ანიჭებენ სიმინდს და ხორბლეულს. საკომეურნეო ფართობის ნახევარზე სიმინდი ითესება, ხოლო ნახევარზე ხორბლეული კულტურები. ეს ფართობი ძირითადად მოიცავს ცხენისწყლის ქალებს და მის ახლომახლო ფერდობებს. უფრო ზემოთ, ტყის ზონაში საგანგებოდ გატეხილ ახობებში, ითესება კარტოფილი. კარტოფილის ნათესები ძალიან ხშირად სუბალპურ ზონაშიც კი აღის.

მთაში განსაზღვრული პირობებია მესაქონლეობის განვითარებისათვის. სასაშის კოლმეურნეობას აქვს მეძროხეობის მოზრდილი ფერმა, რომელიც გაშენებულია ფასის მთის ძირას, ლაფურის მიდამოებში. ზაფხულობით ნახირი მიშვებულა მთის საძოვრებზე, ხოლო ზამთრობით ბაგურ კვებაზე გადაჰყავთ. ლაფურის მთები მდიდარია ალპური ხალიჩებით — უხვი სათიბ-საძოვრებით.

ბოტანიკური დარაიონების მიხედვით, მთლიანად ლაშხეთი და კერძოდ სოფელი სასაში მოთავსებულია კონტინენტური მეხილეობის და მევენახეობის სარტყელში. მეხილეობის განვითარებისათვის ხელსაყრელი ბუნებრივი პირობები ლაშხეთში ადრეც არსებობდა, მაგრამ მეხილეობა მაშინ სულ არ იყო განვითარებული. ამის მიზეზს ისევ და ისევ უგზოობა წარმოადგენდა. უგზოობა შეუძლებელს ხდიდა ხილის გატანას ბაზარზე, რაც თავისთავად მეურნეობის ამა თუ იმ დარგის განვითარების დიდ სტიმულს წარმოადგენს. დღეს გზის პრობლემა გადაწყვეტილია. ლაშხეთის სოფლებში მიდის არა მარტო საურმე გზა, არამედ საავტომობილოც. ცხადია, დღევანდელ პირობებში ახლებურად შეიძლება დაისიას მეხილეობის განვითარება.

რების საკითხი, და, აი, პირველი სასურველი შედეგები უკვე თვალნათლივ ჩანს. ეზოებში ხშირია ვაშლისა და მსხლის ხეები. ამ რამდენიმე წლის წინ კი ალბათ პატარა ნამყენები ამოიტანეს. მართალია ჭერჭერობით კიდევ არ ჩანს ხეხილის ფართო საკოლმეურნეო ზაღები, მაგრამ იმედია მალე ისინიც გამოჩნდებიან. საამისოდ ყოველგვარი პირობები აქვთ ლაშხელ კოლმეურნეებს.

სოფელ სასაშში და საერთოდ ლაშხეთში ხელსაყრელი პირობებია მევენახეობის განვითარებისათვისაც. ამის მაუწყებელია ის პატარ-პატარა ვენახები, რომლებიც კოლმეურნეთა ეზოებში არც ისე რვეითია დღეს. მართალია ამ პატარა ვენახებში გაშენებულია უმეტესად იზაბელას ჭიშის ვაზი, მაგრამ აქ არანაკლებ გაინარებს ზოგიერთი სხვა ჭიშიც. საჭიროა მხოლოდ ინიციატივა და საქმის ცოდნა. საქმის მცოდნე აგრონომები კი აქაურ კოლმეურნეობებს საკმარისად ჰყავთ.

ძველისა და ახლის ჰილილი

გადაწყვეტილი გეჰონდა, ერთი ორი დღე სოფელ სასაშში დავრჩენილიყავით.

მეორე დღეს აგარაკ მოაშისაკენ გავემგზავრეთ.

მოაშში ნაბჭნარით გარშემორტყმული პატარა ლამაზი მინდვრებია. მინდვრებიდან ორი-სამი კილომეტრის დაშორებით გამოდის რკინანარევი მინერალური წყაროები. წინათ ამ წყაროებთან აშენებული იყო აბანო და მოაგარაკეები სამკურნალოდ იქ დადიოდნენ. ახლა კი მინერალური წყლები მიღებით მოაშში გადმოუყვანიათ და აბანოც აქ აუშენებიათ.

ამბობენ, ძველად მოაშის მინდვრებს სახნავად იყენებდნენო. ერთხელ ხვნის დროს გუთანი დიდ ლოდს წამოედო და ამოაგდო. კვალი რომ გაიტანეს და უკან მობრუნდნენ. ხარები ახლადმოგდებულ ლოდთან გაჩერდნენ და რაღაცას დაეწაფნენ. „მოაშ! მოაშ!“ — ბევრი უძახა გუთნისდემამ. მაგრამ ამოდ. მაშინ ხარებს წინ მოექცა და დაინახა. ქვის ამონაგდებში წყარო გამოდიოდა. გემო გაუსინჯა ნახა, რომ წყარო ვეძა (მეავე წყალი) იყო და ამის შემდეგ ამ ადგილს ხალხმა მოაში. უწოდა, ვეძა კი სოფლელების საყვარელი სასმელი წყალი გახდა. მოგვიანებით მოაში სააგარაკო ადგილად გადაიქცა.

მოაშის მეავე წყალი დავლიეთ და ნაბჭნარში გასეირნება დავა-

პირეთ. მაგრამ ამ დროს რაღაც ხმაური შემოგვესმა. ხმაური ქვემო-
დან მოდიოდა. მინდვრის ბოლოს, სასადილოს ეზოში, ხალხს მოე-
ყარა თავი. მინდორი სირბილით ჩავეჭერი და მალე მეც იქ გავჩნდი.
უწესრიგო ხმაურში პირველად ვერაფერი გავარჩიე. არც ჩემს
კითხვაზე გამცა ვინმემ პასუხი. ყველა წინ მიიწვიდა და აინტერესებ-
და საკუთარი თვალთ ენახა, რაც იქ ხდებოდა. მალე მივხვდი, რომ
ვილაკები ჩხუბობდნენ.

— თემრავ, კმარა! ჩვენ დაგვანებე და ჩვენ მოვუვლით ამას! —
ჩახლეჩილი ხმით ყვიროდა ვილაკ გამზავებულთაგანი. ჩანდა, მისი
ხმა მოჩხუბართ არ ესმოდათ. ამიტომ ის უფრო გაანჩხლდა.

— თემრავ, გეყოფა, თორემ, დედას გეფიცები, ცუდ ამბავს და-
ვატრიალებ!

ხალხი დედავდა, ხმაურობდა. ქალების წივილ-კივილი იქაურო-
ბას აყრუებდა.

— ძმები არიან და რად აკვდებიან ერთმანეთს?!

ხალხი კვლავ აიზვირთა და ტალღამ შუაში შემითრია. მართ-
ლაც ძმები დასტაკებოდნენ ერთმანეთს. გელას, უმცროს ძმას, სახე
ბრაზისაგან დამანკოდა და უფროს ძმას, თემრავს, თავგამეტებათ
სცემდა. თემრავი მხოლოდ თავს იცავდა და ამავე დროს ცდილობ-
და გააგებული უმცროსი ძმა გაეკოჭა. უცებ თემრავმა გელას წელ-
ზე შემოკხვია ხელები, ჯერ მიწას მოწყვიტა, შემდეგ ძირს დაანარ-
ცხა. და ზედ გადააჯდა.

— კაკო, ქამარი მომეცი! — დაიყვირა თემრავმა.

ხმაჩახლეჩილმა გამზავებულმა ქამარი სწრაფად მიაწოდა, თა-
ნაც თემრავს მიეშველა გელას გაკოჭვამი.

ერთი სკოლის ამხანაგი დავინახე, რომელიც შეწუხებული სა-
ხით მისჩერებოდა მოჩხუბართ.

— ჯუმბერ, რა მოხდა, რად წაიკიდნენ ძმები? — შევეკითხე მას.

— სასადილოში გელა არჩილის ბიჭს შესხვედრია და ჩხუბი
აუტეხია. მაშინვე თემრავი გაჩენილა იქ და ძმისთვის გასაზავებლად
ხელი უტაცია და, აი, საქმე სადამდე მივიდა! გელას უნდა თემრავს
ხელიდან გაუსხლტეს და არჩილის ბიჭს დაედევნოს.

გონებაში გაიელვეს წარსულის ამბებმა, რომელთაც პირდაპირი
კავშირი ჰქონდა ძმების დღევანდელ შეტაკებასთან.

იმ ამბების მომსწრე არც მე ვარ, არც თემრავი და, მით

უმეტეს, არც გელა. სხვისი მონაყოლი მომისმენია, მაგრამ ახლა ყველაფერი ისე ცხადად დამიდგა თვალწინ, როგორც ძმათა წელანდელი ჭიდილი. მე ვხედავდი ყორნისფერ ბედაურზე ამხედრებულ თავმომწონე ვამეხს, რომელიც ღიღინით უახლოვდება ცოლოურის სოფელს. თეთრი ჩოხა აცვია და მხრებზე კიდემოქარგული თეთრი ყაბალახი გადაუგდია. ლამაზად გადავარცხნილ სქელ შავ ქოჩორს ნიაფი ოდნავ ურჩევს. თავი მალა აუწევია და წინ თამამად იყურება. წელზე შემორტყმულ ვერცხლის ბალთიან ქამარზე ვერცხლითვე მოქედნილ პატარა სატევარი დაუკიდია. სხვა რამ იარალი თან არა აქვს.

პატრონივით თავმომწონეა ვამეხის ყორნისფერი ბედაურიც. კბილებით ლაგამს ხრავს, ხოლო წერილ მალალ ფეხებს ლამაზად მოაცურებს ჰაერში. ახალი ნალი უღმობლად ამსხვრევს გზაზე მოძნეულ კენჭსა და ღორღს. აი, ცოლოურის სოფელიც გამოჩნდა. ვამეხმა ბედაურს მათრახი დაანახვა და ოთხით წაიყვანა. სოფლის მისადგომებთან აღვირი ერთბაშად დაქაჩა და ცხენი შეაყენა. გზას იქით, სიმინდის ნაყანევში, კაცი დაინახა, რომელიც ხარ-მარხილს მიუძღოდა წინ.

— ისაა. ნამდვილად ისაა! — ხმამალა თქვა ვამეხმა და ადგილზე მოთამაშე ბედაურს ფერდში ქუსლი შეახო. ცხენი ადგილიდან მოწყდა, გზიდან მარჯვნივ გადაუხვია, ღობეს გადაეწლო და დინჯად მიმავალ ხარ-მარხილს ქშენით ჩაუქროლა გვერდით.

— ჰა, შენა ხარ, გეგი! ის როგორ იყო — ვამეხს ვანანებო, დედას ვუტირებო? ვის უტირებ დედას, შე ჯუჯავ შენა! — ვამეხმა გეგის ქულზე ხელი აუჯრა და გადაუგდო.

— ვამეხ, გეყო რაც მქელე, ახლა თავი გამანებე, თორემ!..

— რაო, ახლაც მემუქრები?!

— გიმეორებ — შენი გზით წადი... საცოლე წამართვი და გეყოფა. აწი თავი გამანებე. ნუ მქელავ, თორემ ყველაფერს ვფიცავ, მართლა განანებ!

— შენ რა უნდა მიქნა, ლაჩარო, ბერდანის იმედი ხომ არ გაქვს? შენზე ხელსაც არ გავისერი. ცხენს გავასრესინებ ფლოქეებით შენ თავს! — და ვამეხმა მართლაც დააჯახა ცხენი გაფითრებულ გეგის.

— მაშ ასე, კაცად არ მაგდებ ხომ?! — დაფარა გეგის ხმამ ცხე-

ნის ქიხინი. გვერდზე გახტა და, როგორც კი ფეხი მიწას შეახო, ჩახმახშემართული თოფი უკვე ვამეხზე ჰქონდა მიმიზნებულო.

— არ გა... — შეჰყვირა შინაქამმა ვამეხმა, მაგრამ მისი ხმა თოფის ხმამ შთანთქა...

როდესაც ბოლი გაიფანტა. ვამეხი ჯერ კიდევ ცხენზე იჯდა. მაგრამ ხმას ვერ იღებდა. სახე დაღმეჭოდა და მხრებში მოხრილიყო. მკერდიდან გადმონადენი. სისხლი თეთრ ჩოხას წითლად უღებავდა.

გეგის კი ჩახმახი ზელახლა შეეყენებინა, თოფი მარჯვედ ეჭირა და პირველი გასროლის შედეგს მოთმინებით უცდიდა.

— მომკალი შე... — ძლივს ამოიგმინა ვამეხმა და ცხენიდან მოწყვეტით გადმოეკიდა.

— შენ თავს დააბრალებ! — ნიშნის მოგებით უპასუხა გეგის. შემდეგ შეტრიალდა, ხარ-მარხილი მიატოვა და ტყისაკენ ჰქნა ჰარი.

გეგის მამის მიერ თავისი ვაჟისთვის აკვანში დანიშნულს და შემდეგ ვამეხის ცოლს, ელენეს, ქმრის მოკვლის ამბავმა ცნობა წაართვა. მერე, როდესაც გონს მოეგო, ქმრის ცხედარს ჩაეხუტა. მწარედ დასტირა და სასაფლაოზე გამომშვიდობებისას მტკიცე ფიცი დასდო, რომ შეილებს შურისძიების გრძნობით აღზრდილა.

ელენეს სიხარულს საზღვარი არ ჰქონდა, როდესაც მეორეც ვაჟი ეყოლა.

ძმა ძმას მხარს მისცემს და სისხლსაც უკეთ აიღებენ — ფიქრობდა ის.

ზამთრის ერთ დღეს სოფელში ყაჩაღად გავარდნილი გეგის დაღუპვის ცნობა მოვიდა — ღამე მთაში დარჩენილიყო და გაყინულიყო. ელენემ ქმრის სიკვდილივით შეიცხადა გეგის დაღუპვა. მაგრამ ქმრის სისხლის აღების იმედს მაინც არ ჰკარგავდა, რადგან იცოდა, რომ სისხლის აღება მკვლელის ნათესავებზეც შეიძლებოდა. ელენემ მხოლოდ ოდნავ შეცვალა ბავშვების აკვანთან დასამღერებელი სიტყვები.

„იმ ჭუჭას ადამიანური სიკვდილი არ დასცალდა, გენაცვალეთ, მაგრამ ხომ დარჩენ მისი ნათესავები, თქვენც იმათზე აიღებთ მამის სისხლს“.

ფიქრებიდან თემრავის ბოხმა ხმამ გამომიყვანა.

— შენი ქირიმე, კაკო, კარგად მოუარე, არსად გაგექცეს, —

ეუბნებოდა ის ხმაჩახლეჩილ გამზავებელს, რომელსაც შაგრად ვაქაჩულ გელასთვის ჩაეკიდა ხელი და ამშვიდებდა:

ხალხის ხმაური უკვე დამცხრალი იყო. მე თემრასს შევხედე და გამეღიმა. ოფლში გაწურული მხარბეჭიანი ვაეკაცი ჩამოგლეჩილ პერანგის ნაფლეთებს მხრებზე ისწორებდა. სახე სისხლით ჰქონდა გასვრილი, ქოჩორი ჩამოსწეწოდა და ცალი ხელით დოინჯემოდ-გმული ხალხში ბოძივით იდგა.

ხელებგაკრული გელა კი სამ კაცს მიჰყავდა მახლობელი სახლისაკენ. ის ისევ ღრიალებდა, იგინებოდა, იმუქრებოდა, ფეხს ითრევდა და ცდილობდა თავი გაეთავისუფლებინა. უცებ კაკოს ხელიდან გაუსხლტა, მინდორში გაგორდა და ბალახს პირით დაუწყო გლეჯვა, თან მთელი ხმით გაჰყვიროდა:

— მამაჩემის სისხლი, მამაჩემის სისხლი!..

მზე დასავლეთით იყო გადახრილი, როცა მოაშიდან უკან ვამოვბრუნდით. გამოვცდით მინდორს და ცხენისწყლის ხეობას ზემოდან გადავხედეთ. აქედან ხელისგულივით ჩანდა მზით გაშუქებული ლაშხეთი.

ლაშხეთი ულამაზესი თემია ლენტეხის რაიონში. აქ ცხენისწყლის ხეობა ერთბაშად იშლება. ლაშხეთის ტერიტორიაზე ცხენისწყალს მრავალი შენაკადი უერთდება ორივე მხრიდან. ეს მდინარეები საუკუნეების განმავლობაში ქმნიდნენ გამოტანის მასიურ და ფართო კონუსებს. ამ კონუსებზე დროთა განმავლობაში ნიადაგს მოუკიდებია ფეხი და ადამიანთა დასახლებისათვის მშვენიერი პირობები შეუქმნია. ლაშხეთის სოფლები ძირითადად ამ გამოტანის კონუსებზეა გაშენებული.

პირველი შენაკადი, რომელიც ცხენისწყალს ლაშხეთის ტერიტორიაზე უერთდება, არის მდინარე ხეშკური. ეს ლომგმარისა და გორვაშის მთებიდან იღებს სათავეს. ხეშკურის ნაპირას მდებარეობს სოფელი ლუჯი, რომელიც ამჟამად სასაშის კოლმეურნეობაში შედის. მდინარე ხეშკურის და ცხენისწყლის შესაერთის მახლობლად მდებარე ჭალები ნოყიერია და უხვ მოსავალს იძლევა. კოლმეურნეობა აქ მონაცვლეობით თესავს სიმინდს და სჭობლეულებს.

სოფელ სასაშის კოლმეურნეობის ტერიტორიაზე ცხენისწყალს, კიდევ ორი მდინარე უერთდება მარცხენა მხრიდან; ესენია მურგოული და სგიმრაშული. ცხენისწყალს შენაკადები აქვს მარჯვნიდა-

ნაც. მათ შორის ყველაზე შმაგი მდინარეა ფიშყორი. ფიშყორი წელიწადი-თორმეტი თვე მღვრიე მოედინება. წვიმიან ამინდებში კი აღედება ხოლმე და შეუპოვრად მოაგორებს უზარმაზარ ლოდებს, მოეზიდება ღორლსა და შლამს. ხშირად ფიშყორი ისე აღიდდება, რომ ცხენისწყალს გზას გადაუჭრის, აგუბებს და კალაპოტსაც კი უცვლის. მდინარე ფიშყორის გამოტანის კონუსზე მდებარეობს სოფლები: მებეცი, ლეკოსანდი, ყახუნდერი და ნაწილობრივ ლემზაგორი.

ფიშყორის გარდა ცხენისწყალს მარჯვნიდან უერთდება მდინარეები: აშხაშური და ხანაშური. აქვე მდებარეობს სოფელი: ჩიხარეში, მის ზემოთ კი სოფელი მელე. ჩიხარეშის და მელეს გასწვრივ ცხენისწყლის მარცხნივ მდებარეობს სოფლები: შკედი, ლობი და ნაცული. ამ სოფლებზე ჩამოდის მდინარეები: ლობშური და ცხენშური. უკიდურესი სოფელი ლაშხეთის თემისა მახაშია. სოფელი მახაში ცხენისწყლის მარჯვენა მხარეს საკმაოდ დამრეც ფერდობზეა შეფენილი.

ლაშხეთის ცენტრალური სოფელი ყახუნდერია. რევოლუციის შემდეგ პირველი საშუალო სკოლა ლაშხეთის თემისათვის აქ გაიხსნა. ამჟამად კი ლაშხეთში მეორე საშუალო სკოლაა სოფელ ჩიხარეში. ლამაზია ყახუნდერი. განსაკუთრებით ლამაზია საშუალო სკოლის შენობის ზემოთ შემოღობილი ადგილი, რომელსაც ადგილობრივად „სუფს“¹ უწოდებენ. სუფის ცალ მხარეს აშენებულია ეკლესია, რომლის გარშემო იფნის, პანტის და მაყალოს ზეივანია, მეორე მხარეს მოლიანი მინდორია. ამ მინდვრის შუაგულში დგას ვეება ცაცხვი, რომლის ტანს ცხრა კაცი ძლივს უწვდენს გარშემო ხელს. ცაცხვის ვარჯს ღორის დიდი ნაწილი აქვს დაჩრდილული.

სოფელ ყახუნდერში, კერძოდ „სუფში“, წინათ მრავალი სათემო დღესასწაული იმართებოდა. აქ ტარდებოდა წარმართობის დროიდან მომდინარე რელიგიური დღეობა „ლინურყვამალ“ ანუ კოშკობანა. ჩვენი დიდი ისტორიკოსის ივ. ჭავჭავაძის აზრით, ეს დღესასწაული მიძღვნილი იყო ნაყოფიერების ღვთაებისადმი. დღესასწაული ზამთარში, ყველიერას მეორე დღეს ტარდებოდა. წინდაწინ თოვლისაგან აგებდნენ დიდ კოშკს და შემდეგ მთელი

¹ სუფი სვანურად ნიშნავს ფორს, მოვლანს.




გიგანტი ცაცხვი

დღესასწაული ამ კოშკის გარშემო იმართებოდა. დღერბაში მონაწილეობას იღებდა მთელი ლაშხეთი, კოშკის გარშემო შეიკრიბებოდა საგანგებოდ ჩაცმულ-გამოწყობილი ხალხი და იწყებდნენ დღეობას. ქეიფის შემდეგ იწყებოდა სხვადასხვა სანახაობების ჩვენება. ასეთ სანახაობათა შორის იყო ე. წ. „მელია ტულეფია“, რომელაც გამოხატავდა მშობლის მიერ შვილების მფარველობის და მათი ბოროტი სულისგან დაცვის იდეას.

სანახაობებს მოჰყვებოდა ცეკვა-სიმღერა. ცეკვა-სიმღერას დღეობაში მონაწილე ხალხი ასრულებდა, როგორც საერთო ძალით, ისე ცალ-ცალკე, სოფლების მიხედვით, რასაც თან სდევდა შეჯიბრი. ასეთ შეჯიბრს, ცხადია, სჭირდებოდა წინასწარი სამზადისი. ეს დღესასწაულები იყო ერთ-ერთი კარგი საშუალება ადამიანთა ურთიერთობის დასამყარებლად. უეჭველია, რომ მსგავსი დღეობები წარმოადგენდა ახალგაზრდა ქალ-ვაჟთა თავის გამოჩენის ასპარეზსაც. აქ ისინი ერთმანეთს გაიცნობდნენ და ხშირ შემთხვევაში კიდევ უმიჯნურდებოდნენ.

მურყვამობის დროს განსაკუთრებულ გრანდიოზულ სანახაობას მაინც სპორტული შეჯიბრებები წარმოადგენდა. ასეთი შეჯიბრების მოწყობა აღნიშნული დღესასწაულის დროს შემთხვევით ხასიათს არ ატარებდა. სპორტული შეჯიბრებებისათვის ხალხი თითქმის მთელი წლის განმავლობაში ემზადებოდა. ცხადია, სამზადისს თავისუფალი დრო ეთმობოდა. შეჯიბრება ჯერ სოფლების შიგნით ტარდებოდა. აქ ვლინდებოდნენ საუკეთესონი, რომლებიც გადიოდნენ მახლობელ სოფლებს შორის მოწყობილ შეჯიბრებაში. ასეთი შეჯიბრებები ქვემო ლაშხეთში (მდინარე ფიშყორს ქვემოთ) ცალკე ტარდებოდა და ზემო ლაშხეთში—ცალკე. სწორედ ამ ზონალურ შეჯიბრებაში გამარჯვებულნი გადიოდნენ მურყვამობის დროს გამართულ შეჯიბრებაში მონაწილეობის მისაღებად.

სპორტული შეჯიბრებები დღის მეორე ნახევარში იწყებოდა და გვიან საღამომდე გრძელდებოდა. იყო ჭიდაობა, სირბილი, ხტომა და ქვის სროლა. განსაკუთრებით დიდ ინტერესს იწვევდა ჭიდაობა. ნაცადი, კუნთმაგარი ფალაენები თავდავიწყებით ერკინებოდნენ ერთმანეთს. წყვილში ერთი ზემო ლაშხელი უნდა ყოფილიყო და ერთი ქვემო ლაშხელი. ერთ-ერთი მოჭიდავის დამარ-



მუდი კოშკი მანჯის ტიპის სახლითურთ.

ცხების შემდეგ იმავე მხრის სხვა მოჭიდავეს შეეძლო დასჭიდებოდა გამარჯვებულს. ჭიდაობის წესი შემდეგნაირი იყო: მოჭიდავეს ქამარი მკიდროდ უნდა ჰქონოდა წელზე შემორტყმული. ჭიდაობის დასაწყისში მოწინააღმდეგენი ერთმანეთთან მიდიოდნენ, ერთიმეორეს ქამარში ჩასჭიდებდნენ ხელს და ჭიდაობა ამ მომენტიდან იწყებოდა. ფანდები ძირითადად კეთდებოდა ფეხებით. მთავარი იყო შიდაკაური, გარეკაური და მოცეცვა. საუკეთესო ფანდად ითვლებოდა მოგვერდი. კისრულზე გადაყვანის შემთხვევები იშვიათი იყო, რადგან ჭიდაობა ძირითადად ერთმანეთას პირისპირ დგომით და ქამარში ხელის ჩავლებით ტარდებოდა.

მოჭიდავე გამარჯვებულად ითვლებოდა მხოლოდ მაშინ, თუ ის ორივე ბეჭზე დასცემდა მოწინააღმდეგეს. არ შეიძლებოდა: ჩოქზე დამდგარი ან დამჯდარი მოწინააღმდეგის წაქცევა.

შეჯიბრი დიდხანს გრძელდებოდა. დღეობის დამთავრების შემდეგ გამარჯვებული მხარე ზეიმით მიდიოდა შინისაკენ.

ლაშხელები მსგავს შეჯიბრებაში გამარჯვებას იმდენად დიდ მნიშვნელობას ანიჭებდნენ, რომ ფალავანთა სახელები თაობიდან თაობაში გადადიოდა. ამ სახელებს ქება-დიდებათ იხსენიებდნენ თავყრილობის ადგილებში.

წარმართობიდან უკანასკნელ დრომდის ლაშხეთში კიდევ რამდენიმე დღეობა იყო შემორჩენილი. ერთი მათგანი, რომელსაც „განცხდები“ ეწოდებოდა, გაზაფხულის მოახლოებისას თუ დადგომისას იმართებოდა. ამ დროისათვის, ხალხის თქმით, მზის ამოსასვლელი ადგილი ვერძის სამ ნახტომზე გადაინაცვლებს აღმოსავლეთით და დილას მნათობი ლაშხეთის თავში აღმართულ ლამაზი მწვერულის ჭითხაროს წვერზე ამოჰყოფს თავს. დღეობა სოფელ ჩუკულის მახლობლად აშენებულ სამლოცველოსთან იმართებოდა. ღამენათევი ხალხი ცისკრის ამოსვლას ფეხზე ხვდებოდა. როდესაც ცისკარი გამოჩნდებოდა და ჭითხაროს თავზე ბნელი ცისკიდური ლურჯფარად შეიღებებოდა, ხალხი იწყებდა სიმღერა „ლილეს“. დინჯად და ვაჟკაცურად უმღეროდნენ ისინი მზის ამოსვლის მოახლოებას. „ლილე“ გრძელდებოდა მანამ, სანამ ცისკიდური მთლად არ განათდებოდა. როდესაც ჭითხაროს თავზე გაზაფხულის მზე ამოგორდებოდა და თავის სხივებში გაახვევდა არემარეს, მაშინ აღტაცებული ხალხი გუგუნით შემოსძახებდა „კვირის“. ასე იწყებოდა ზეიმი გაზაფხუ-

ლის დადგომის, მზის ძალის მომატების და ხანგრძლივი ზამთრის შემდეგ ბუნების ხელახალი აღორძინების აღსანიშნავად.

სიმღერა „ლილეს“ სახელწოდების წარმოშობის გარკვევისათვის იქნება საჯულისხმო იყოს ის გარემოება, რომ ალიონზე აღმოსავლეთთან ლურჯად შეღებილ ცისკიდურს ხალხი „ლილ“-ს უწოდებს.

დღეისათვის „ლიმურყემალ“ და სხვა რელიგიური დღესასწაულები წარსულს ჩაბარდა, მაგრამ „სუფში“ მაინც ხშირად იკრებიება ხალხი და ჰიდაობაც ხშირად იმართება.

ცხენისწყლის სათავეებისაკენ

სოფელ მეღეს ზემოთ ცხენისწყლის ხეობა ერთბაშად ვიწროვდება. ლაშხეთის უკანასკნელი სოფელი მახაში უკვე ამ ვიწროებში მდებარეობს. ის ცხენისწყლის მარჯვენა მხარის დამრეც ფერდობზეა შეფენილი. როგორც კი კაცი სოფელ მახაშს უკან მოიტოვებს. თქალწინ პატარა, მაგრამ ლამაზი ჭალა გადაეშლება. ჭალის ბოლოზე ძველთაძველი ციხის ნანგრევებია. მახსოვს. მოწაფეობის დროს. როცა ამხანაგები რაიმე შემთხვევის გამო ამ გზით მივიდიოდით, ციხის ნანგრევს ისე არ ჩაუვლიდით გვერდს, რომ ზედ არ აესულიყავით. მუდამ გაკვირვებული ვრჩებოდით კვიტიკრის სიმტკიცით. ჩაქუჩითაც ძნელი იყო კედლის კიდის მომტვრევა.

და, აი, ახლაც. როცა აქ ავიარეთ, მივედით და გავსინჯეთ, ნაშენის სიმტკიცემ ჩემი ამხანაგებიც განაცვიფრა. ჩაქუჩი არ გვექონდა, მაგრამ მოზრდილი ლოდების ცემით ვერაფერს ვაკლებდით კედლების ნანგრევებიდან გამოჩენილ დულაბს.

მოხუცებისაგან გამიგონია, რომ ძველად, ციხეების აგების დროს, დულაბს საგანგებოდ ამზადებდნენ: კირისა და ქვიშის ვარდა მასში ჭვავის ფქვილსა და რძეს ურევდნენ. დღემდის შემონახული თქმულების მიხედვით. ნაქალაქევის (ასე ეწოდება ამ ადგილს) ციხე-სიმაგრე დიდი თავდაცვიანი მნიშვნელობისა იყო. მის შემოგარენში გაშენებული იყო სოფლები და სიცოცხლე დულდა. მაგრამ ფასის მთის გაღმიდან წამოვიდა ურჯულოთა ჯარი და ლაშხეთის დაპყრობა მოინდომა. ლაშხელებიც მზად დახვდნენ მომხდურს. დიდი ბრძოლა გაიმართა სწორედ ამ ციხე-სიმაგრის მისადგომებთან. ორივე მხრივ მრავალი დაიხოცა. მოკლულთა და დაჭრილთა სისხლი

ზღვად დადგა. ირგვლივ ყველაფერი გავერანხდა. და, აი, ან ადგილს უღეს ჰქვია ნაქალაქევი; მის ზემოთ მდებარე კალას კი ძულარიშო ანუ სისხლის ზღვა; რადგან სწორედ ამ კალაში დამდგარა ქაშინ სისხლის ზღვა.

დღეს ძულარიშის ლამაზ კალაზე საავტომობილო გზა მიდის. ამ გზის ორივე მხარეს ხისა და ქვიტკიოის ახალი შენობებია აგებულნი, რომლებიც ყორულდაშის წარმოებას ეკუთვნის.

ძულარიშთან მთავრდება დასახლებული ლაშხეთიც. მის ზემოთ ცხენისწყლის ხეობა რამდენიმე ათეულ კილომეტრზე უკაცრიელდება. რადგან ვიწროებში სამოსახლო ადგილები არსად არაა. ხეობა ქაინც ლამაზი და დიდებულია. ცადაბქენილ მთათა ფერდობები უდაბური ტყეებითაა შემოსილი. ჩვენი გზაც წიფლის, რცხილის და თელის ხეივანარში მიდის. ზედ ცხენისწყლის ნაპირას მურყნარი ქარბობს. თუ სადმე ტყისაგან თავისუფალი ადგილი გამოჩნდა, ოქთხილის ბუჩქებს დაუფარავთ მიდამო.

ზოგან ტყით შემოსილი მთის ფერდი იხე გამოჩნდება, რომ ძირიდან წვერამდე შეიძლება თვალის აყოლება. ან დროს ბოტანიკის ელემენტარული კურსის უცოდინარიც ადვილად შეამჩნევს მცენარეთა ზონალურ გავრცელებას. ქვევით შერეული ტყე: წიფელი, რცხილა, იფანი, არყი, ნეჯერჩხალი, თელა, ხაძვი, სიპი, ფიჭვი; შებდეგ — წიწვიანების კორუმები; ზევით — ისევე ფოთლოვანი სუბალპური ტყეები, სულ თავში კი მოჩანს ალპური ხალები. ჭერ მხოლოდ შორიდან ვხედავთ ყველაფერს ამას, მაგრამ ხვალ თუ ზეგ ფეხით გავივლით ყველა ზონას და უფრო ახლოს გავეცნობით ყოველ მათგანს.

რაც უფრო ზევით მივდივართ, ცხენისწყალი მთ უფრო სწრაფი და შეუპოვარი ხდება, წინა დღეების წვიმით ამღვრეული ტალღები ღრიალით ეხეთქებიან სიბი ქვის უზარმაზარ ლოდებს. ხანდახან მორებს ან ძირფესვიანად ამოგლეჯილ ხეებსაც ჩამოატარებენ. ასეთ ხეებს ჭერ კიდევ მწვანე ვარჯი აქვთ და მცურავ მცენარეთა შთაბეჭდილებას ტოვებენ. ხშირად ჩვენც ვხდებით მცენარეთა ძირფესვიანი მოთხრის მოწმე. განსაკუთრებით მოსახვევებში ეხლება ძალუმად ცხენისწყლის ნაკადი კბოდეს, თითქოს სურს გამჩუდებული კალაპოტი გაასწოროს.

ამინდი შესანიშნავია და გზაზე ხშირად გვხვდებიან მგზავრე-

ბი. დროდადრო გაისმის ავტომობილის ხმა. თუ ხმა უკანიდან მოვიდა, მიტრიალები და ავტომობილი იქვეა. ეს იმიტომ, რომ ცხენისწყლის ხმაურის ფონზე მხოლოდ მოახლოებული მანქანის სიგნალი აღწევს თქვენამდე. ის ავტომობილი, რომელმაც ახლახან შეგაკრთოთ. წინ გაიკრება. თქვენ ხედავთ, როგორ მიჰყვება ის ზევით მიმავალ გზას, კარგად არჩევთ მის ნომერსაც. მაგრამ ხმა უკვე აღარ გესმით. ცხენისწყლის ბოპოქარა ტალღები კვლავ ახშობენ მიტრის ხმაურს.

იმ მგზავრთაგან, რომლებიც ჩვენ გვხვდებიან, ზოგი მანქანით მიდი-მოდის, ზოგიც ფეხით და ზოგიც ცხენით. ხშირია საპალნიანი ცხენები და დატვირთული ხარ-ურემი. საზაფხულო საძოვრებიდან ყველს ეზიდებიან საკოლმეურნეო ფერმის მუშაკები.

რამდენიმე თანამგზავრი ჩვენც შემოგვემარა. ზოგი ლაშხელია და ცენაში ან ყორულდაში მიდის; ზოგიც ცენელი. ყორულდაშელი ან უშგულელია. წინ გრძელი გზა გვიდევს ერთად გასაველელი და ჩვენც ბაასით მივიწევთ წინ.

ჩვენი თანამგზავრებიც კმაყოფილნი არიან დღევანდელი დღით. მოგზაურისათვის კარგი ამინდი ხომ მართლაც სანატრელია. ამ დროს ბუნების მარცხეცაა ძლიერდება. ირგვლივ საამოდ ხმაურობენ ფრინველები, ზუზუნებენ მწერები, ადამიანის თეხის ხმაზე თუ დანახვისას ფრთხებიან ქვა-ლორღებში და კლდეების ნაშალზე გასათობად გამოფენილი ხვლიკები. დროდადრო ვზის ნახლობლად ბუჩქებიდან ბუჩქში გადაიარბენს კურდღელი, ან გზას გადაჭრის ორითინა. ლამაზია ტყეთა სამეფო.

ეს რა არის! — გვეუბნება შუახანს გადაცილებული ვაკაცი გიგო. — სილამაზე რე ნახეთ, საჭიხვე მთებში, მთელი ჩივი რომ გაიარბენს თქვენს თვალწინ. საღ კლდეებზე რომ ისე გარბიან, თითქოს შარავზააო. ლამაზი ის არის, აბა ეს რაა. ხვლიკების სილამაზე სად გაგონილა!

— თქვენ ალბათ ჩშირად გინახავთ ჭიხვების ჯოგი, ძია გიგო, არა? — ვეკითხებით ჩვენს.

ძია გიგოს ეღიმება. ამით გვიდასტურებს. რომ მას შრავალჯერ უნახავს ჭიხვების ჯოგი. შემდეგ დაწვრილებით გვიყვება ჭიხვებზე ნადირობის წესებს. თურმე ზაფხულში არც ისე რთულია ჭიხვებზე ნადირობა; რადგან ჭიხვები საბალახოდ ზოგჯერ ტყეშიაც კი ჩამო-

დიან და საჯიხვე კლდეებში ასვლა საქირო აღარაა. ზამთარში კი გაცილებით რთული და საინტერესოა. ოცი ან ოცდაათი ამქანავი წინასწარი სამზადისის შემდეგ გასწევს საჯიხვე მთებისკენ. ცხადია, ყველას თხილამურები უყვითა, რადგან უთხილამუროდ თოვლში სიარული შეუძლებელია. სანადირო თხილამურები სპორტულ თხილამურებს არ ჰგავს. მათ თხილის წნელისაგან აკეთებენ. აიღებენ თხილის ნედლ წნელს და ცეცხლის ალზე გაათბობენ, გამურავენ (სახელწოდება „თხილამურიც“ შეიძლება აქედან წარმოსდგებოდეს). ამგვარად გამობარი თხილის წნელი უფრო დრეკადი ხდება და მისგან ელიპსის ფორმის რგოლს შეკრავენ. შემდეგ ამ რგოლს განსაზღვრული წესით მოქსოვენ ბაწრით და თასმით. ფეხზე მისამაგრებელ თასმებსაც გაუკეთებენ და თხილამური მზადაა, ასეთი თხილამურით თოვლში, კაცი კანკს ქვევით არ იფლობა და სიარული უადვილდება.

სანადირო თხილამურებზე ერთი ლამაზი ლეგენდაა შემორჩენილი: უჩსოვარ დროს ერთი სანაქებო ვაჟკაცი მერებს დაუტყვევებიათ და დილეგში დაუმწყვდევიათ. ზამთარში დიდი თოვლი ჩამოუყრია. გზები, არათუ ზეკარებზე, თვით მეზობლებს შორისაც გადაკეტილა. ტყვის პატრონს უფიქრია — ახლა მანც ვერსად გაიქცევაო და ტყვე დილეგიდან გამოუშვია. ტყვეს მოწყალეებისათვის მადლობა მოუხსენებია და პატრონს საოჯახო საქმიანობაში მიხმარებია. მაგრამ მარტო სინათლეზე ყოფნა არ აკმაყოფილებდა ტყვეს. მას ვული საშობლოსაც მთუწევდა, თავისიანები ენატრებოდა და სულ იმას ფიქრობდა, როგორ დაეღწია ტყვეობისათვის თავი. ბოლოს მოიფიქრა: თხილის ნედლი წნელები აიღო და პატრონის ბავშვებისათვის ვითომ სათამაშოების გაკეთებას შეუდგა. წნელები ალზე გარუჯა, დაარბილა და ფართო რგოლები შეკრა. მერე რგოლები თასმებითა და ბაწრებით გამოხლართა, ფეხებზე მოირგო და ბავშვებს უთხრა: ახლა გაჩვენებთ, როგორ უნდა ითამაშოთო. ტყვემ ფეხზე ძირგებული თხილამურებით თოვლში გაიარა და ნახა, რომ მუხლამდისაც არ იფლობდა. გაუხარდა, რომ მისი ვარაუდი გამართლდა და დაუყოვნებლივ საშობლოსაცენ გაუდგა გზას. მდივარი ვეღარ დაეღევა გაქცეულ ტყვეს. რადგან იღიდენა თოვლში შეუძლებელი იყო უთხილამუროდ სიარული.

ასე გამოიგონა თხილამური ტყვეობაში ჩაყარდნილმა ადამიან-
მა და ასე დააღწია თავი ტყვეობას მისი წყალობით.

მონადირეთა ჯგუფი ერთი დღის თუ ორდღისა ხანის შემდეგ მი-
აღწევს საჩინვე მთის ძირამდე. აქ საგანგებოდ გაკეთებულ კარვებ-
ში ლამის გასათევად რჩებიან და მკვრივ დღისათვის სანადიროდ
გმზადდებიან.

ზამთარში ჩიხები სალ კლდეებში არიან შეხიზნულნი. იქ თოვ-
ლი ფეხს ვერ იკიდებს და ჯიხეები კლდის ხავსით და მღიერი თოვ-
ლებიან. უთენია მონადირეთა ჯგუფი ორად იყოფა. პირველ ჯგუფს
მუხლმაგარი და უფრო გამოცდილი მონადირეები შეადგენენ. ისინი
საჩინვე კლდეებს თავსე უნდა მოექცენენ, აქ გამავალი ქაშნები
დაიკაეონ, ჩაუსაფრდნენ და ჯიხეების გამოჩენას დაელოდონ.

მეორე ჯგუფის ამოცანა შედარებით მარტივია. ისინი მიდიან
მთის ძირებში და მხოლოდ ცოტაზე აჰყვებიან ფერდობს. როცა
შეატყობენ, რომ წინ წასულმა ამხანაგებმა დანიშნულ ადგილს მია-
ღწიეს, ასტეხენ თოვლის სროლას და ხმაურს. ეს ხმაური აფრთხობს
კლდეებში შეხიზნულ ჯიხეებს; ისინი თავის საშველად ან ერთად
გარბიან ან სხვადასხვა მიმართულებით. დამფრთხალ ნადირს ქაშ-
ნებზე ჩასაფრებული მონადირეები უხვდებიან და ზოცავენ. ვინც
არ უნდა მოკლას, ნანადირევის ზორცი ყველას თანაბრად ეკუთვნის.
მკვლელს ზედმეტად მხოლოდ ჯიხის თავი და რქები მიაქვს.

საზობარში გართულმა შეუმჩნეველად გავიარეთ საკმაოდ დიდი
ზანძილი. მალე მდინარეთა შესაყარს ვუწიეთ. აქ ერთდება ორი
მდინარე და მათი ხეობებიც. უებზევით წაწვეტებული ნახევარკუნ-
ძული თანდათანობით ფართოვდება და მის შუაში ქედი იწყება, რო-
მელიც ფიჭვნარ-ნაძვნართაა დაფარული.

ორი მდინარიდან, რომლებიც აქ ერთდებიან, ერთი ცენისწყა-
ლია, ხოლო მეორე — ხიდრულა. ისინი ცუფს ძმებს ჰგვანან სიდიდი-
თაოც და ფერითაც. ახლაც ორივე თანაბრად მღვრიე მოედინება.
თანაბრად ლამაზია ცენისწყალისა და ხიდრულას ხეობებიც. დღემ-
დე მხოლოდ ხიდრულას ხეობას ვიცნობდი. ცენისწყლის ხეობა-
ში კი წყალშესაყარს ზევით არ ავყოლივარ.

მდინარე ხიდრულას სათავეებიან, ფასის მთის, შავების და
ხუდანის ძირს გაშლილია ლაფურის ფართო და ლამაზი მინდვრები.
სახელწოდება „ლაფური“ სიტყვა ფური-დან წარმოსდგება და. სა-

ფურე შიდამოებს ნიშნავს. იქაური მთების მდიდარი სათიბ-საძოვრები, ჩანს, ძველთაგანვე მეწველი ნახირის საკვებად გამოიყენებოდა. ყველაზე ფართო მინდორს მათ შორის დედოფლის მინდორი ჰქვია. ლაფურში ძველად სოფლები ყოფილა. ამას ქართული ეკლესიის ნანგრევებისა და ნასოფლარების გარდა, ისტორიული ცნობებიც ადასტურებს. მეთხუთმეტე საუკუნის დასასრულს სვანეთმა სისხლის საზღაური („წორი“) გადაუხადა რაჭის თავად ჭაფარიძეს. გადასახადის სიაში სხვათა შორის აღნიშნულია ლაფურის სოფელიც თავისი ეკლესიებით. ნასისხლო საქმის წიგნში შემდეგს ვითხულობთ:

„... ამას გარეთ მოგეცით ოსეთის პირად მთიულეთს ხიდურას ოცი გლეხი, ერთი კარგი ციხე, ორი მონასტერი: ერთი დიდი გუმბათიანი მთავარანგელოზთ მონასტერი ორით დიდით ოქროს ხატითა, ოცდათვრამეტითა სხუა დიდით ხატითა, თორშეტი ოქროისა და ვერცხლის კანდლითა, მისით სამონასტრო წიგნებითა, — დიდით გულანითა, ითხთავითა, სამოციქულოითა, საწინასწარმეტყველოითა, მარხუანითა, მეტაფრასითა, დავითნითა, დავითის თარგმანითა, ენჭეროსნით, წინამძღურითა; მეორე წმინდის გიორგის დიდი სიონის მონასტერი, ოცდათორმეტით ჯუარ-ხატითა და რაც სამონასტრო წიგნი არს მით სრულიად გათავებულნი, და საბატონო დეკანოზი; წინამძღუარს ოცი კუამლი კაცი და დეკანოზს რვა კუამლი კაცი.

ამის გარეთ იქივე ხიდურას ერთი აზნაური-შვილი სოსაგიძე მისითა ციხითა, თორმეტი კუამლი კაცითა“.

ამ ცნობიდან ჩანს, რომ მდინარე ხიდურას პირას ლაფურში წინათ სოფლები ყოფილა თავისი მონასტრებით. მონასტრებს ჰევრი ჰქონიათ მოქრული და მოვერცხლილი ჯვარ-ხატები, საეკლესიო წიგნები, მათ შორის ოთხთავის თარგმანები.

სახლების ნაშთები დღეს მინდორში ამობურცული ადვილების სახითაა დარჩენილი. დროთა განმავლობაში მათ მიწა გადაფარვია და ზედ ბალახს მოუკიდებია ფეხი. ახლა ამ მინდვრებში საკოლმეურნეო ნახირი სძოვს.

სამანქანო გზა ცენისწყლის ხეობას მიჰყვება. ხიდურის ხეობაში ლაფურისკენ მხოლოდ საურმე გზა მიდის; მთელ გზაზე უდაბური ტყეა. ჩვენი მარშრუტის სქემაში ხიდურის ხეობა და

ლაფური განხეა დარჩენილი. ამიტომ ლაფურის სამარხილე გზას გვერდზე ვტოვებთ და ანლა ცენისწყლის ხეობაში განვაგრძობთ სვლას. შარაგზა ცენისწყლის მარჯვენა მხარეს მიემართება, უმეტესად სალ კლდეებზეა გაყვანილი და მდინარეს დიდზე არსად სცილდება.

ცენისწყლის ხეობაც მთლიანად ტყითაა შემოსილი, მაგრამ ალაგ-ალაგ მაინც გვხვდება ბუჩქოვანი და ბალახოვანი ადგილები. ბუჩქებში მაცვალი და ყოლო ჭარბობს. ყოლო დამწიფებულა და ხშირად თვალი გვრჩება წითლად აფერადებულ ფერდობებზე. ზოგან გზიდან გადავდივართ და პირს ვიკტებარუნებთ.

გზადაგზა შეუმჩნევლად იცვლება ბუნების სურათი. პირველი რაც ყველაზე ცხადად ვიგრძენით, ეს იყო ყოლოს გამოლევა. ბარდები კი გვხვდება, მაგრამ ნაყოფი დაუმწიფებელია. უკვე მზეც დასავლეთისაკენ გადაიხარა და სიგრილემ იმატა. გზა ისევ ცენისწყლის პირს მიჰყვება, მაგრამ ფაქტიურად უკვე ტყის ზედა ზოლში ვართ. გზიდან სულ ახლოს ჩანს სუბალპები და ალპები. იქა-აქ ნახირიც სძოვს. რომელიღაც ჩვენმა თანამგზავრთაგანმა ფერდობზე სირბილით მიმეგალ დათვის მოპკრა თვალი და ყველა იქით მიგვახედა. ხტუნვა-ხტუნვით მირბოდა ნადირი. იქვე შორიახლოს ნახირი ჩანდა და ალბათ სუნი თუ იზიდავდა. ჯერ განზე გარბოდა დათვი, შემდეგ ქვევით დაუხვია და ტყეს შეერია. ჩანს, ნახირზე თავდასხმა არც ისე ადვილად მოეჩვენა, თანაც იმ მხრიდან მწყემსების ხმაურიც მოდიოდა. ძია გიგომ თოფი ინატრა;— ამ დათვის მოკვლა სულ ადვილი საქმეაო,-- თქვა მან. თან ჩიოდა, დათვის დიდი ზიანის მოტანა შეუძლიაო.

— ნახირს ემტერება, — ამბობდა ის, — ამიტომ სულ იქით იწევს, სადაც ნახირი სძოვს ხოლმე. ზაფხულში მთაშია, შემოდგომით კი, ნახირს სახლში რომ ჩამოვდენით, დათვიც ქვევით იწევს და სიმინდის ყანებს დაერევა. თვენახევარი ან ორი თვე უნდა უყარაულოს კაცმა ყანას. ეს კი არც ისე ადვილი საქმეა. ყოველ ნაკვეთს ცალკე ყარაული სჭირდება. თუ ყანა დიდია, მაშინ მის ყოველ კუთხეში საყარაულო კარვების დადგმა კვინდება. მთელი ღამე უნდა იფხიზლოს ადამიანმა. კარაუმი ცეცხლი არ უნდა ჩაქრეს, თორემ დათვი სწორედ მაშინ შემოიპარება და რამდენიმე წუთში მთელ საინდუგათელავს. ჭამით ხომ ბევრს ჭამს კვინტ ტაროებს, მაგრამ გაუქმე-

ბით უფრო მეტს აფუჭებს. დათვის გათელილი ყანა აღარაფრად ვარგა.


ლამაზად ყვება ძია გიგო ყველაფერ ამას და ჩვენ გულისყურით ვუხსმენთ, თუმცა მისი მონაყოლი ჩემთვის ახალი ამბავი არ არის. ასეთი რამ არათუ გამიგონია, თვითონაც მრავალი ღამე გამითევია კარავში.

დათვისაგან სიმინდის დაცვა და საამისოდ მომზადება არცთუ ისე უხალისო საქმეა. ყოველ შემთხვევაში მე და ჩემი სიყრბის ზეგობარი შალვა სიმინდის დაცვის დაწყებას ყოველ წელიწადს ხალისით მოველოდით. როგორც კი ტაროები უღვაშებს დაისხამდნენ, მე და შალვა ბრიგადირს შევეუთანხმდებოდით და სოფლიდან ყველაზე დაშორებული სიმინდის ყანებისაკენ კარვებს და სადგმელად წავიდოდით. ორი ან სამი დღის მუშაობის შემდეგ ორი კარავი მზად გვქონდა. ამის შემდეგ გაივლიდა ერთი კვირა და კარავში ღამისთვის დროც დგებოდა.

სიმინდის მცველის მარჯვენა ხელია კარგი ძალდი. კარგი ძალის პატრონს შეუძლია ღამის ნაწილი მაინც მშვიდად იძინოს. ძალი დათვის მოახლოებას გებულობს და ყეფას სტეხს. თუ თამამი დაუპატიჟებელ სტუმარს კიდევ მივარდება და ყანიდან გააგდებს. ცხადია, ძალის ყეფაზე მცველიც იღვიძებს, დათვის შესაშინებლად ცეცხლს აღვივებს და ყვირილს იწყებს.

ყანის მცველს განსაკუთრებით ტკბილად გაახსენდება დილა. პირველი, რაც ამ დროს იგრძნობა, ეს არის ანცი სიო. თქვენ გესმით ირგვლივ ამტყდარი ფოთლების შარიშური. განსაკუთრებით ხმამაღლა ხმაურობენ კარვის კედლებზე შემხმარი ფოთლები. საბნის ქვეშ თბილად წევხართ, მაგრამ როგორც კი იქიდან გამოძვრებით, მაშინვე ურჯოლა აგიტანთ. დილის სიოს სიგრილე მოაქვს. თუ ცეცხლი მთლიანად არ ჩამქრალა, მაშინ შეშას დაამატებთ და ვაღვივებთ. მაგრამ თუ დიდხანს გეძინათ და ცეცხლს არათუ ფერფლი გადაეფარა, არამედ ჩაქრა კიდევ, მაშინ ხელასლა დანთებას ნუ შეუდგებით: სჯობს მაშინვე წამოხტეთ და ყანის პირას ირბინოთ, რა გინდ მოთენთილი არ იყოთ ძილნაკლულობისაგან, სირბილი და სუფთა ჰაერი მალე კარგ ხასიათზე დაგაყენებთ, თავს ჩიტივიო იგრძნობთ.

ბუნება და მისი მრავალფეროვანი სურათება სიმინდის მცვე-



სიმინდის გასახშობი ნაღია

ლისთვის ჩვეულებრივი სანახაობანია. მაგრამ დილას მაინც სულ სხვაა ყველაფერი. აი, იწყება ალიონი, მთელი ღამის ღვიძილის შემდეგ ამ ალიონზე ძალსაც ჩასძინებია. მხოლოდ ანცი სიო ხმაურობს. შემდეგ სინათლე თანდათანობით მატულობს. ღამის ბინდი ქურდულად მიიპარება ტყის სიღრმეში. ჰიკჰიკსა და გალობას იწყებენ ფრინველები. აღმოსავლეთით მთის თავზე ღრუბლები თანდათანობით წითლდებიან. იღვიძებენ კარვების ბინადარნიც და ერთმანეთს მაღალი ხმით გასძახიან. ხმაურზე ძაღლებიც წამოიშლებიან და ყანებში ბილიკებზე დარბიან. თუ თვითონ არ გყავს ძაღლი, დილით სხვისი ძაღლი მაინც მოგაკითხავს. მალე მზის სხივები მთათა წვერებს ააელვარებენ. შენც კარავს ტოვებ და შინისაკენ მიემართები. ნამიან ბალახზე ფეხები და შარვლის ქვედა კიდეება გისველდება, მაგრამ ეს არაფერი, გამოცდილი გაქვს, რომ დილის ნამით ფეხების დასველება ჯანმრთელობისათვის საზიანო არ არის. ჩქარი ნაბიჯით მიდიხარ ყანაში. ყანის პოლოს, ბალიკოა შესაყარზე, ამხანაგი გელოდება, ან შენ უნდა მოუცადო შეგვიანებულს. შემდეგ ამხანაგებთან ერთად ბაასით განაგრძობ გზას. გზაზე სადღე ჰდინარეც შეგხვდებათ და ხელ-პირს დაიბანთ. ცივი წყალი მოდუნებულობის ნატამალსაც აქრობს და სოფელში ხალისიანად შედიხართ. როგორ გინდოდათ უფრო ადრე მოსულიყავით, მაგრამ მზემ მაინც დაგასწროთ. სოფელი დილის მზის სხივებშია გახვეული. მაგონდებოდა ეს სურათები და მეტი ხალისით მივიწევდი წინ.

აი, ზესხურასაც ვუწიეთ. აქ უერთდება ცენისწყალს ჰდინარე ზესხურა, ამ ხეობაში მდებარეობს სოფელი ზესხო. კოლმეურნეთა ძირითადი საქმიანობა მესაქონლეობაა. უხვად მოჰყავთ კარტოფილი და ქერი. ორიოდ ათეული წლის წინ ამ ადგილას მხოლოდ ნასოფლარი იყო. ეამმა თუ შემოსეულმა მტერმა ძველი ზესხოს მუხროვრებნი მოსრა და იქაურობა გავერანდა. ახლა იქ ისევე სოფელია და ცხოვრება ჩქეფს. თვითონ წყალშესაერთთან რამდენიმე ახალი ტიპის სახლი დგას. ირგვლივ ქერი და კარტოფილი თესია. საძოვარ ფერდობებს ნახირი შესევია.



ამ მთებში იბადება მდინარე კენისწყალი.

დღეს უკვე კარგა ბლომად ვიარეთ, მაგრამ დაღლას არავის უჩივის. სუფთა ჰაერი, ლამაზი ბუნება და შეახინძნავი განწყობილება დაღლილობას გვაეიწყებს, გზას ბეჭითად განვაგრძობთ, რადაც არ უნდა დაგვიჯდეს, შებინდებამდე ყორულდაში უნდა ავიდეთ.

* * *

ყორულდაში მართლაც შებინდებამდე ავედით. ნათელი საღამო იყო. მუშათა უბანში სიცოცხლე დუღდა. საერთო საცხოვრებელთა ეზოებში ბავშვები დარბოდნენ და თამაშობდნენ. აქა-იქ მუშები შეჩვეუბულიყვნენ და ღარბაისლურად ბაასობდნენ. ზოგიც სიამოვნებით ადევნებდა თვალყურს ბავშვების მხიარულ თამაშს. ზევიდან ანალგაზრდების სიმღერის ხმა მოდიოდა.

ამ ადგილის სახელწოდება „ყორილდაში“ ანუ „ყორულდაში“ სვანურ სიტყვა „ყორ“—იდან წარმოსდგება, რაც თავისთავად „კარს“ ნიშნავს, ყორულდაში კი — კარის მიდამოებს. წურუნგალას მარცხნივ მოყავისფრო კლდეებია ამართული. ერთ ადგილას ამ კლდიდან წამოზრდილი ორი დიდი ქიმი კარის მსგავს სივრცეს ფარგლავს. ძველთაგანვე ამ ადგილს ნადირობის ქალღმერთ დალის კარი ეწოდებოდა. ხალხის წარმოდგენით ნადირობის ქალღმერთი ყოველ დილას ამ კარით გადმოხედავდა ქვევით ცენისწყლის ქალებს. ამ კარიდანვე ადევნებდა ის თვალყურს მახლობელ მიდამოებში საძოვრად გასულ ჯიხვთა ჯოგებს. სწორედ ამ კართანაა დაკავშირებული ყორულდაშის სახელწოდებაც.

ყორულდაში მემალაროელთა უბანია. მალაროები წურუნგალას და აილამას შუამკერდზე იწყება. წურუნგალა 4.222 მეტრის სიმაღლის მწვერვალია, ხოლო აილამა 4.523 მეტრისა. ისე რომ, ამ მალაროებში მუშებად მხოლოდ გულმაგარი და კუნთმაგარი ვაჟკაცები გამოდგებიან. სწორედ ასეთები არიან ყორულდაშელი მემალაროენი.

დიდებული სანახავია წურუნგალას და აილამას მწვერვალები დარიან საღამოს. მზარგანიერ ტყუბ ქმებივით ღვანან ერთად. ერომანეთისაგან ლამაზი უნაგირი ჰყოფს. ამ უნაგირიდან ქვევით დიდი მყინვარი ეშვება. მყინვარის ძირში ცენისწყლის მთავარი ტოტის სათავე ჩანს. დანარჩენი, უფრო წვრილი ტოტებიც მყინვართა ძირე-

ბიდან მოედინებიან. აქ იბადება ცენისწყალი! აქ მთავრდება ცენის-
წყლის ლამაზი და ტყემრავალი ხეობა. ყორულდაშიდან ხეაღ-
დილას ლასდილზე გადავლით ფნგურის ხეობაში გადავალთ, ვნახავთ
ფნგურის სათავეებსაც. მაგრამ ეს ხეალ იქნება. ახლა კი ჩვენი პირ-
ველი საზრუნავი ღამის გასათევი ბინის შოვნაა.

დასახლების თავში ავედით. იქ ერთი განცალკევებული
ზის სახლი დგას, საშუალო ზომისა, ორსართულიანი. ეს, ასე ვთქვათ,
ყორულდაშის მთავარი სასტუმროს ფილიალია, რომელსაც, ჩვეუ-
ლებრივად, ჩვენისთანა სტუმრებისთვის იყენებენ. ბინა მოგვეწონა.
დიდ ოთახში სწორედ ცხრა საწოლი იდგა რბილი ლოგინებით,
ხელუხლებელი თეთრეულით. ბარგი დავალაგეთ და ტანისამოსი
გამოვიცვალეთ. ქალები ვახშმის სამზადისს შეუდგნენ. ვაუკაცებმა
ტაგნებს დაეტაცეთ ხელი და წყლის მოსატანად ღელეზე გავაქეციეთ.

უკვე ბინდი იწვა. ყორულდაშის დასახლებული უბნის ცენ-
ტრში მოედნის მსგავსი თავისუფალი ადგილია. აქ ახალგაზრდებს
მოეყარათ თავი. ღამის ბინდს ელექტრონის შუქი ფანტავდა. შოედ-
ნის შუაში ცეკვა-თამაში გაემართათ. ხალხის უმეტესი ნაწილიც აქ
შეყრილიყო. განაპირა ადგილებში კი პატარ-პატარა ჭკუფები
იდგნენ. ზოგი ოხუნჯობდა, ხოლო ზოგსაც საქმიანი საუბარი გაე-
მართა.

წყალი მოვიტანეთ და მალე ქალიშვილები სუფიის გამლას
შეუდგნენ. მაგიდად ვრძელი სკამი გამოვიყენეთ და სუფრა ვავშა-
ლეთ.

ის იყო სუფრა ავალაგეთ და ჩვენი ოთახის კარიც ტაილო.
ზღურბლზე შუაჩინს კაცი შემოდგა. როცა დაგვინახა, პირველად
შეცბა, მაგრამ მინც არ დაიბნა. მოგვესალმა და ოთახში შემოიბი-
ჯა. ჩვენც მივიპატიეთ, სკამი მივართეთ. თურქე ცოლ-შვილით
ამავე სახლის ზედა სართულში ცხოვრობს. საქუზოდან ბრუსდე-
ბოდა, აზაური შექოესმა და იუაქრა „ტურისტები რქებიან, ეკვიბის
ჩემი მხრიდანაც იყოს ვინმეო“. ფრონყის ოლქიდან ყოფილა.
შესამე წელიწადია ყორულდაშში მუშაობს. ამჟამად ბულდოზერზეა
და სამანქანო გზას წმენდს. ცენიდან ყორულდაშისკენ შუაგზაზე
ის ბულდოზერი ჩვენც შევნიშნეთ. საავტომობილო გზიდან დაცილე-
ბულ მოკლე ბილიკზე მივდიოდით და იქიდან დავინახეთ.

ვასილი ყორულდაშში თავს მასპინძლად გრძნობს. ხომ არაფერი

გქირდებათო, შზადაა დაცეეხბარ.ოს. შეძდეგ სულმეორედ იხდის ბოდიშს, რომ შეგვაწუხა (ცხადია, ჩვენ მას არ შევეუწუხებთ), რწვიდ ძილს გვისურვებს და შიღის.

დაღლილობას და ძილს მალე თავისი გააქვს. ყველა ლოგინებში ვეხვევით. ხვალ დილაადრიან გზა უნდა განვაგრძოთ.

ლასდიღის ზეპარზე

ნისლი თიქრია მთებისა,
იმათ კაცობის გვიღვინი.

ვ ა შ ა

დილას ყველაზე გვიან მე გამომეღვიძა. აივანზე უკვე საუზმის სამზადისი გაეჩაღებინათ. ყორულღაშის სქელი ნისლი დასწოლოდა. აშსანაგები ამინდით უკმაყოფილონი იყვნენ. მე კი ნისლის დანახვა მესიამოვნა და ხელ-პირის დასაბანად ცენისწყალზე წავედი.

ნისლის სქელ საბანქვეშ მოთქრიალებდა აქაფებული ცენისწყალი. წყალი ყინულივით ცივი, ანკარა და გემრიელი იყო. პირისბანა ჯერ არ დამემთავრებინა, როცა ნისლმა შეთხელება იწყო და პალე შიგ ახლადამოსული მზის სხივებმაც გამოატანეს. მწვერვალებიც გამოჩნდნენ. მყინვარებიდან მზის სხივები ლურჯად ირეკლებოდნენ და ტენით გაქლენთილ ჰაერში ათასფრად ტყდებოდნენ. ამბანაგები ჩვენი სასტუმროს ეზოში დამხვდნენ. ყველას ფოტოაპარატო მოემარჯვებინა და ღრუბლებიდან ახლად გამოჩენილ მწვერვალებს იღებდნენ. ვისაუზმეთ, ავიბარგეთ და გზას გავეუღვიქით ლასდიღის ზეპარისაკენ.

ყორულღაშიდან უშგულში გადასავლელ მთას ადგილობრივად „ლასდიღის ზაგარს“ ეძახიან. ლიტერატურაში კი ხშირად მას „ლასდიღი უღელტეხილის“ სახელით მოიხსენიებენ. საქმე იმაშია, რომ სვანური სიტყვა „ზაგარი“ ანუ „ზეგარი“ თავისთავად უღელტეხილს, გადასასვლელს ნიშნავს. ყველა გადასასვლელს, ეს იქნება ჯვარის, ლასდიღის თუ სხვა, ადგილობრივად „ზაგარს“ უწოდებენ. ამდენად ლასდიღის ზაგარი თავისთავად ნიშნავს ლასდიღის უღელტეხილს.

თვით სიტყვა „ზაგარი“ ანუ „ზეგარი“, ჩანს, ქართულ სიტყვა

„ზეკარი“-დან მომდინარეობს, უღელტეხილის ნამდვილი ქართული სახელი ზეკარი უნდა იყოს. ამაზე სხვათა შორის მიუთითებს ისიც, რომ სამხრეთ საქართველოში რამდენიმე გადასასვლელს დღესაც ზეკარი ჰქვია. სიტყვა უღელტეხილი შემდეგში ხელოვნურად შექმნილი და ლიტერატურაში შემოტანილი სიტყვა ჩანს რუსული „перевал“-ის შესატყვისად. შემდეგში ეს ხელოვნურად შექმნილი სიტყვა ეტყობა ისე გავრცელდა, რომ „ზეკარი“ თითქმის დავიწყებას მიეცა. „ზაგარი“ ანუ „ზეგაი“ რომ ქართულა სიტყვიდან „ზეკარიდან“ მომდინარეობს, რაც თავისთავად შემდეგში ხელოვნურად შექმნილი ტერმინის „უღელტეხილის“ ნამდვილი ქართული შესატყვისი უნდა იყოს, ეს იქიდანაც ჩანს, რომ „უღელტეხილს“ სვასურად „თახალსა,“ უწოდებენ. როგორც ჩანს, სიტყვა „თანალ“ ლტრო ძველი და ნამდვილი სევანურია, ხოლო „ზეგარი“ ანუ „ზაგარი“ „თანალის“ სინონიმად შემდეგში გაჩნდა ქართული სიტყვა „ზეკარიდან“.

ისეა თუ ასეა, მე ასე ვუხსნი ჩემს ამხანაგებს, როცა ისინი „ლასდილ ზაგარის“ მნიშვნელობით ინტერესდებიან. იქნებ ეს უხეში შეცდომაა, მაგრამ ტურისტის ფანტაზიას ბევრი რამ ეპატიება.

ლასდილის ზეკარზე არც ერთ ჩვენთაგანს არ ევლო, მაგრამ გზის აცდენის მაინც არ გვეშინოდა. სხვა თუ არაფერი, სამანქანო გზას დაადგები და ისე ჩახვალ უშგულში. მაგრამ სამანქანო გზა ორ-სამჯერ გრძელია საცალფეხო გზაზე და ამიტომ ჩვენ ისევ ბილიკ-ბილიკ სიარული გადავწყვეტიეთ. ყორულდამიდან პირველად მაინც სამანქანო გზით უნდა გვევლო, რადგან ის ამ ადგილებში ძველ ნაბილიკარს მიჰყვება. ყორულდაში ნაცნობებმა გაკაფრთხილეს—ბილიკი ხშირად სამანქანო გზაზე გაგიყვანთო, მაგრამ საცაკი სამანქანო გზიდან გამავალი ბილიკი დაინახოთ, მაშინვე იქით გადაუხვიეთო, ჩვენ ეს რჩევა კარგად გვახსოვდა და ახლა სამანქანო გზით მიმავალნი ყურადღებით ვათვალიერებდით ბილიკზე ვადასახევე ადგილს.

ცამ თანდათანობით გახსნა შეკრული კუბლი. ღრუბელი გატყდა, დაიმსხვრა და ნაფლეთ-ნაფლეთ მიმოიფანტა იქით-აქეთ. წურუნგალას და აილამას მკერდი მზით გაბღლილდა. გამოჩნდნენ მარადი მყინვარები. თეთრი და ლურჯი ფერები ერთმანეთს ეკიბოებოდნენ მათ ზედაპირზე. მალე კი ისევ დახეტილობდნენ ღრუბელთა

პატარ-პატარა ფარები. ხან წურუნგალას შემოეხვეოდნენ ისინი და ხან აილაშას.

ცენისწყალი სადღაც დაბლა იყო. ჩამონახვავები ჯერ კიდევ არ გამდნარიყო და ისეთი შთაბეჭდილება რჩებოდა, თითქოს ცენისწყლის სათავე აილაშას ძირშივე იწყებოდა. უზარმაზარი ჩამონახვავის დაღრენილი პირიდან მოსჩქეფს ანკარა ტალღები.


შარაგზიდან გადასახვევი ბილიკიც მალე გამოჩნდა. ბილიკზე გადავედით თუ არა. ერთბაშად ყვაილების ზღვაში აღმოვჩნდით. ათასნაირი ფერია ერთმანეთში არეული. ბილიკი ხან სათიბების მალალ ბალახებში და ყვაილებში შიდის, ხანაც სუბალპების მეჩხერ ტყეს შეერევა. ტყეში უმეტესად არყი და ცირცელი გვხვდება. ისინი ბილიკზე უმნიშვნელო ჩრდილს ატენენ, მაგრამ ეს ჩრდილიც დიდი რამაა, რადგან მზე თანდათანობით მალლა იწვეს და ამის გაშო ზურგჩანთა უფრო მძიმდება.

ორი საათის სიარულის შემდეგ აღმართი ერთბაშად გათავდა. ჯერ კიდევ ფერღზე მიმავალთ მოგვეჩვენა, რომ 150 — 200 მეტრის შემდეგ უკვე სერზე ვიქნებოდით. პირველად მეც; დავეთანხმე ამხანაგებს, რომ იქ სერი იყო, მაგრამ მაშინვე ერთმა ვარჯიშობამ დასაფიქრა: შეუძლებელია ლასდილის ზეკარი ალპების დონეს ვერ უწყედეს. ჩემი ექვი ამხანაგებს გავუზიარე, მაგრამ ზოგმა ჩემს ნათქვამს ყურიც არ ათხოვა, ხოლო ვინც მომისმინა, მათაც ჩემი „ბოტანიკოსობა“ სიცილად არ ეყოთ.

სიმართლე კი სულ მალე გაიჩვენა. ავივაკეთ თუ არა, ჩვენს წიხ გადაიშალა დიდი ტაფობი სათიბ-საძოვრებით. აქედან ხელმარცხნივ ფერღობი იწყებოდა და ზედ კლაკენით მიმავალი სამანქანო გზა გასდევდა.

მალე მოზრდილ ღელეს მივადექით. წყალი გვწყუროდა და შევისვენეთ. ანკარა ცივ წყალს ფინჯებიდან ყლუპობით ვსვამდით, რადგან წყალი ყინულივით ცივი იყო. და არც იყო გასაკვირი — ღელე, რომლის პირასაც ჩვენ ჩამოვსხედით, იქვე ჩვენს თვალწინ გამოდიოდა თოვლის ჩამონახვავის ქეეშიდან. მართალია, ჯერ კიდევ ზაფხულის ერთი თვე წინ იყო თავისი მცხუნვარე მზით, მაგრამ ჩანდა, თოვლის ჩამონახვავს მთლიანად ვერ გაადნობდა.

ხილზე გავედით თუ არა. მაშინვე მივხვდით, რომ მოკლე გზას ავცდით. სამანქანო გზით სიარული კი ჩვენ ხელს არ მოგვცემდა.



ქილა მთებში.

ამიტომ შევდევით. მე ბორცვზე ავირბინე და იქაურობა მოვათვა-
ლიერე. ჩემს წინ, ტაფობს იქით, ამართული იყო მაღალი და ლამაზი
მთა, რომლას ფერდობს მიხვეულ-მოხვეულად მიჰყვება სამანქაო
გზა. ქვევით ამ მთის ფერდობს ჩამოსდევს ქელი. სწორედ ამ ქელის
ხერხემალს მიჰყვება ზევით ის ბილიკი, რომელზეც ჩვენ უნდა
გვევლო. გადავწყვიტეთ ტაფობი ირიბად გადაგვექრა და ქელზე
მიმავალ ბილიკზე გადავსულიყავით.

ოღრო-ჩოღრო ტაფობში გზა არ იყო, მაგამ წინ მაინც ადვი-
ლად მივიწევდით. აქ ერთმა ახალმა მცენარემ მიიქცია ჩემი ამხანა-
გების ყურადღება. ეს იყო დიყი. ყველანი გავაფრთხილე, რომ
დიყის ფოთლებისა და ღეროსთვის წარამარა ხელი არ მოეკიდათ.
საქმე ისაა, რომ დიყის წვენი თუ სადმე მოგხვდათ, გარდა ხელის
გულისა, რამდენიმე ხნის შემდეგ ამ ადგილებზე ბებერები დაგა-
ჯდებოთ. ეს ბებერები წყლისმავგვარა სითხითაა გავსებული და
საკმაოდ მტკივნეული არიან. განსაკუთრებით ცუდია, თუ ბებერები
დასკდნენ, წყლული დიდხანს არ რჩება.

რაკი სიტყვა დიყის ავ თვისებებზე ჩამოვარდა, აქვე აღვნიშნავ
მის ცოტად თუ ბევრად კეთილ თვისებებსაც. მთის მცხოვრებნი
დიყის ერთ სახეს ხილად იყენებენ. დიყის წვნიან ღეროებს კანს
აცლიან და ნედლად ჰამენ. მე არასოდეს მიჭამია, მაგრამ სხვისაგან
ვამიგონია, რომ გემრიელია; თუმცა, როგორც ზემოთ ვთქვი, დიყის
ჰამის დროს დიდი სიფრთხილეა საჭირო.

ჩემი ამხანაგები გაფრთხილების შემდეგ ზედმეტად ერიდებიან
დიყს. დანახავენ თუ არა მის ფართოფოთლებიან ბუჩქს, მაშინვე
შორიდან უვლიან და უკვირთ, მე რომ თამამად გადავეშევი ხოლმე
დიყნარში. დიყი გემოთი ღუცსა ჰგავს. ღუცი კი პოპულარული
მცენარეა მთის ხალხში. ტაფობში ღუციც გვხვდება და მე მას თამა-
მად ვწყვეტ, ჩემს ამხანაგებს კი ღუცისაც ეშინიათ, რადგან მისი
ფოთლები გარეგნულად დიყის ფოთლებს ჰგავს.

ღუცს, როგორც ამბობენ, სამკურნალო თვისებებიც გააჩნია.
შემორჩენილია ასეთი თქმულება: ორი ამხანაგი წავიდა მთაში
სათიბად. დილას ადრე დაიწყეს მუშაობა. როცა მზემ დააცხუნა,
დაისვენეს, ბალახზე წამოწვნენ და ჩაეძინათ. გამოვლვიდა ერთ-
ერთ ამხანაგს და რას ხედავს, მძინარე ამხანაგს პირი ნახევრად
გაელო და შიგ გველი მიუძვრებოდა. ისე შეშინდა, ენა ჩაუვარდა

და ხელი ვერ გაანძრია. სანამ შიშს თავს დააღწევდა და გამოე-
რკვეოდა, გველიც მიიმალა მძინარის პირში. მძინარემ ცოტა ხნის
შემდეგ თავისით გაიღვიძა. მაშინვე მუცლის ტკივილებს დაუწყო
ჩივილი. ამხანაგმა იცოდა, რაშიც იყო საქმე, მაგრამ ხმას არ იღებდა,
არ უმხელდა. იმაზე ფიქრობდა, როგორ ეშველა ამხანაგისათვის.
ბოლოს მოაგონდა. საღამოსთვის შინ წამოსაღებად დუცი ჰქონდათ
შეგროვილი. მოდი, აბა ვინ მეტს შესჯამსო და თანაც ნიძლავე
დადო: თუ შენ მაჯობებ, ჩემი სანადირო თოფი დამითმია, მაგრამ,
თუ მე გაჯობე, შენი ქამარ-ხანჯალი ჩემი იყოსო. გველგადაყლა-
პულს ამხანაგის თოფი ძალიან მოსწონდა. დაიწყეს ჭამა. როცა
შეჯიბრის მოთავემ შეატყო, რომ უკვე საქმარისი იყო, დუცის
ჭამა შეწყვიტა და სანადირო წამიგიაო, აიღო და თავისი სანადირო
თოფი ამხანაგს გადაულოცა.

ცოტა ხნის შემდეგ გველგადაყლაპულს გულისრევა დაეწყო
და გველის ნაკუწ-ნაკუწად ქცეული სხეულიც თან ამოაყოლა.
როცა ავადმყოფმა ეს დაინახა, მიხვდა რაშიც იყო საქმე. თოფი
მაშინვე პატრონს დაუბრუნა და სიკვდილამდე მისი ერთგული და
მადლიერი დარჩა.

ცხადია, დუცს სინამდვილეში ასეთი სასწაულების მოხდენა
არ შეუძლია, მაგრამ თქმულებას მაინც რაღაც საფუძველი უნდა
ჰქონდეს. მუცლის ტკივილების დროს სოფელში ხშირად ურჩევნ
ხოლმე დუცის ჭამას. ჩანს, დუცი მონელების პროცესს ხელს
უწყობს. მთაში წასული ბავშვები რამდენსაც მეტს ვჭამდით
დუცს, იმდენად უფრო მოგვშივდებოდა ხოლმე. იქნებ ეს თვისე-
ბაა სწორედ ზემოთგადმოცემულ თქმულების შექმნის საფუ-
ძველი.

ასე იყო თუ ისე, დიყმა მეტისმეტად დააფრთხო ჩემი ამხა-
ნაგები.

მაგრამ მალე დიყზე უფრო სხვამ შეგვაწუხა. ეს იყო რომელი-
ღაც სახეობის ბუზი, ოთახის ბუზზე უფრო მოზრდილი და უფრო
მონაცრისფრო. ამ ბუზს ადგილობრივად ღეზოს ეძახიან. მისი
ნაკბენი ფრიად არასასიამოვნოა. გიკბენთ თუ არა, მაშინვე იწყება
მოუთმენელი ქავილი, კანი შეშუპდება და ჩნდება პატარა წყლუ-
ლი. საბედნიეროდ, ღეზოს ნაკბენი მალე ქრება, თორემ უშგულში
ყველა დაიარებულ-დაწყლულებული ჩავიდოდით.

ლასდილის ტაფობის გავლისას ლეზოები არ გვეშვებოდნენ. მათ მხოლოდ დეკიანებთან გაგვანებეს თავი.

ჩემმა ამხანაგებმა ლეზოც პირველად ნახეს. მე კი მას ბავშვობიდანვე ვიცნობდი. როცა ტოლებთან ერთად ნახირს ვმწყემსავდით, ბიჭები ერთმანეთს ვეჭიბრებოდით ხოლმე ლეზოების გაწყვეტაში, რადგან მზიან დღეებში ისინი მოსვენებას არ გვაძლევდნენ.

ტაფობის ამ მიმართულებით გავლა, რომელიც ჩვენ ავირჩიეთ, არც ისე ადვილი აღმოჩნდა. შორიდან იქაურობა სწორ მინდორს ჰგავდა, მაგრამ გზადაგზა მრავალი ხრამი და ოღრო-ჩოღრო შეგვხვდა. ხშირად მიმართულებაც გვეკარგებოდა. რამდენიმეჯერ დღეში შეტოპვაც მოგვიხდა და ბოლოს იმ ქედს მივადექით, რომელსაც ჩვენი ბილიკი ასდევდა. აღმართი ახლა უფრო დამრეცი და გრძელი აღმოჩნდა, ვიდრე ეს ლასდილამდე იყო. ამიტომ ჯერ კარგად შევისვენეთ და შემდეგ ამ აღმართს ნელი ნაბიჯით შევეუდექით.

ლასდილის ტაფობი და იმ ფერდობის ქვედა ნაწილი. რომელსაც ეს-ეს იყო გზას დავადექით. სუბალპების ზონაშია. აქ არცთუ ისე იშვიათია ხე-მცენარეები. მათში ქარბობს არყი, ცირცელი და კიდევ ერთი-ორი ხე-მცენარე. დაახლოებით ნახევარი საათისა თუ ორმოცი წუთის შემდეგ კი სუბალპებიდან ალპურ ზონაში გადავაბიჯეთ და დეკიანებში შევედით. ზოგს ვაჟას ლექსები მოაგონდა დეკის დანახვისას, ხოლო ზოგმაც მის ლამაზ ყვავილებს დაუწყო ძებნა, მაგრამ ამაოდ. დეკას უკვე გადაეყვავილებინა.

დეკიანებთან შევისვენეთ. ჩამოვსხედით. წურუნგალას და აილამასკენ მივიხედეთ. დღეს თვალი სულ ამ ლამაზ მწვერვალებზე გვრჩება. მათ წვერებზე ღრუბლები კიდევ უფრო შეთხლებულან. დეკიანებიდან სხვა ლამაზი მწვერვალებიც გამოჩნდა. აგერ აილამას აქეთ ნამყვამი. ის სიმაღლეში მეზობელს მხოლოდ ოდნავ ჩამორჩება. ნამყვამის სიმაღლე ზღვის დონიდან 4273 მეტრია. მისი ბუმბერაზული მკერდიც ხევებითაა დასერილი, რომლებშიც მარადი თოვლის ვეშაპისმაგვარი ზვავებია ჩამკვიდრებული. ნამყვამი სხვა მწვერვალებზე უფრო გულდიად შეგვხვდა. გზის გაგრძელებას ჯერ კიდევ არ ვაპირებდით, როცა ნამყვამის თავზე დაწოლილმა ღრუბლებმა უკან დაიხიეს და მთის გაღმა გაეკრნენ



დიუნარი

ცას. ამგვარად ნამყვამმა თითქოს გაგვიცინაო და თეთრი ქათქათა კბილები გამოაჩინა. ეს ღიმილი სახიდან. დიდხანს არ წარეცხია მას.

ალბური ზონა ყოველ ნაბიჯზე ახალ-ახალ სანახაობებს გვიშლის თვალწინ. „ალბური ხალიჩები“ — ასე უწოდებენ ბოტანიკოსები ამ ადგილებს და მართლაც რომ ხალიჩებივით მოუქარგავთ მრავალფეროვან ყვავილებს სათიბ-საძოვრები.

სჯობს ბოტანიკოსი დავიხმართ ამ დიდებული სანახაობის აღწერაში: „ბოტანიკური და ესთეტიკური თვალსაზრისით დასაყვლეთ კავკასიონის ალბური და სუბალბური მცენარეულობა იშვიათია თავისი მრავალფეროვნებითა და თვალწარმტაცობით. უზარმაზარი ფართობები დაფარულია მაღალი, ხასხასა მწვანე მცენარეულობით, რომელთა შორის ელვარებენ ნაირ-ნაირი ყვავილები: წითელი და თეთრი გვირილა, ოქროსფერი მზიურა, პირისფერი დვალურა, იისფერი წყალიკრფთა, ცისფერი დეზურები, ლიპირისფერყვავილება ბაბუაწვერა, ნაირყვავილება ნემსიწვერა, ვარსკვლავა, ჭყიმი და სხვა მრავალი. ოდნავი ქარის შემოქროლვაზე უსაზღვრო ზღვის ზედაპირით ქავლი გადაეცლება ხოლმე თავზე და ბზუის ფუტკარი, დაფარფატებენ პეპლები და ინთქება და ინთქება ადამიანი მაღალმთის ბრწყინვალებაში, მაცოცხლებელ პაერში, თვალუწვდენელ ცივ სივრცეში. მაგრამ საკმარისია დაუბრუნდე მიწას, გამოყენებითი თვალსაზრისით განსაზღვრული მოთხოვნილება წაუყენო ამ უსაზღვრო მდებარეობას, რომ ეს ლამაზად მოყვავილე მცენარეები უკან დაიხევენ და დაუწყებთ ძებნას წითელ სამყურას, ჭადარა სამყურას, ტიმოთელას, სათეს წივანას და სხვა ამგვარებს“ (ნ. კეცხოველი).

ბილიკი ქედს ჯერ ზევით მიჰყვება ზიგზაგურად, შემდეგ კი ორად იყოფა. ერთი ისევ ზევით მისდევს ქედს, ხოლო მეორე განზე უხვევს. გზის გასაყართან შევდევით და ვიმსჯელებთ, თუ საით უნდა წავსულიყავით. ბოლოს ყველამ განზე გადახვევა ვარჩიეთ. რადგან აშკარა იყო, რომ ეს ბილიკი მართლაც უღელტეხილისაყენ მიდიოდა და უფრო მოკლე ჩანდა. ერთი ეს მაფიქრებდა, რომ განზე მიმავალ ბილიკს ახალი ნაკვალევი არ აჩნდა და კარგა ხნის მიტოვებული გზის შთაბეჭდილებას სტოვებდა. ნახევარი საათის სიარულის შემდეგ ბილიკი ქაობიან ტაფობში შეგვიძღვა და

ნათელი გახდა, თუ რად ჰგავდა იგი მიტოვებულს. გზის მცოდნეებს, რომლებიც ლასდილ-ზაგარზე ფეხით გადადიან, ჩანს, არ ეხალისებათ ჰაობებში სიარული და ცოტა უფრო შორი გზით სიარულს არჩევენ.

რას ვიზამდით. უკან დაბრუნებას ისევ ჰაობებში სიარული ვარჩიეთ. თან იმის იმედიც გვქონდა, რომ ჰაობი მალე გათავდებოდა. ამ დროს ჩვენს ზემოთ 300—400 მეტრის დაშორებით ფერდობზე მიმავალი ცხენოსანი შევნიშნეთ.. ისიც უღელტეხილის მიმართულებით მიდიოდა. მივხვდით, რომ ცხენოსანი სწორ გზას ადგა და მალე ჩვენ ერთმანეთს შევხვდებოდით. ასეც მოხდა. ჩვენმა ბილიკმა ჰაობიან ტაფობის შემდეგ აიღმართა და მალე იმ ბილიკს შეუერთდა, რომლითაც ცხენოსანი მიდიოდა. ცხენოსანსაც დაუნახივართ, უფიქრია—ბარგს მაინც წაუღებო და დაგვლოდებია. ეს იყო უშგულელი ყმაწვილი კაცი ზურაბი.

ზურაბი 24-25 წლის ვაჟკაცია. მალალი და ბრგე. მან სამსახური მოკრძალებით შემოგვთავაზა. შემდეგაც ჩუმად მოდიოდა. მხოლოდ ჩვენ შეკითხვებზე გვპასუხობდა და ისიც მოკლედ.

— საით მიემგზავრებით?—ეს იყო ერთადერთი კითხვა, რომელიც მან მოგვცა. როცა ჩვენი მარშრუტი გავაცანი, გაეღიმა.

— მე შეგონა ალპინისტები იყავით,—თქვა ხმადაბლა,—ახლა ძალიან ბევრი ალპინისტი დადის აქ.

ბილიკთა შესაყარიდან, სადაც ზურაბს შევხვდით, უკვე უნაგირაც გამოჩნდა. დაახლოებით ნახევარი თუ ერთი კილომეტრი უნდა გავვევლო კიდეც იქამდე. ნახევარსა თუ ერთს იმიტომ ვამბობ, რომ მთებში მანძილის თვალთ გაზომვა არც ისე ადვილია. ზოგჯერ გგონია, აი აქ, სულ ახლოს არის ის ადგილი, სადაც თქვენ უნდა მიხვიდეთ, გზას გაუდგებით და საათობით ივლით, ვიდრე იქ მიხვალთ.

ქალიშვილები ტვირთის შემსუბუქების შემდეგ წინ გაიქრნენ, მე და საურმაგი კი ზურაბთან ერთად მივდივართ და ხანდახან კიდეც ვებმარებით, თუ ცხენის ზურგზე ტვირთი წონასწორობას დაკარგავს და ცალ მხარეს გადაიზნიქება. უცებ ცხენთან მდგომი საურმაგი შეხტა და მარჯვენა ხელის ნები გამეტებით დაირტყა მუხლის თავზე. მას მოკლე შარვალი ეცვა.

— რა იყო, საურმაგ? — ვკითხე მე, თუმცა დავინახეთ. რომ რომელიღაც ბუზმა გაამწარა.

— აი, ეს ლეზოა, თუ ეშმაკი! მეგონა თავი დავაღწიე და საიდანღაც კიდევ გამოტყვრა.

— ალბათ ცხენს მოჰყვებიან,—მოკლედ შენიშნა ზურაბმა. მართლაც და ზურაბის ცხენს მრავალი მწერი დასტრიალებდა თავს. მათ შორის ლეზოებიც იყვნენ. მწერები გუნდად მოჰყვებოდნენ ჩაქჩაქით მომავალ პირუტყვს და ხანდახან ჩვენთვისაც იცლიდნენ.

უნაგირაც გავიარეთ და დაღმა დავეშვიტ. პირიქით მხარეს არანაკლები სანახაობა გადაიშალა ჩვენს თვალწინ. ჭლარა მთები ისევ ჭარად მიჰყვებოდნენ ჰორიზონტს მარჯვენა მხრიდან. ირგვლივ კი გადაშლილიყო ალპური ხალიჩებით მოფენილი დამრეცი ფერდობები.

აღმართის შემდეგ დაღმართი პირველად ადვილად ეჩვენება მგზავრს, მაგრამ პირველი შთაბეჭდილება დიდხანს არ გრძელდება. ყველაზე ადრე მუხლები გრძნობენ დაღმართის სიმძიმეს. აქ მათ არამართო სხეულის სიმძიმეს უნდა გაუძლონ, უნდა შეასუსტონ ინერციის ძალაც. პირადად მე დაღმართი ნაკლებ მიყვარს და ხელმძღვანელს მალე შესვენება შევაჩვენე. წან მიმავალნი პირველსავე ხევთან გაჩერდნენ. ჩვენც მალე მივედით. ხევის ანკარა ცივი წყლით ხელ-პირი დავიბანეთ და ამჩანაგებს შევუერთდით, რომელთაც ლოდის ძირში მობიბინე ბალახზე უკვე სუფრის გაშლა მოესწროთ და ჩვენ გველოდებოდნენ.

ვისაუზმეთ, შევისვენეთ, ვისაუბრეთ, ვიმხიარულეთ და კვლავ გზას გავუდექით.

ახლა ჩვენ უმეტესად სამანქანო გზით მივდიოდით, მაგრამ ალპურ ზონაში სამანქანო გზით სიარული სრულებითაც არ არის მოსაწყენი. პირიქით, გრანდიოზული მთების ფონზე ავტომობილის გუგუნე ერთგვარად ამაღელვებელიც კია. ერთი ავტომობილი მიდის, მაგრამ ასე გგონიათ ათი ან ოცი იყოს. მთები! გამოძახილი ამრავლებს მის ხმას. მზერა ჭლარა მთებიდან შარაგზაზე გადმოგაქვთ და მანქანას ეძებთ. ის კი არსად ჩანს. იქნებ კიდევ მოჰკრათ თვალი სადმე გამოზიდულ ფერდობზე, მაგრამ მალე ისევ თვალს ეფარება და ისევ ყოველი მხრიდან გესმით მისი გუგუნე. ხშირად ასე



ორი ბუმბურაზი—წუწუნვალა და აილაძა

გგონიათ — მანქანა ქვევიდან მოდის, მაგრამ ცოტა ხანი და გაკვირვებული უკან იხედებით. ავტო უკანიდან გეწევით.

სწორედ ასე მოგვივიდა ჩვენც. გვეგონა მანქანის ხმა წინიდან გვიახლოვდებოდა და ერთბაშად უკნიდან კი დაგვკვივლა — გზა მომეცითო. მივიხედეთ და ხალხით სავსე სატვირთო ავტომობილი დავინახეთ. ყველა საზეიმოდ იყო გამოწყობილი და მღეროდა. წინ, კაბინის ზურგთან, თეთრ კაბაში გამოწყობილი ტანმაღალი ქალიშვილი და ლურჯ კოსტუმიანი ახოვანი ვაჟი იდგა. ვაჟს მკერდზე ველური ყვავილების კონა ჰქონდა მიმაგრებული, ქალს კი ყვავილები თმებს უმშვენებდა.

— მექორწილენი არიან. ყორულაშიდან მოდიან, — ღიმილით თქვა ზურაბმა. ამან უფრო დავგაინტერესა, შევდექით და დაუცადეთ. მანქანამ სვლას უკლო და ისე მოგვიახლოვდა. მექორწილენი ყოყინით მოგვესალმნენ. შოფერმა კაბინის კარი გააღო და გვთხოვა ჩვენც მანქანაზე ავსულიყავით.

— ამოდიო, ამოდიო, თქვენც მაყრები ხართ! — ხმამაღლა გვთხოვდნენ მექორწილენი. ჩვენ მადლობა გადავუხადეთ, მანქანაზე კი არ ავედით.

— აბა ეს როგორ იქნება, მანქანა აქაა და თქვენ ფეხით მიბრძანდებით! — გვეუბნება შეწუხებული შოფერი.

— არა, რატომ, ჩვენ სწორედ ფეხით სიარულის სურვილმა მოგვიყვანა ამ მთებში!

შოფერს ჩვენს პასუხზე ელიმება. ჩანს, კარგად ესმის ჩვენი ენთუზიაზმი, მაგრამ მაინც მხრებს იჩეჩავს და მანქანას ძრავს. მის გუგუნთან ერთად სიმღერაც იწყება.

„მოვდივართ, მოგვიხარია, მოგვეყავს დედალი ხოხობი!“ — წკრიალა ხმით გაიძახის მექორწილეებში ახალგაზრდა ვაჟი და მას მთელი მაყრიონი ასდევს. ასე მგონია, მათი ომანიანი სიმღერა შხარას მწვერვალებს სწვდება.

— რაშ უშგულში ქორწილი დაგეხვდება? — ვეუბნები ზურაბს.

— უშგულში არა. ქალი კალაში მიჰყავთ, ვაჟი კალელია.

— აბა ქორწილი ველარ გვინახავს. საინტერესო კი იყო, — გულდაწყვეტით ამბობენ ჩემი ამხანაგები.

— რატომ, ხვალ ხომ კალაში მიედივართ, ქორწილს მივეუსწრებთ, — ვეუბნები მათ და ზურაბიც მიდასტურებს.

ამ დროს თვალს მოფარებული მანქანა უკვე ჩვენსკენ მოქცეულ იქითა ფერდზე გავიდა და ხელახლა გამოჩნდა. მექორწილენი ისევ მღეროდნენ. მანქანაში ქალ-ვაჟს მხრების გაშლაც მოეხერხებინათ და ერთ ადგილზე ცეკვავდნენ. ქალს ხელში თეთრი ხელსახოცი ეჭირა და აფრიალებდა. თითქოს ამ სურათის დანახვამ გამახსენა, ზურაბს შევევკითხე — ქალი სადაურია-მეთქი.

— ლაშხელია.

— სად გაიციენს ერთმანეთი?

— ყორულდაშში.

— ალბათ იქ მუშაობენ.

— დიახ, ვაჟი ტექნიკოსია, ქალი კი ექიმი.

— ახლოს გცნობია.

— როგორ არა, ქორწილშიც ვარ დაპატიებულნი.

— აბა შენ უნდა იჩქარო!

— არა, საღამოს წავალთ უშგულელები.

აი თანამედროვე ქორწილი სვანეთში. კალელი ვაჟი და ლაშხელი ქალი, ერთი ტექნიკოსი და მეორე ექიმი. სამუშაოდ ყორულდაშში წავიდნენ ამ ორი თუ სამი წლის წინ. იქ ერთმანეთი გაიცნეს, შეუყვარდათ და შეუღლება გადაწყვიტეს. მშობლებს მათი გადაწყვეტილება მხოლოდ ამის შემდეგ აცნობეს. არც მშობლები გაჯანჯლებულან. ქალის მშობლებმა პირველად შეიძლება შუბლი შეიჭმუნნეს, რომ მათი ქალი ლაშხეთიდან კალაში თხოვდებოდა, მაგრამ შეურიგდნენ ამას და თანხმობა მისცეს. მალე ქორწილიც გადაუხადეს. გუშინ ლაშხეთში იქორწილეს, დღეს კი კალაში მიდიან, რომ იქ გააგრძელონ ლხინი. იფიქრებდა კი კალელი ვაჟაკი ამ ორმოცდაათიოდე წლის წინ, რომ ოდესმე მისი შთამომავალი ლაშხეთიდან ასე ადვილად წაიყვანდა საცოლეს? თუ ლაშხელი ქალის სიყვარული ჩაუვარდებოდა გულში, მეტი გზა არ იყო, უნდა მოეტაცა. ჰმ, მოეტაცა, ადვილად იტყვის ენა. რამდენი უბედურება სდევდა თან ამ საალაბედო ნაბიჯს. მაგრამ ყველაფერი ეს დრომ წარეცხა. დღეს კალელ ვაჟაკს თავისუფლად მიჰყავს ლაშხელი გოგონა, ისე. როგორც ლაშხელი წამოიყვანს კალელს, თუ კი იქ გულის სწორს იპოვნის.

გადახედეთ ძველ მოგზაურთა წერილებს, სადაც სვანეთში ქორწინების საკითხებსაც ეხებიან. მართალია, იქ ბევრი რამ გადა-

ქარბებულია. მაგრამ მისი მეათედიც რომ სიმართლედ ჩავთვალოთ, რაც იქ წერია, და შევადაროთ იმას, რაც დღეს ჩვენი თვალით ვნახეთ, ტანში საამო ურუანტელი დაგივლით.

მაყრიონით დატვირთული მანქანა საბოლოოდ ამოეფარა მწვანედ აბიზინებულ ბორცვებს, მაგრამ ომაზიანი მაყრული მაინც კარგა ხანს გვესმოდა. ჩვენც ბარაქიანი ნაბიჯით მივიწვევდით წინ. გვინდოდა მალე ჩავსულიყავით უშგულში. სხვა რომ არა იყოს რა, მზის სხივებმა უკვე გვაგრძნობინეს თავისი ძალა. სახე ყველას ატკრეცილი გვაქვს. ყველაზე მეტად ცხვირი გვეწვის. მხოლოდ ზურაბი მოდის უდარდელად. მის ჯანმრთელ გარუჯულ სახეს მზის სხივები ვერაფერს აკლებენ. არც სათვალეები უნდა. მზეს რომ თვალი გაუსწოროს, მხოლოდ წარბების ოდნავ ჩამოშვება და შუბლის შეკერა სკირდება. ამ დროს წარბებს შუამოზრდილი კოპები წამოაჯდება ხოლმე და ჯერ კიდევ ბავშვურ მიამიტ სახეს ერთბაშად მკაცრ გამომეტყველებას აძლევს. ჩვენი წუწუნი ზურაბს მხოლოდ ღიმილს ჰგვრის.

— კიდევ ბევრი დაგვრჩა უშგულამდე? — ეკითხებიან ზურაბს ქალიშვილები.

— არა, მალე ჩავალთ.

ჩვენც მივდივართ. მე და საურმაგი ზურაბის დატვირთულ ცხენს მივყავებით. გოგონები ჩვენს უკან მოდიან. ცხადად გვესმის მათი ფეხის ხმა. ხან რომელიმე მათგანი გზაზე დაგდებულ ქვას უნებურად ფენს წაჰკრავს და აჯორებულნი ქვა ინერციით ჩვენამდე აღწევს. მერი და ლეილა ჩვენზე წინ მიდიან და ჩვეულებრივად თავისთვის კურკურობენ.

— ერთი კვირით ადრე რომ ჩამოსულიყავით, უშგულში საინტერესო დღეობას დაესწრებოდით. მეუბნება ზურაბი.

— რომელს?

— უსხობას. შენ ალბათ იცი. მაგრამ სხვები დაინტერესდებოდნენ.

— არც მე გამიგია ამგვარი დღეობა.

— მართლა? — გაუკვირდა ზურაბს. მე გეგონია ეს ქვემოურეგშიც იციან.

— ჩანს, ჩემ დროს უკვე დავიწყებული იყო. მომიყევი, მაინც რა დღეობაა უსხობა.



„ნისლი ფიჭვია შთებისა“

— სამ წელიწადში ერთხელ ეწყობა უსხობა,—დინჯად იწყებს მოყოლას ზურაბი,—ზაფხულში. სამი წლით ადრე უშგულის ყოველი მოსახლე საუკეთესო ქედილას შეარჩევს და დაამწყვდევს. ქედილა თეთრი ფერის უნდა იყოს. მას საგანგებოდ კვებავენ და უვლიან. ოღონდ მზის სინათლეს არ ანახვებენ, გარეთ არ უშვებენ. სამი წლის შემდეგ, დღეობის წინაღღეს, უკვე გაზრდილ-გასუქებულ ვერძს დაბანენ და მეორე დილას ადრე იცლესიის ეზოში მოიყვანენ. ეკლესიის ეზოს გარს გალავანი არტყია. აქ გალავნიან ეზოში გროვდება ასამდე ვერძი. მანამდე დღის სინათლის უნახავებს მზის შუქი აგიყებს, დიდი ხნის განმავლობაში დაგროვილი ძალა მათში ერთბაშად იფეთქებს და იწყება ვერძების გაშმაგებული ქიდილი. ერთმანეთს შეარჩევენ და წყვილ-წყვილად იწყებენ ქიდაობას. გაისმის რქების ჯახუნი. ზოგიც ეშმაკურად იქცევა. მისკენ შურდულივით წამოსულ მოწინააღმდეგეს მოულოდნელად გვერდზე გადაუხტება. მოწინააღმდეგე თავს ვეღარ იკავებს და რქებით მიწას ხნავს. განაწყენებული ერთხელ გადაკოტრიალდება, შემდეგ წამოხტება და მტერს უფრო გაცხარებით უტევს. ამ დაუნდობელ ბრძოლაში წყვილიდან ერთი უფრო ადრე იღლება, ქანცი ელევა და ძირს ბრავგანით ეცემა. გამარჯვებული შეტრიალდება და ახალ მეტოქეს ეძებს. აი, მეორე ასეთი გამარჯვებულიც გამოჩნდება და ახლა ესენი ეჯახებიან ერთმანეთს. ასე გრძელდება მანამ, სანამ ყველა, ერთის გარდა, ძალის გამოღვევისაგან ძირს არ დეგარდება. ეს ერთი კი, ბრძოლის ველზე გამარჯვებული იწყებს კუნტრუმს. გახარებული პატრონი მას დაიჭერს და შინ მიჰყავს. სხვებიც ასე იქცევიან. ყველას თავისი ვერძი მიჰყავს. ვერძებს კლავენ და ამის შემდეგ იმართება დიდი ღრეობა.

შემდეგში გავიგეთ, რომ მსგავსი დღეობა ქვემოურებსაც სცოდნიათ, მაგრამ კარგა ხნის წინ დაიწყებას მისცემია. უშგულისაგან განსხვავებით ლაშხელები გასასუქებლად ვერძის ნაცვლად თურმე ბოჩოლას აიყვანდნენ. ეს ბოჩოლა ეკუთვნოდა სოფლის განსაზღვრულ უბანს. სოფელი კი რამდენიმე ასეთ უბნად იყოფოდა. დღეობის დროს უკვე დაზრდილ-დახარებულ ბოჩოლებს ანუ, როგორც აქ უწოდებენ, უსხებს დანიშნულ ადგილას მიიყვანდნენ და ერთმანეთს დააჭიდებდნენ. შემდეგ კა

ყველაფერი ისე ხდებოდა, როგორც უშგულში. როგორც ჩანს, წინათ ეს დღეობა არა მარტო საქართველოს მთაში, არამედ ბარშიც სცოდნიათ. ამას ადასტურებს სიტყვა „უსხის“ საბასეულად განმარტებაც. თავის სიტყვის კონაში საბა ბრძანებს: „უსხი—ზრონა საკლავი მსუქანი“.

ყველაფერს ამას ჩვენ უშგულამდე ვგებულობთ. ტურისტთათვის ესეც საკმარისია. მალე გამოჩნდა უშგულის მისადგომებოდა ამ მისადგომებთან ორი შენობა: ერთი მარჯვენა მხარეს, ხოლო მეორე მარცხენა მხარეს. შორიდანაც კარგად ირჩეოდა, რომ მარჯვნივ ეკლესია იდგა, ხოლო მარცხნივ — შუბისტრად ჩადგმულ გორაზე, ძველთაძველი ციხე.

უ შ გ უ ლ ი

არც არავის ვმა ვყოფილვარ,
არც არავინ ვმად მყოლია;
ძველი პური, ძველი ლეინო
წლიდან წლამდე გამყოლია.

ხ ა ლ ხ უ რ ი

ისინი, ვინც პირველად აქ მოვიდნენ და ალპური ზონის მიწას დაჰკრეს ბარი, უსათუოდ ამაყი ადამიანები უნდა ყოფილყვნენ. მათმა თავმოყვარობამ ვერ გაუძლო ბატონის მიერ დადგმულ უღელს, დატოვეს დოვლათით სავესე ბარი და მწირ მთებს შეეკედლნენ.

სევანები ხომ საერთოდ ცნობილნი არიან სიამაყით, უშგულელებს უამაყესთა სახელი აქეთ დამკვირებელი მათ შორის. საინტერესოა, საიდან წარმოსდგა თემის სახელწოდება „უშგული“? ორი ქართული სიტყვისაგან „უშიშარი გულისაგან“ ხომ არ აწარმოეს თავისი კუთხის სახელი პირველმა უშგულელებმა. იქნებ საკითხის ასეთი გაშუქება მსუბუქი ფანტაზიის ნაყოფია. მაგრამ ამ ადგილებში მცხოვრებს რომ უცნოდ უშიშარი გული უნდა ჰქონოდა, ეს მე უშგულის სოფლებში შესვლამდე ვიგრძენი. ლასდილის ზეკარით გამოსულნი ზევიდან დავცქეროდით მათ. უშგულს ოთხივე მხრიდან მთები არტყია. ასე გეგონებათ, აი, აგერ ორიოდ ნაბიჯზეა ენგურის სათავეო. გამოდის მყინვარიდან. მოდის, მოჰყეფს და თან მოაქვს ყინულის სიცივე. სოფლების ჩრდილოეთით მწვანით შემოსილი

შალალი მთაა. მისი ფერდობი ბილიკებითაა დასერილი. ვხედავთ ამ ფერდობებზე შეფენილ ნახირს. ყრუდ, მაგრამ მაინც აღწევს ჩვენამდე მწყემსი ბიკების გადაძახილი. უშგულის სამხრეთ-აღმოსავლეთით სწორედ ის ზეკარია, რომელიც ჩვენ გამოვიარეთ, სამხრეთით— გორვაშის განთქმული საჯიხვე მთა, დასავლეთითაც მთები... სულ მთები, მთები!..

უშგული ალბურ ზონაშია, აქ ტყე არ არის. მხოლოდ ენცურის მარცხენა ნაპირას, სამხრეთის მთის ფერდზე ჩანს წვრილი ბუჩქნარი. შორიდანვე შეიმჩნევა, რომ იქ არყი და ცირცელი ბატონობს. უტყეობა უშგულელ პოსახლეობისათვის დიდი დანაკლისია. სამარხილე მასალისათვისაც კი უშგულელს გორვაშის საჯიხვე მთის ირებამდე სჭირდება მისვლა. შეშა ხომ ძვირია და ძვირი.

სხვაც ბევრი რამ აკლდათ უშგულელებს, მაგრამ ყველაფერს ვაყვაცურად იტანდნენ. უშგულელი რომ მამაცურად ებრძოდა ბუნებას, ეს ბევრი რამიდან ჩანს. თუნდა შორიდან შეხედეთ უშგულის სოფლებს. მაშინვე იგრძნობთ, რომ ციხე-სიმაგრეთა და კოშკების სამყაროში აღმოჩნდით. ყოველ სახლთან კოშკი დგას, ყოველ შუბისტრად ჩადგმულ გორაზე ციხე-სიმაგრეთა აშენებული. ყველაფერი ეს საჭირო იყო წარსულში. მაგრამ უშგულელი გლეხი ახლაც ფაქიზად ინახავს ამ ისტორიულ მუზეუმს და ესეც მისი ერთ-ერთი ღირსებათაგანია. ვაყვაცურად ებრძოდნენ უშგულელები მიწას და ისიც ნელ-ნელა სთმობდა: ზღვის დონიდან 2000-2200 მეტრის სიმაღლეზე აღმოცენდა ქერი და პური, ბოლო ხანებში გაჩნდა კარტოფილიც.

ადილი როდი იყო უშგულელებისათვის თავისუფლების შენარჩუნება. მტერი გამუდმებით თავს ესხმოდა მათ სოფლებს. ვანსაკუთრებით თავად დადემშქელიანებს რჩებოდათ თვალი მათს სათიბ-საძოვრებზე. ვინ იცის, რამდენჯერ სცადეს მათ უშგულის დაპყრობა, მაგრამ ყოველთვის ამაოდ უვლიდნენ გარს უშგულელთა უმტკიცეს კოშკებს. თაობიდან თაობაში გადადის დამპყრობთა წინააღმდეგ ბრძოლის საგმირო ამბები. ვანსაკუთრებით ხშირად ინსენიებენ ფუთა დადემშქელიანს. ფუთა თავისი ოაზმით მოსვენებას არ აძლევდა უშგულელებს. უშგულელებიც მაგრად ხვდებოდნენ მომხდურს, მაგრამ უკუტყეული მტერი მაინც ახერხებდა, რომ საქონელი გაეტაცა და დიდი ზარალი მიეყენებინა თავისუფალი თემისთვის. ყვე-

ლას ემძიმებოდა ფუთას მოკვლა. ყველამ იცოდა, რომ ამით დადემქ-ქელიანების მოსისხლე განდებოდა და ეს კი უსათუოდ ძვირად დაუჯდებოდა, კარგად იცოდნენ, თუ რას ნიშნავდა თავადების გადაკიდება. მათ ხომ ძვირად დაუჯდათ, მაგალითად, თავად ჯათარიძეების სისხლი მეთხუთმეტე საუკუნეში. ამიტომ ითმენდნენ უშგულელები ფუთას თარეშს. მაგრამ ბოლოს მაინც აიგისო მოთმინების ფიალა და მთელმა უშგულმა გადაწყვიტა შური ეძია გაუშაძლარ თავადზე. ვის შეეძლო ფუთას მოკვლა? ვის შეეძლო დადემქელიანების მოსისხლე მტრად გადაკიდება? ცხადია, ერთ რომელიმეს არა. ამ საქმის პიროვნულად ჩადენას ვერვინ გაბედავდა. არც თემს შეეძლო ვინმესთვის ამის დაკისრება. ფუთა მათელი უშგულას დაპყრობას ცდილობდა, მას უნდოდა ყმად გაეხადა ყველა უშგულელი; ფუთა ყველა უშგულელს ძარცვავდა და ამიტომ შურიც ყველას ერთად უნდა ეძია. მთელი თემის მამაკაცები შეიკრიბნენ, ვისაც კრიარალის ტარება შეეძლო. ყველამ თავის ტყვიას პატარა ნაწილი მოათალა და მათგან ერთი ტყვია ჩამოასხეს. შემდეგ დაპატოეც ფუთა, ვითომ მთელ თემს სურდა მის მფარველობაში შესვლა. ფუთასაც ეს უნდოდა. გაუხარდა და მაშინვე დათანხმდა სტუმრობაზე. უშგულელებს ყველაფერი წინასწარ კქონდათ მოწყობილი. შერჩეული იყო ადგილი, სადაც უნდა დაესვათ სტუმარი. ამ ადგილს დაუმიზნეს თოფი, რომელიც საერთო ტყვიით იყო გატენილი. თოფს ჩახმახზე გრძელი ბაწარი გამოაბნეს. ამ ბაწარს ყველა მოსახლიდან იითო კაცმა ჩასჭიდა ხელი. ყველას უნდა დაედო წილი ფუთას მკვლელობაში, ყველას ერთად უნდა მოესხლიტა დამიზნებული თოფის ჩახმახი. ფუთას ეგონა, ჩემს ყმებს შორის ვზივარო და არხეინად მოილხენდა. სწორედ ამ დროს დაიქუხა თოფმა და სათემო ტყვიამ გული გაუგმირა მას. ფუთას ტანისამოსი ეკლესიაში შეინახეს, რომ შთამომავლობისათვის ეჩვენებინათ, თუ როგორ იბრძოდა უშგულელი ხალხი თავისუფლებისათვის.

ნამდვილი თავისუფლება უშგულელებს მხოლოდ საბჭოთა ჩელისუფლებამ მოუტანა. ახალმა ცხოვრებამ მოსპო არა მარტო თავადებისა და დამპყრობლების თარეში უშგულელი ხალხის წინააღმდეგ, არამედ უგზობაც, გაუნათლებლობაც და ცხოვრების სხვა სიდუხჭირენიც. ამიტომ დღეს ლასდილის ხეიარზე, საცალფეხო ბილიკის ნაცვლად, ფართო შარაგზა გადადის. ამ გზით მოდის ახალი

ცხოვრება. ადრე, ჩემი მოწაფეობის დროს, უშგულში მხოლოდ შვიდწლიანი სკოლა იყო. მისი დამთავრების შემდეგ ახალგაზრდები სწავლის გასაგრძელებლად ან მესტიაში მიდიოდნენ და ან ლაწხეთში. ახლა კი უშგულში რამდენიმე წელიწადია, რაც საშუალო სკოლაა გახსნილი. უშგულში ახალი ცხოვრება დუღს. ყველაფერი ეს შორიდანვე ჩანს, ახლოს მისვლა ალბათ კიდევ უფრო მეტს დაგვანახვებს.

*

უშგული ერთმანეთზე ლამაზი ოთხი სოფლისაგან შედგება. ეს სოფლებია: ყიბიანი, ჩუბიანი, ჩაყაში და მურყმელი. ახალმა ცხოვრებამ სოფლის სტრუქტურა და გარეგნობაც შეცვალა. ეს ცვლილება მკვეთრად წარმოგიდგებათ თვალწინ, თუ ძველ ფოტოებს გადახედავთ. ძველ კოშკებს უშგულელები დღესაც ფაქიზად ინახავენ, როგორც ისტორიულ საგანძურს, მაგრამ ამ კოშკებთან, ძველი მაჩუბების ადგილას, ახალი ორსართულიანი სახლებია წამოჭიმული. სახლები უშგულშიც იმავე ტიპისაა, როგორიც ლაშხეთში. პირველად სოფელ ჩაყაშში შევედით. გზებზე გაცხოველებული მოძრაობაა. ხარ-მარხილი ხარ-მარხილს მისდევს, ქვას ეზიდებიან, წყალგაღმა გააქვთ და შედარებით ფართო მინდორში ჰყრიან.

— რისთვის ეზიდებიან ამ ქვას?—ვეკითხები თოთხმეტ-თხუთმეტი წლის ბიჭს, რომელიც გზაზე ჩვენთან ერთად მოდის და მარჯვენა ხელით თხილის კანგაცლილ ჯოხს იქით-აქეთ იქნევს.

— მშენებლობისათვის, — გვპასუხობს ის, — კოლმეურნეობის ახალი კანტორა, კლუბი და სამკითხველო უნდა ააშენონ.


— სკოლის შენობას არ აშენებთ?

— სკოლის შენობა ახალი გვაქვს, — ამაყად ამბობს ის და ხელით ქვევით, ენგურის ჰალისკენ მანიშნებს, სადაც დიდი, ლამაზი თეთრი შენობა დგას.

— შენ რომელ კლასში ხარ?

— მერვეში, — ღიმილით მპასუხობს უშგულელი მოწაფე.

გადაშალეთ იმ მოგზაურთა ჩანაწერები, რომლებსაც უშგული ამ ორმოციოდე წლის წინ მოუწინაველებიათ. მათი რიცხვი საკმაოდ



ბი, შთა და ღარუბელი

დიდია. სხვადასხვა პროფესიის და ინტერესის ადამიანები მოდიოდნენ აქ, მაგრამ შთაბეჭდილებებს თითქმის ყველა ერთნაირად იწყებს: უშგული კოშკებისა და თოვლის ქვეყანაა, აქ სიბნელე და სიღუბე ბატონობს, ხალხი მკაცრი და უმეცარია, თქვენს წინააპრებისტორიული ყოფის იშვიათი მუზეუმი. ერთადერთი მთების გრანდიოზული პანორამა იყო მათი ხობების საგანი.

ახლაც იგივე მთები ამშვენებს აქაურობას. მათი მკერდი კვლავ მარადიული მყინვარებითაა შექმნილი. სოფლებშიც, თითქმის ყოველი სახლის წინ, ისევ დგას ამაყად ამართული ტანწერაწერა კოშკი. შორიდან სოფლებს ჯერ კიდევ ძველებური მკაცრი ელფერი ადევს, მაგრამ მიბრძანდით ახლოს და თქვენს წინ გადაიშლება სულ სხვა სურათი. უშგულელები მტრული გამომეტყველებით აღარ ხედებიან მოგზაურებს, დიდსა და პატარას სახე კეთილად უღიმის, ყველა საქმითაა გართული, მაგრამ სტუმრის დასახვედრად ყოველთვის მზად არიან. უშგულში ახალი ცხოვრება დუღს და გადმოდუღს. სათოფურებიანი კოშკების ნაცვლად ხალხი სკოლას, კლუბს, საკოლმეურნეო კანტორას და სამკითხველოს აშენებს. ახალი ცხოვრების მთავარი მამოძრავებელი ძალა ახალგაზრდობაა. უშგულელი ქაბუკები და ქალიშვილები წარჩინებით სწავლობენ სკოლაში, ხოლო ზაფხულის არდადეგებზე მამაცურად ამოუდგებიან ხოლმე მხარში უფროსებს საკოლმეურნეო მინდვრებში და მშენებლობის უბნებზე. აი, დღესაც ქვის მზიდავთა უმრავლესობა ახალგაზრდობაა. ზოგიც საკოლმეურნეო მინდვრებში გასულა. პურისა და ქერის ყანებს წმენდენ სარეველა მცენარეებისაგან.

უშგულელები ოდითგანვე კარგი მეურნენი ყოფილან. ამაზე მეტყველებს თუნდაც მინდვრის ის კულტურები, რომლებიც აქ მოჰყავთ. სახნავ-სათესი ფართობი აქ უმეტესად ზღვის დონიდან 2000-2500 მეტრის სიმაღლეზე მდებარეობს. ირგვლივ მთებია, თოვლიანი და ყინულოვანი მწვერვალები.

ამ მკაცრ კლიმატურ პირობებში პურის მოყვანას მცოდნე და გამოცდილი ხელი სჭირდება. უშგულელი გლეხი საუკუნეების განმავლობაში ებრძოდა მკაცრ კლიმატს და უამინდობას. წარსულში ის ამ ბრძოლაში მარტო იყო. ბრძოლა დღესაც გრძელდება, მაგრამ ახლა უშგულელი კოლმეურნე მარტო აღარ არის. ახალი ცხოვრება უშგულშიც ყოველგვარ პირობებს ქმნის ადამიანის კულ-

ტურული და შეძლებული ცხოვრებისათვის. აქაურები დღეს თავისი მინდვრების მწირ მოსავალზე არ არიან დამოკიდებულნი. ჩვენი ქვეყანა სათანადოდ ამარაგებს მათ სურსათ-სახოვავით. სამაგიეროდ, მთაში ინტენსიურად ვითარდება მეცხოველეობა.

სოფლის ბოლოს წყაროსთან შევისვენეთ, წყალი დავლიეთ და მოლიან მინდორზე წამოვწექით. თვალს ვადევნებთ მშენებლებს. ისინი საოცრად ხმამაღლა ლაპარაკობენ. ეს ასეცაა საჭირო ხმაურიანი ენგურის ნაპირებთან. ცოტა ხნის შემდეგ ისევ დავიძარით. სოფელ მურყმელში უნდა ვსტუმრებოდით ჩვენს მეგობარს. ღამეს იქ გავათენებდით.

* * *

სოფელ მურყმელში ისე შევედით, რომ მზე ჯერ კიდევ მაღლა იდგა. მურყმელი სიდიდით უშგულის დანარჩენ სოფლებს ჩამორჩება. სახლები აქაც შეჭვუფებულად დგას. რამდენიმე მოსახლეს ერთი პატარა ეზო აქვს. ყოველ სახლთან, ჩვეულებრივად, ძველი კოშკია ამართული. კოშკები უშგულში, და კერძოდ, მურყმელში, კარგადაა შენახული. მათ ისე უვლიან, როგორც საცხოვრებელ სახლს. ჩანს, რომ ზოგ კოშკს არცთუ ისე ადრე გამოუცვალეს სახურავი. კოშკები ფიქალითაა გადახურული. ეს მასალა მოსახლეობისათვის უფრო ხელმისაწვდომია, რადგან უშგულის შემოგარენში არა თუ საყავრე ხე, უბრალო საწვავი შეშაც კი ძნელი მოსაძებნია. სამანქანო გზამ გააადვილა ხე-ტყის მასალის შემოზიდვა, მაგრამ კოშკების სახურავად ყავრის გამოყენება ხელს ჰაინც არ აძლევს, ძვირი ჯდება. ფიქალი კი იქვე აქვთ, თანაც ფიქალი უფრო მეტად გამძლეა.

სოფელში შევედით და პირველივე შემხვედრი გავაჩერე — ჩარქსელიანების სახლი სად არის-მეთქი.

— აი, ამ გზას გაყევით, ბატონო, მესამე სახლს რომ გასცდეთ, მარჯვნივ მიუხვიეთ და პირდაპირ მათ ეზოში შეხვალთ, — მეუბნება შუახნის კაცი, რომელიც ხარ-ურმით სადღაც მიიჩქარის.

ჩვენ ზუსტად ვასრულებთ მის დარიგებას და მალე ვიწრო სამარხილე გზით შედარებით ფართო ეზოში შევდივართ. ჯერ კიდევ შორიდან ბავშვების ყრიაშული გვესმოდა და მართლაც ეზოში ათიოდე სხვადასხვა ასაკის გოგო-ბიჭი დავინახეთ. ამათგან, ერთის

გარდა (ეს ერთი მათში ყველაზე მაღალი ქალიშვილი იყო), ერთ-მანეთს უკან ამოსდგომოდნენ სიმაღლის მიხედვით და ერთმანეთისათვის კალთაში ხელი ჩაეჭიდათ. რიგში ყველაზე წინ ათი-თორმეტი წლის ყმაწვილი იდგა. ის მთელ რიგს იცავდა ქალიშვილის თავდასხმისაგან. ქალიშვილი კი ცდილობდა, „პატრონ“ ყმაწვილისათვის გვერდი აეჭკია, რიგს მივიარდნოდა და იქიდან რომელიმე „წიწილა“ მოეტაცა: ხან მარჯვნიდან შემოუბრებნდა ის და ხან მარცხნიდან, მაგრამ ამაოდ. „პატრონი“ მამაცურად იცავდა თავის „წიწილებს“.

ჩემი ამხანაგები ეზოში შემობიჭებისთანავე შედგნენ და ამ სახანაობას ინტერესით დაუწყეს ცქერა. თამაშის შინაარსი მოკლედ ასეთია: ბავშვები ჯგუფიდან გამოყოფენ ერთ-ერთ ძლიერ ამხანაგს, დანარჩენი ამხანაგები ერთმანეთს უკან ამოუდგებიან სიდიდისა და სიძლიერის მიხედვით. ყველაზე ძლიერი მათ შორის რიგში წინ დგება. წინასწარ გამოყოფილი ამხანაგი ასრულებს მტაცებლის როლს. მისი მიზანია — გუნდს თავს დაესხას და იქიდან „მსხვერპლი“ მოიტაცოს. მეწინავე თავის შვილებს მტაცებლისაგან იცავს და მიმხდურს რიგთან ახლოს არ უშვებს.

აღწერის მიხედვით ესოდენ უბრალო საბავშვო თამაშობა პრაქტიკულად შესრულებისას მეტად ცოცხალი გამოდის. ატყდება ერთი ჟრიამული და სიცილ-ხარხარი. განსაკუთრებით ხშირად საღამოობით მართავენ ბავშვები ამ თამაშს და სქელი ბინდის ჩამოწოლამდე ერთობიან. წარმოშობის მიხედვით ეს თამაში ძველია და შთამომავლობის დაცვის რელიგიურ კულტანაა დაკავშირებული. ამაზე მიუთითებს მისი სახელწოდება „მელია ტულეფია“.

ჩვენ შეგვეძლო კარგა ხანს გვეცქირა ბავშვების თამაშისათვის, მაგრამ მათ, როგორც კი დაგვინახეს, ჟრიამული შეწყვიტეს, დერეფანქვეშ შეიკრიბნენ და იქ ასტეხეს ჩოჩქოლი. სწორედ ამ დროს ორსართულიანი სახლის აივანზე ჰარმაგი მოხუცი გადმოდგა, დაგვინახა, გაეღიმა და მაშინვე კიბეებზე დაეშვა.

— მობრძანდით, მობრძანდით! რამდენი ხანია, გელით!

— ბატონო, ეს ერმილე ჩარქსელიანის ოჯახია, არა? — მაინც შევეკითხე, თუმცა დარწმუნებული ვიყავი, რომ სწორი მისმართით მოვედით.

— დიახ, დიახ. დანაბარები წუხელ გადმომცეს, ვიცოდით,



უზუელი. სოფელი ჩუბანი

რომ მობრძანდებოდით. მაგრამ გვეგონა სადილობამდე მოხვიდოდით.

ერთმანეთს გადავხედეთ და გაგვეღიმა. დღეს გამოვლილი გზა სატრაბახოდ მიგვაჩნია და ამ მოხუცს კი უყვირს, ასე რატომ დაიგვიანეთო. მაგრამ რას იზამ. ვერაფერს ეტყვი. ახალგაზრდობისას ალბათ სირბილით გადაივილიდა ის ლასდილის ზეკარს ყორულ-დაშამდე და დღეში შეიძლება ორი გზობაც კი გაეკეთებინა იქითაქეთ. ეტყობა, მუხლებში სისუსტეს არც ახლა გრძნობს: კიბეებზე მარჯვედ მიგვიძღვება, ვილაციისთვის ზურგჩანთის გამორთმევაც მოუსწრია და მიაქვს.

ჩარქსელიანების ეზოში შებიჯებისთანავე ჩვენი ყურადღება ორსართულიანი სახლის გვერდით ამართული მაღალი კოძკის თავზე მიმაგრებულმა ფრინველის ფიტულმა მიიპყრო. ეს იყო კარგად გაკეთებული მოზრდილი არწივის ფიტული. არწივი ფრთაგაშლით იდგა კოშკის უკანასკნელი სართულის ფანჯრიდან გამოშვერალ ჭოხზე. მასპინძელს ვკითხე, ვინ მოკლა ეგ არწივი-მეთქი. ძია გეჯამ გაიღიმა, არწივის ფიტულს სიყვარულით შეხედა და ოდნავი დაყოვნების შემდეგ მიპასუხა:

— ეს არწივი ჩემმა შვილიშვილმა მოკლა, შოთამ. რამდენიმე დღის შემდეგ ჯარში უნდა წასულიყო. ფიტული გააკეთა, კოშკის თავზე აიტანა და ასე გამოკიდა — ჩემს მოსვლამდე ხელი არაყინ ახლოსო.

— როდის იყო ეს, ძია გეგი?

— უკვე მეორე წელი გადის. მალე დაბრუნდება კიდეც ჯარიდან! ამ რამდენიმე დღის წინ წერილი მივიღეთ. იწერება — ჩემი არწივი როგორ არისო. — ძია გეგის აშკარად ეტყობა, თუ როგორ ამაყობს თავისი შვილიშვილით და რა მოუთმენლად მოელის მის შინ დაბრუნებას.

საუბარი ახლა კოშკებზე გადავიტანეთ. კოშკები უშგულში ძირითადად ერთნაირია, თანაბარი სიმაღლის, სიგანის და მოყვანილობის. აი ის კოშკებიც, რომლებიც ძია გეგისთან საუბრის დროს ჩემ თვალწინ იყვნენ ამართულნი, თითქოს ერთი კაცის ხელით არიან ნაშენები. თუ უფრო მეტად დააკვირდებით, ცხადია. განსხვავებასაც შეამჩნევთ. ზოგი კოშკი უკეთაა ნაგები, ზოგი უარესად. ზოგი სადა კედლით მთავრდება, ზოგი კონუსისებურია. მაგრამ როგორც

ვთქვით, ძირითადად მაინც ერთნაირებია — ყველა ოთხკუთხოვანი და მრავალსართულიანი. პირველი სართული მაღალი ფუძე-ძირით იწყება და პატარა შესასვლელი კარი აქვს. სართულები ქვის ფილგბიანი ჰერითაა გაყოფილი. ჰერზე ჰრილია და ჰრილს მიდგმული აქვს ხის კიბეები ზემოთ ასასვლელად.

კოშკის კედლებში გაკეთებულია პატარა სარკმლები და სათოფურები. კოშკთან დაკავშირებით ძია გეგი საინტერესო თქმულებას გვიყვება.

იყო ხუთი ძმა, ვადაწყვიტეს ციხის აგება. თვითონ არ იცოდნენ შენება და ამიტომ მთელი სენანეთი დაიარეს. — უნდოდათ სანაქებო კირითხურო დაეჭირავენინათ. როგორც იყო მონახეს. კირითხურომ დაიწყო შენება და მართლაც მშვენიერი კოშკი ააგო. მაგრამ დახეთ უბედურებას, ძმებმა ნახელავი დაუწუნეს. მაშინ კირითხურომ ასე მიმართა მათ:—ხუთნო ძმანო, დაიარეთ მთელი ხევი და თუ სადმე ამაზე უკეთესი ციხე ნახოთ, მაშინ მე ხელი მოჰქერიოთ. დაიარა ხუთმა ძმამ მთელი ხევი აღმოსავლეთიდან დასავლეთამდე და ვერსად ვერ ნახეს არა თუ უკეთესი, იმისთანა ციხეც კი. ხელახლა ითათბირეს და ბოლოს მამის რჩევით ვადაწყვიტეს, კირითხურო მაინც არ გაეშეათ. უნდოდათ ამ კარგი ხელოსნისთვის კიდევ აეგებინებინათ ახალი ციხეები. დაიპირეს და დაამწყვდიეს. გავიდა ერთი წელი. ხუთმა ძმამ ოცეე ბჭობა გამართა. უნდოდათ რაიმე მიზეზი გამოენახათ ახლადაშენებული ციხისთვის და ამით თავიანთი უსაქართლო მოქმედება გაემართლებინათ. ბევრი იფაქრეს და ბოლოს მოიფიქრეს: ჩვენს ციხეს რკინის კარი არა აქვსო, მოდი და დატყვევებულ ხელოსანს ბრალდებად ეს წავუყენოთო. მივიდნენ პატიმართან და უთხრეს: — ჩვენს ციხეს რკინის კარი რად არ დაჰკიდებო? კირითხურო დაფიქრდა და ასე უპასუხა:—რა ვქნა. ხუთნო ძმანო. რკინის კარის დასაკიდი ხელსაწყო შინ დამრჩა და უიმისოდ ვერაფერს ვერ გავაკეთებო, თუ შინ გამიშვებთ. იმ ხელსაწყოს მოვიტან და თქვენს ციხეს საუკეთესო რკინის კარს შევუბამო.

— შენ ვერ გენდობით. — უპასუხეს ძმებმა, — მოდი და შენს ნაცვლად ჩვენ წავალთ. ჩვენ მოგიტანთ იმ ხელსაწყოს.

კვლავ ჩაფიქრდა კირითხურო. იფიქრა, იფიქრა და ბოლოს დათანხმდა.

— კეთილი, ასე იყოს, — უთხრა კირითხურომ ძმებს, — წადით

ჩემს ცოლთან და უთხარი, რომ რკინის კარის დასაკიდი ხელსაწყო უსამართლო სამართალი თორმეტკლიტურში მაქვს შენახული და გამოკატანოთ.

ძმები გზას გაუდგნენ. მივიდნენ კირითხუროს ცოლთან და გალავნის კარზე დაუბრაახუნეს. ქალმა გამოიხედა. მან მაშინვე იცნო ლუთი ძმა და გულლიად შეეგება:

— მშვიდობით მომსვლოდეთ, ხუთნო ძმანო. მაგრამ ერთი ეს ბითხარით, ციხის ამკების დაქერა სად გაგონილა, რომ თქვენ დაიჭი-
ოეთ?

— არა, არა, კარგო ქალო, შენი ქმარი დაქერილი არა გყავს, — უპასუხა ხუთმა ძმამ კირითხუროს ცოლს, — აი, სწორედ ახლა შენმა ქმარმა გამოგვეგზავნა შენთან. თორმეტკლიტურში უსამართლო სამართალი ჰქონია შენახული და ის უნდა გაგვატანო შენს ქმართან, რომ ამ ხელსაწყოთი ჩვენს ციხეს რკინის კარი დაკიდოს. სიტყვას გაძღვეთ, როგორც კი რკინის კარს მოათავებს, მაშინვე შინ გამო-
უშვებთ დიდი ქონებით.

კირითხუროს ცოლი მაშინვე მიხვდა, როგორც იყო საქმე. გააღო თორმეტი კარი და ხუთი ძმა შიგ შეიყვანა. შემდეგ უცებ შე-
ტრიალდა, თორმეტივე კარი გამოიკეტა და ხუთი ძმა შიგ შეამწყ-
ვდია. ასე ამყოფა ისინი სამი დღე-ღამე. პირველად ძმებმა ვერ გაი-
გეს, რა ხდებოდა. ბოლოს უმცროსი ძმა მიხვდა ყველაფერს და თავ-
ში ხელი შემოირტყა.

— ეს რა უგნურება მოგვივიდა, ძმებო, უსამართლო სამართალს რომ ვეძებთ, სწორედ მოგვცა კირითხუროს ცოლმა და ესაა. — უმცროსმა ძმამ სირცხვილისაგან თავის მოკვლა გადაწყვიტა, მაგრამ უფროსმა ძმებმა დაუშალეს:

— თავის მოკვლით საქმეს ვერ ვუშველით, — უთხრის მათ. — სჯობს კირითხუროს ცოლს შევეხვეწოთ და იქნებ გავვიშვასო.

მართლაც შეეხვეწნენ კირითხუროს ცოლს, დაჰპირდნენ. რომ თუ გაუშვებდა, მის ქმარს უხვად დასაჩუქრებულს გამოუშვებდნენ შინ.

— მე მცირე საჩუქარს ვერ დავეჩერდები, — უპასუხა მათ კი-
რითხუროს ცოლმა, — რამდენი ქვაც ჩემი ქმრის მიერ აგებულ ციხეს დასჯირდა, იმდენ ხარს თუ მომცემთ, გაგიშვებთ, თუ არა და არა.

იმსჯელეს ძმებმა, თორმეტკლიტურში ამოხრჩობას არჩიეს კირითხუროს ცოლის მოთხოვნა მიეღოთ. დაჰპირდნენ, რომ მართლაც იმდენ ხარს მისცემდნენ, რამდენი ქვაც ციხის კედლებში იქნებოდა ჩადგმული. ამის შემდეგ კირითხუროს ცოლმა ხუთი ძმა გაუშვა. მალე ისინი მამას კარზე მიაღვნენ. ხუთივემ სათითაოდ უსაყვედურა მას: ეს რა სამარცხვინო საქმე გავაკეთებინე, ციხის ამგების დამწყვედევა სად გავგონილაო.

ხუთივე ძმას საკუთარი ნახირი ჰყავდა. წავიდნენ და იალაღებიდან ხარები ჩამოდგნეს. მთელი მინდორი აივსო ნახირით. შემდეგ გამოუშვეს კირითხურო, კარგ ცხენზე შესევს, ხმალი მხარზე გადაჰკიდეს, ხარები აჩუქეს და თვითონ მწყემსებად გაჰყვენენ, რომ შინ მისვლამდე კირითხუროს გზაზე ნახირი არ დაჰვანტოდა. მამამ ცრემლიანი თვალი გააყოლა ხარებს. ენანებოდა, რომ ამდენ სიმდიდრეს ჰკარგავდა. მას ქვითინიც აუვარდა, მაგრამ ამ დროს კირითხუროს აშენებულმა კოშკმა გადმოსძახა მოხუცს:

— ა, მამავ, მამავ, ნუ სტირი, ჩემ ამგებს ერგება და ალალი იყოსო.

* * *

სალამოს ჩარქსელიანების ეზოში მეზობლებმა მოიყარეს თავი. ისინი იქვე საგანგებოდ გამოტანილ ვრძელ სკამზე და კედლის ძირას დაყრილ ლოდებზე ჩამოსხდნენ და ბაასობდნენ. ბავშვები, რომლებიც ეოტა ხნის წინათ ჩვენმა გამოჩენამ ოდნავ დააფრთხო, ახლასევე წრეში ჩადგნენ და მხიარულება განაახლეს.

ძია გეგი საბალახოდან დაბრუნებული ნახირის დასაბინავებლად წავიდა. აივანზე სიჩუმე ჩამოვარდა. ყველა თავის ფიქრს მისცემოდა, თითქოს ფეხაკრებით მომავალ სალამოს ბინდს უკედებდნენ ყურს. გორვამის მხრიდან ღრუბლების დიდი ფარა მოიწვედა უშგულისაყენ.

— ხვალ იწვიმებს. — ვოქვი მე.

— ეგ წვიმის ღრუბლები არ არის, შეილო, ხვალ დარი იქნება. — მომესმა ეზოდან.

ეს ძია გეგი იყო. საქონელი მორეკა და ახლა შუა ეზოში მდგარი ღიმილით აცქერდებოდა გორვამის მხრიდან წამოსულ ღრუბლებს.

სასიამოვნო დილა გაგვითენდა უშგულში. მზის ამოსვლას ყველამ დაეასწარით ადგომა. მოწმენდილი ცა დაჰყურებდა ბუმბერაზ მთებს და ენგურის ხმაურიან ხეობას. მხოლოდ გორვაშის მთის თავზე დახეტილობდა ობოლი ღრუბელი. ფარას ჩამორჩენილ ფეხმოტეხილ ბატკანს ჰგავდა ის. ცოტა ხნის შემდეგ ისიც მთას იქით გადაინიზნა და გაავდრების მბეუტავი შიშიც თან წაიღო.

საუზმის შემდეგ ჩვენი ბარგი-ბარხანა შეეკარით და გასამგზავრებლად მოვემზადეთ. ლასდილის ზეკარზე გადმოსვლას თავისი კვალი დაეჩნია ყველა ჩვენთაგანისთვის. განსაკუთრებით ქალიშვილები უჩიოდნენ მხრების და კიდურების კუნთების ტკივილს. ამიტომ მურყმელში ერთი ცხენი დავიჭირავეთ თავისი გამყოლით, რომელიც კალამდე ჩაგვიყვანდა. ქალიშვილების ბარგის დიდი ნაწილი იმ ცხენს ავკიდეთ. გულუხვ მასპინძელს მადლობა გადაუხადეთ და გამოვემშვიდობეთ. მათაც კეთილი მგზავრობა გვისურვეს. ძია გეგი თითქოს ბოდის იხდისო, ისე გვეუბნებოდა:

— აქამდე უნდა გაგვეყვანა უშგულსა და კალას შორის სამანქანო გზა, მაგრამ რაღაც დაგვაგვიანდა.

— არა უშავს, ძია გეგი, დღეს სწორედ ბილიკ-ბილიკ გვიჩვენია სიარული. — ვპასუხობთ ჩვენ.

ძია გეგის ისევ ელიმება და ისევ გულმხურვალედ გვილოცავს გზას.

მართლაცდა მხოლოდ უშგულსა და კალას შორის ვერ დადის ავტომობილი. მაგრამ სამანქანო გზის გაყვანა აქაც დაწყებულია და ალბათ მალე დამთავრდება კიდევ, მაშინ ლენტეხი და მესტია არამარტო სამარხილე გზით, სამანქანო გზითაც დაუკავშირდება ერთმეორეს. თუმცა ჩვენ უგზობა მაინცდამაინც არ გვაწუხებს. მივდივართ, მივსეირნობთ. თან მოგვეყვება მქუხარე ენგური, საზღაპრო საძოვრები, ყვავილნარები. მალე ტყეც დაიწყო. ტყე ფოთლოვანია და, მაშასადამე, აქ ჰავა შედარებით რბილია. ისმის ფრინველთა ქიკქი და მწერთა ბზუილი. მზემ მალა აიწია და, როგორც კი დადლას ვიგრძნობთ, ჩრდილისკენ მივიწვევთ, ვისვენებთ. აქ დასვენება მართლაც რომ ერთ რამედ ღირს.

ქვევით, კლდოვან კალაპოტში მიჰქუხს დაუდგრომელი ენგური.

ზალხში თქმულებაა დარჩენილი: აქ ბოროტი სული — დევი ბინადრობდა თურმე. იყო ჩასაფრებული და ელოდა მგზავრის გამოჩენას, რომ კლდეზე გადაეჩეხა. მაგრამ ენგურის სათავესთან ახლოს, „ლამარიას“ ეკლესიაში ცხოვრობდა წმინდა მარიაში, რომელმაც იცოდა დევის ავი ზარახვები და ზარის რეკვით აფრთხილებდა მგზავრებს.

ერთხელ დევი განრისხდა და გადაწყვიტა ენგური დაეგუბებინა. უნდოდა წყალში დაეხრჩო უშგულის მცხოვრებნი და ეკლესიაში მობინადრე ღვთისმშობელი. დიდხანს ეზიდებოდა დევი იფარის ხევიდან უზარმაზარ ლოდებს და ჭებირს აწენებდა. წყალი თანდათანობით გუბდებოდა და მალე უშგულელ მოსახლეობას საშიშროება დაემუქრა. მაშინ ღვთისმშობელმა კალის თემის მფარველ წმინდა კვირიკეს შესთხოვა დახმარება.

წმინდა კვირიკემ საყვირით იხმო თავისი ოქროსრქიან ვერძთა ფარა და დევის ნაგები ჭებირის დასანგრევად გაგზავნა. ვერძები ოქროს რქებით დაეჩახნენ ჭებირს და გაანგრეს.

სწორედ ამ დროს დევს უკანასკნელი ორი ლოდი მოჰქონდა, რომ კედელი მოეთავებინა. უცებ მას შემოესმა ვერძთა რქების გამაყრუებელი ჭახანი. ბნელი ხევიდან წამოსულმა ნაპერწკლებმა ლამის თვალთ დაუბნელეს. გაბოროტებულმა დევმა მრისხანედ შეჰყვირა და ლოდები იქით-აქეთ ისროლა. ერთი მათგანი მდინარის მარცხენა ნაპირას დაეცა, ხოლო მეორე — მარჯვენა ნაპირას. ოქროსრქიან ვერძთა ფარა კი წმინდა კვირიკესკენ გაეშურა. პატრონი გახარებული შეხვდა მათ. კლდეზე მიჩახებინსაგან გაღუნული რქები გაუსწორა და ისევ საბალახოზე გაუშვა.

გადარჩენენ უშგულელები. ისინი გულმხურვალედ ლოცავდნენ წმინდა მარიამსა და კვირიკეს, რომელთაც დაამარცხეს ბოროტი დევი.

ერთი შეხედვით ისეთი შთაბეჭდილება გრჩებათ, თითქოს ეს კლდე მართლაც განგებ ჩაედგას ხეობაში რაღაც მძლეთამძლე ძალას, ხოლო შემდეგ სხვა ძალას გაერღვიოს, რათა მდინარეს თავისუფლად ედინა. ბოზოქარი ენგური აქ ერთმანეთის პირისპირ ამართულ ორ კლდეს შორის დარჩენილ ვიწრო ნაპრალში მიძვრება, ბრაზობს, ღრინავს და ყფვს, თითქოს გული მოსდის ამ კლდეებზე, რომლებიც მას ვიწრო კალაპოტში სვამენ. ჩქერალი შეხუტებს მალა

ისვრის და კლდის ტანს ესხურება. მალე, ალბათ, მდინარეს ადამიანიც მიეხმარება და დევის კლდის ნაპრალი უფრო გაფართოვდება. კალიდან წამოსული სამანქანო გზა სწორედ დასავლეთიდან ებჯინება დევის კლდეს. კიდევ ცოტა ხანიც და ლალუმები ამ კლდესაც შეუნგრევენ მკერდს და მაშინ ჩვენსავით წამოსული ტურისტები ალბათ მანქანით ჩაუქროლებენ ამ ადგილებს.

კარგა ხანს გავცქეროდით ფერდობიდან დევის კლდის ლეგენდარულ სანახაობას. მერე კი თავქვე დავეშვიით.

რაც ქვევით ჩავდიოდით, ბუნება სულ უფრო და უფრო მრავალფეროვნდებოდა. ტყე მდიდრდებოდა და უკვე კალას მისადგომებთან წიწვიანი ტყის კორომებიც გამოჩნდა. შვევდით უღრანი ტყეებით შემოსილ ენგურის ხეობაში. გამოჩნდა სოფელი კალაც, სადაც დამე უნდა გაგვეთია.

* * *

კალას სოფლები უმეტესად ფერდობებზეა მიყუყული. სახლები ერთმანეთის ახლოს დგანან. ხშირად ორ მეზობელ სახლს შორის ვიწრო ბილიკიდაა დარჩენილი. სოფლის დასახლების ასეთი სტრუქტურა აქაც სახნავი მიწის სიძვირიითაა გაპირობებული. ცხადია, ენგურის ვალებში, სადაც ახლა პურის ყანებია, სოფელი უფრო თავისუფლად გაიშლებოდა, მაგრამ ეს სახნავ ფართობს ძლიერ შეამცირებდა. ამიტომაც, რომ სოფელი კლდოვან ადგილზეა გაშენებული.

სახლები აქაც ორი ტიპისაა: ახალი და ძველი. მართალია, რაოდენობით ახლები ჰარბობს, მაგრამ ძველიც ბევრია შემონახული. თუმცა ეს იმას კი არ ნიშნავს, რომ ხალხი ჯერ კიდევ მაჩუბებში ცხოვრობს. ვისაც ახალი აუშენებია, ძველი სახლი საქონლის ბინად დაუტოვებია. მაჩუბს მსხვილფეხა თუ წვრილფეხა საქონლის ბინად იყენებენ, ხოლო დარბაზში თივას ან ინვენტარს ინახავენ. მაჩუბი საქონლისათვის შესანიშნავი ბინაა. აქ ყველას თავთავისი სადგომი აქვს მიჩენილი. ხარებს ცალკე, ფურებს ცალკე და მოზერებსა და დეკეულებსაც ცალკე. ბაგებიც თავთავიანთი აქვთ. დაგებულია იატაკი, თანაც დამრეცად. რომ სისველე დაიწრიტოს. ნაკელისაგან კი, ჩვეულებრივად, დღეში ორჯერ წმენდენ. სადგომთა ასეთი

სტრუქტურა კარგად მიუთითებს იმაზე, თუ რაოდენ დიდ ყურადღებას აქცევდნენ აქ მესაქონლეობას ძველთაგანვე.

ჩვენს მასპინძელს ამბერკი ხარძიანსაც ორი სახლი უდგას, ერთი ძველი და ერთი ახალი. ახალი სახლი მთელ სოფელში გამოირჩევა თავისი სიმაღლით. ესაა ერთადერთი სამსართულიანი სახლი მთელს კალის თემში. ჩვეულებრივად კი ორსართულიანი ახალი სახლებია. როდესაც ამბერკის სახლის მესამე სართულიდან გადაპყურებთ ქვევით, ენგურის ჰალეებს, ისეთი შთაბეჭდილება ვრჩებათ, თითქოს მწვერვალზე ხართ ასული და ჩქიდან დასრკვერით მის ძირში გაშლილ ხეობას.

დიასახლისმა ბინა მესამე სართულზე მიგვიჩინა. ბარგი აეიტანეთ და აივანზე გადმოვდექით. ქვევით, ენგურის ჰალეებში, ხალიჩებით იყო გაშლილი მხით განათებული პურის ყანები და მწვანე საძოვრები. ამ ყანებსა და საძოვრებს ტყეები მოსდევს. ენგურის გაღმა ერთი განცალკევებული გორაა, რომლის თავზე წმიდა კვირიკე ეკლესია ამართულა. ამ ეკლესიის ნახვა ხვალისათვის გვაქვს გადადებული.

ეკლესიის გასწვრივ ფერდობებზე საკმაოდ დიდი, გაშიშვლებული ადგილი მოჩანს. ისეთი შთაბეჭდილება ვრჩებათ, თითქოს რამდენიმე წლის წინ იქ ახო გაუტეხიათ, ხოლო შემდეგ მიუგდიათ და ის ახო გაყამირებულა.

— ოთხი წლის წინათ მანდ ხანძარი გაჩნდა, — გვეუბნება ამბერკი, — მთელი სოფელი გავედით ჩასაქრობად, მაგრამ მაინც დიდი ზარალი მოგვაყენა. სწორედ მაგ ადგილას იყო ყველაზე კარგი ნაძვნარი. — ამბერკის ლაპარაკში სინანული ეტყობა.

ადილი წარმოსადგენია, როგორ წუხდნენ კალელები მაშინ გასაგებიცაა, რადგან, მართლაც და რა იქნება ენგურის ესოდენ ლამაზი ხეობა უტყეოდ? ღვარცოფები ჩამორეცხავს ნიადაგს და დარჩება მხოლოდ გაშიშვლებული კლდე და ქვა. მაშინ ენგურის ხეობაში არა თუ კაცს, ხელიკსაც გაუქირდება არსებობა.

სადილის შემდეგ ენგურის ჰალეებისაკენ წავედით.

ადიდებული და ახმაურებულია ენგურ-მდინარე. მის ნაპირას ჩვენც ხმამაღალი ლაპარაკი გვქირდება, დაახლოებით ისე, როგორც უშგულელები ლაპარაკობენ. ცივი წყლით ხელ-პირის დასველება სასიამოვნოა, მაგრამ მდინარეს კარგი მისადგომი არა აქვს, რომ

ახლოს მივიდეთ. საურმაგი ზევით მიჰყვება ნაპირს და, ცოტა ხნის შემდეგ, ჩვენც იქეთ გვეძახის. ჩვენს მისვლამდე საურმაგს მდინარიდან ამოშვებრილ უზარმაზარ ლოდზე წამოსკუბება მოესწრო. ამ ლოდს ჩვენგან ენგურის მოზრდილი ტოტი ჰყოფს. პირველად გაგვიკვირდა, ვერ მივხვდით, საიდან ამოყო თავი საურმაგმა ლოდზე. შემდეგ იქაურობა კარგად დავათვალიერეთ და გზა დავინახეთ. ჩვენს ქვევით, ნაპირთან, დიდი ლოდი იდო. ამ ლოდიდან მეზობელ ლოდზე შეიძლებოდა გადახტომა. ასევე მეზობელ ლოდიდან შემდეგზე და რამდენიმე ასეთი ნახტომით კაცი საურმაგის „სამფლობელოში“ ამოყოფდა თავს. საურმაგს კი ჰგონია, ვერ მივხვდებით მის საიდუმლოებას, ზის ლოდზე და თან თავის საყვარელ მელოდებს ლილინებს.

როდესაც ყველანი საურმაგის „სამფლობელოში“ აღმოჩნდით, მზემ უკანასკნელი სხივი მოსწყვიტა იქაურობას და მთებს უკან ჩაიწურა. მე ფოტოაპარატი მოვიმარჯვე, უკან გამოვბრუნდი და ენგურის ნაპირიდან ამხანაგებს სურათი გადავუღე.

შინ შებინდებისას დავბრუნდით. სოფელში ძაღლებმა ყეფა ატეხეს. ორლობეები შინმომავალი ნახირით იყო სავსე. დინჯად მოაბიჯებდნენ მაძლარი ხარები და ფურები. ჩემს თვალში ახლა სულ სხვა ელფერი დაედო სოფელს. უფერულია სოფელი ნანირის გარეშე.

„ბაურ ბავხე“ — ხალდელთა ლაშქრული

ვახშმად ამბერკიმ ხალხმრავალ სუფრაზე მიგვიწვია. აქ იყვნენ კალაში ქორწილზე ჩამოსული ხალდელებიც.

დავსხედით თუ არა, თამადა თავის საქმეს შეუდგა. ქართული სუფრის წესის თანახმად, ჯერ დიასახლისი ადღეგრძელა, შემდეგ სტუმრები და ასე. შეჰყვა ღრმად. ლეჩხუმურმა ლეინომ ჩვენც თავიდანვე შეგვიტყუა. სადღეგრძელო სადღეგრძელოს მიჰყვა და ბოლოს ხალდელებმა სიმღერა წამოიწყეს.

ჩემი ყურადღება ერთმა სახენაჭრილობეგმა ხალდელმა მიიპყრო, ის სუფრაზე ჩემს პირდაპირ იჯდა და ძალაუნებურად ერთმანეთს ვუყურობდით. ნაჭრილობევი ლაწვისთავზე იწყებოდა, ოვალბუდის წყვეტილის შემდეგ მარცხენა წარბს შუაზე ყოფდა და შუბ-

ლზე გრძელდებოდა. ჩანდა, კრილობა თვალსაც შეხებოდა. დაზიანებული თვალი ზევით იხედებოდა სახის ნორმალური მდგომარეობის დროსაც. რატომღაც ვიფიქრე — ალბათ უბრალო ჩხუბის დროს დაიჭრა-მეთქი ეს კაცი. ასეთი ფიქრის საბაბს ის მაძლევდა, რომ ნაჭრილობევი ნახანჯლარს ჰგავდა, მაგრამ ასეც არ უნდა ყოფილიყო. ცნობისმოყვარეობამ მძლია და ჩემს გვერდით მჯდარ კალელ ახალგაზრდას ვკითხე.

— სად დაიჭრა ალმაცგირი?

— სამამულო ომში, — მიპასუხა მან. ამ სიტყვების შემდეგ ჭრილობამ უფრო გაალამაზა და მეტი ვაჟკაცური იერი შესძინა ალმაცგირს.

ალმაცგირი თანამესუფრეებს შორის ყველაზე რიხიანად მღეროდა. თუ ვინმე სიმღერას წამოიწყებდა, მაშინვე ისიც მხარს აუბამდა. ხშირად თვითონაც იწყებდა. აი, წამოიწყო „გაურ-გავხე“-ძლიერი, ომახიანი ხმით უძღვებოდა გუნდს. მისი სახის გამომეტყველებაც ჰანგს ასდევდა. ვაჟკაცის თვალეზში ნაპერწკლებმა იმატეს. დაშავებული თვალიც უფრო აუბრწყინდა. ძლიერად მღეროდნენ სხვებიც. მტერზე ამხედრებული ჯარის ვაჟკაცური გუგუნის გაისმოდა მათ ხმაში. თვალწინ წარმომიდგა ამ სიმღერის შექმნის დრო, ამ სიმღერასთან დაკავშირებული ამბები.


ისტორიაში გაუგონარ უთანასწორო ბრძოლასთანაა დაკავშირებული ხალდელთა ლაშქრული სიმღერა „გაურ-გავხე“. ბუმბერაზ მთების კალთებზე მიყუყუელი პატარა სოფელი აჯანყდა რუსეთის ცარიზმის უსამართლობის წინააღმდეგ. ეს მოხდა მას შემდეგ, რაც საბატონო სვანეთის მთავრებმა, დადეშქელიანებმა, რუსეთის მეფეს ერთგულება შეჰფიცეს (1833 წ.). ისინი ცდილობდნენ მთავრობის დახმარებით ხელთ ეგდოთ უბატონო სვანეთი. დადეშქელიანების უღლის თავიდან ასაცილებლად თავისუფალმა სვანებმა დახმარებისთვის მთავრობას მიმართეს. მთავრობამ თავის მხრივ ისარგებლა ამ მომენტით და 1840 წელს ზემო ხევში საბოქაულო შექმნა.

მთავრობა უბატონო სვანეთის მცხოვრებთ ყოველგვარ სიკეთეს ჰპირდებოდა, მაგრამ დრო გადიოდა და მთავრობის დაპირება დაპირებად რჩებოდა. არც სკოლების გახსნაზე ზრუნავდა ვინმე, არც გზების გაყვანაზე და არც საექიმო პუნქტების შექმნაზე. პარიჭით, მთავრობამ თანდათანობით სხვადასხვა გადასახადები შეაპარა თავი-

სუფლებისმოყვარე ხალხს. მოტყუებულმა ხალხმა მალე დაინახა მეფის მთავრობის ნაძვრები სახე და მათ უკანონო მოქმედებას წინ აღუდგა. 1871 წელს მთავრობამ სვანეთში მუდმივი ჯარი ჩააყენა, რომლის მოვალეობასაც შეადგენდა ადგილობრივი პოლიციისათვის დახმარების გაწევა უკმაყოფილო ხალხის ასალაგმავად. 1876 წელს სვანეთის ბოქაულმა, მთავრობის დავალებით გლეხთა მიწების აზომვა დაიწყო. გლეხობა მიხვდა, რომ ყველაფერი ეს მიწის დაბეგვრის სამზადისს წარმოადგენდა და წინ აღუდგა მთავრობის გადაწყვეტილებას. მულახის საზოგადოებამ ყრილობა მოიწვია და მთავრობას თხოვნით მიმართა. მთავრობამ კი ყრილობის მოწვევა აჭანყებდად ჩათვალა და მის ჩასაქრობად ჯარი გაშოგზავნა გენერალ ციტოვიჩის მეთაურობით და გუბერნატორო მალაფეევის თანხლებით. სვანებმა გადაწყვიტეს უსამართლობას იარაღით დახვედროდნენ და ბალის და ლატვარის მისადგომებთან დარაჯები დააყენეს.

გუბერნატორმა მალაფეევმა ხალხის ყრილობასთან მოლაპარაკება გამართა. ის მოსახლეობას არწმუნებდა—მთავრობას მსოლოდ კეთილი სურვილები აქვსო, ამასობაში კი გულმოდგინედ ცდილობდა მღელვარების მოთავეთა ვინაობის გაგებას და მათ ხელში ჩაგდებას. ადგილობრივი ბოქაულის დახმარებით გუბერნატორმა მიიღო სია თექვსმეტი კაცისა, რომლებიც ამბოხების ხელმძღვანელებად ითვლებოდნენ. მალაფეევმა ეშმაკურ ხერხს მიმართა. ის თექვსმეტი კაცი გამოიძახა და გამოუცხადა: მეფის ნაცვალთან უნდა წარგადგინოთ და ის შეიწყნარებს თქვენს თხოვნასო. გამოძახებულებიდან მსოლოდ ცამეტი კაცი გამოცხადდა და მალაფეევმა ისინი ქუთაისისაკენ წაიყვანა. გზად მალაფეევს უნდა დაეპატიმრებინა კიდევ ერთი სიაში აღნიშნულთაგანი, მაგრამ ის ორ თავის ნათესავთან ერთად კოშკში ჩაიკეტა და რაზმს სროლა აუტეხა. მაშინ რაზმმა კოშკს ალყა შემოარტყა და ცეცხლი წაუკიდა. კოშკში გამომწყვდელუნი იძულებულნი გახდნენ დანებებოდნენ.

მეფისნაცვლის მიხეილის ბრძანებით შეპყრობილთა ნაწილს გადასახლება მიესაჯა, ნაწილს კი პატიმრობა. გადასახლებელთა შორის იყვნენ გურმაჩ გასვიანი და ჩარგაზ ჯონაძეც, რომლებიც მალაფეევთან არ გამოცხადდნენ და ტყეში გაიხიზნენ. ეს ორი ადამიანი ვახდა ციტოვიჩის რაზმის სვანეთში მეორედ მოსვლის მიზეზი. რომლის შედეგადაც აოხრებულ იქნა სოფელი ხალდე.



ცისფერი ტბა ზღვირზე

1876 წელს ივლისში ლეჩხუმის მაზრის უფროსს გრინევსკიძეს აცნობეს, რომ მეფისნაცვლის ბრძანება გურმაჩი გასვიანისა და ჩარგაზ ჯონაძის დაპატიმრების შესახებ სისრულეში არ არის მოყვანილი. ამის გამო გრინევსკი პირადად გაემგზავრა ბეჩოში. ბეჩოში ადგილობრივ მთავრობასთან მოლაპარაკების შემდეგ გრინევსკი ხალდეში ავიდა „დამნაშავეთა“ დასაპატიმრებლად და თან ჯარი წაიყვანა მაიორ ლეუსის მეთაურობით. გზად მიმავალმა გრინევსკიმ სოფელ მულხაში „დამნაშავენი“ რომ ვერ დააპატიმრა, ერთი მათგანის ორი შვილი შეიპყრო და კალაში წაიყვანა. ხალხი აღაშფოთა ამ ამბავმა.

სოფელ კალიდან გრინევსკიმ მოლაპარაკება გამართა სოფელ ხალდესთან. ის მოითხოვდა ხალდელებს მისთვის გადაეცათ გურმაჩი და ჩარგაზი. მაგრამ ხალხმა მტკიცე უარი შეუთვალა. მაშინ გრინევსკიმ და გარნიზონის უფროსმა ლეუსმა ხალდისკენ ჯარი დასძრეს. გლეხობამ სოფლისაკენ მომავალი ჯარი რომ შენიშნა, ცოლ-შვილი სასწრაფოდ გახიზნა, ხოლო ვისაც ბრძოლის უნარი ჰქონდა, შეიარაღდნენ და კოშკებში ჩაიკეტნენ. მარტო მოხუცები უნდა შეხვედროდნენ გრინევსკის სოფლის შუაგულში.

ხალდელებს სისხლისღერა არ სურდათ. მათ უნდოდათ სამართალი მშვიდობიანი გზით ენახათ. მართლაც, ჯარის მოახლოებისთანავე მოხუცთა ჯგუფი გრინევსკის ეახლა და სთხოვა — ოღონდ სოფელს ნუ ააოხრებთ და რაც გინდათ, იმას შევასრულებთო. როდესაც ეს მოლაპარაკება წარმოებდა, ლეუსის ჯარისკაცებმა სოფელში თვალი მოჰკრეს ორ კაცს, რომელთაც კოშკში შესვლა ვერ მოეწერათ. ლეუსმა ჯარისკაცებს უბრძანა დაეჭირათ ისინი. ბრძანება შესრულებული იქნა. ჯარისკაცებმა ცემა დაუწყეს დაჭერილებს. მაშინ სევანებმა ხანჯლები იშიშვლეს და რამდენიმე ჯარისკაცი დაჭრეს. ჯარისკაცებმა ზიშტებზე ააგეს შეპყრობილნი.

კოშკებში მყოფმა გლეხებმა დაინახეს თუ არა ეს სურათი. საბოლოოდ დარწმუნდნენ, რომ გრინევსკი ავი ზრახვებით იყო მოსული და მასთან მშვიდობიანი მოლაპარაკებით ვერაფერს გახდებოდნენ. ამიტომ მომხდურს მათაც სროლა აუტეხეს და მოჰკლეს მაიორი ლეუსი და რამდენიმე ჯარისკაცი. იმავე საღამოს მოკლულ იქნა გრინევსკი და ბოქაულიც.

განრისხებულმა მთავრობამ ხალდეში დამსჯელი რაზმი გაგზავნა

გენერალ ციტოვიჩის ხელმძღვანელობით. ციტოვიჩის რაზმი 10 აგვისტოს ხალდეს მოადგა. ხალდელებმა სასტიკი წინააღმდეგობა გაუწიეს მომხდურს. ციტოვიჩის ყოველი ცდა ხალდელთა დამორჩილებისა უშედეგო იყო. გააფთრებული ბრძოლა რამდენიმე დღეს გრძელდებოდა. ამ ხნის განმავლობაში ხალდეს კოშკებს ყოველი მხრიდან უშენდა არტილერია. ალყაში მოქცეულმა ამბოხებულებმა იგრძნეს მოახლოებული მარცხი, ამიტომ ღამის წყვედიადში კოშკებს თავი მიანებეს და ტყეში გაიხიზნენ. ციტოვიჩის რაზმმა გადარჩენილი კოშკებიც ნაღმებით ააფეთქა, სახლები, გადაწვა და ღამაზი სოფელი ხალდე ნაკარტუტად აქცია.

ასეთი იყო ის უთანასწორო ბრძოლა, ასე დაინგრა სოფელი ხალდე. ამაზე შეიქმნა ხალდელთა ლაშქრული სიმღერა „გაურ-გავხე“, სადაც მოთხრობილია მტრის შემოსევისა და ხალდელთა გმირული ბრძოლის ამბავი. ამ სიმღერას დღესაც ალტაცებით მღერის ხალდელი ხალხი. საკმარისი იყო ამღერებული ალმაცვირის სახის დანახვა. რომ „გაურ-გავხეს“ ძალა ეგრძნო კაცს. რატომღაც ასე მგონია, რომ გურჯაჩი და ჩარგაჯი ალმაცვირის ჰგავდნენ შესახედობით. ვინ იცის, იქნებ მათ სახესაც ისე ამკობდა მტერთან ბრძოლაში მიღებული ნაჭრილობები!

„გაურ-გავხეს“ სხვა სიმღერები მოჰყვა და ბოლოს ხალდელები ცეკვაზე გადავიდნენ. აქაც ალმაცვირი სჯობდა ყველას. ეს ახოვანი ეაყკაცი მსუბუქად ცეკვავდა, ჯერ ხელები უკან ჰქონდა დაწყობილი და ისე ჩამოუარა: შემდეგ წინ გადმოიტანა, თითქოს ხანჯლის ტარს ჩასჭიდაო და ცერებზე გადავიდა. ჯიხვიით დაუარა ცერებზე ალმაცვირმა. როცა მეორედ შემოუარა წრეს, შედგა. ახლა სხვა მოცერულე შეენაცვლა მას...

კარგა ხანს გასტანა ლხინმა და მხიარულებამ. სუფრა ნაშუალამევს აიშალა. ამბერკის სტუმრები გამოგვემშვიდობნენ და წავიდ-წამოვიდნენ.

ცოტა ხნის შემდეგ მე აივანზე ვიდექი და ღამის ბინდში წმინდა კვირიკეს ეკლესიას ვაყუარებდი. მალე ენგურის ნაპირიდან სიმღერის ხმა წამოვიდა. შინისკენ მიმავალი ალმაცვირი და მისი ამხანაგები მღეროდნენ „გაურ-გავხეს“. თავისუფალი ხალდელები დღესაც ამ ლაშქრულით მიემართებიან თავისი საყვარელი სოფლისაკენ. სადაც მჩქეფარე სიცოცხლე ვერ ჩააქრო ცარიზმის ქვემეხებმა და:

ნაღმებმა. სიმღერა უფრო და უფრო შორიდან ისმოდა, თანდათანობით ყრუედებოდა, დაბოლოს მთლიანად მიწყდა, თითქოს ღამის წყვდიადმა შთანთქაო. ენგურის ქალებიდან მზერა ისევ კვირიკეს ეკლესიისაკენ გადავიტანე. განცალკევებით მდგარ გორაზე შუბისწვერივით ჩანდა კვირიკეს ეკლესია. მის თავზე კი შუქურა ვარსკვლავი კიაფობდა.

* * *

დილას ამინდმა გაგვახარა. ვისაუზმეთ თუ არა, მაშინვე წმინდა კვირიკეს ეკლესიისაკენ გავეწიეთ. სმენით ყველას გვესმოდა ამ ეკლესიის შესახებ, მაგრამ ნახვით არავის გვენახა. იგი აგებულია ენგურის მარცხენა ნაპირას, სოფელ დავებერის ცოტა ქვემოთ, მაღალ, განცალკევებულ გორაზე. ძველად აქ მონასტერი ყოფილა. ირგვლივ ტყეებია, უმეტესად ნაძვნარი. შემოგარენის ტყე საღმრთოდ ითვლება და ადგილობრივი მცხოვრებნი იქ დღეს წკეპლასაც არ სჭირან.

დასავლეთით ეკლესიას მიდგმული აქვს პატარა სამრეკლო, ხოლო სამხრეთით — უბრალო ქვის ოთახი. ეკლესიასი შესავალიც ამ ოთახიდანაა. ეკლესიას ქვიტყირის მაღალი კბილოვანი ზღუდე ჰქონია შემოვლებული, მაგრამ ის ახლა დანგრეულია.

სატრაპეზო ოთახები და სენაკები ქვემოთ ფერდობზეა გაშენებული, ისინი ეკლესიის ზღუდეს უერთდებიან. აქ წინათ თურმე ბერები ცხოვრობდნენ. ამჟამად კი ეკლესიის მცველების სადგომია.

კალის ეკლესიას წინათ დიდი მნიშვნელობა ჰქონდა. ის წარმოადგენდა ერთ-ერთ მთავარ სამლოცველოს სვანეთში. ყოველ თვის თავისი ეკლესია ჰქონდა უამრავი ჯვარ-ხატებით, მაგრამ მათში ყველაზე ძლიერად მაინც ეს — წმინდა კვირიკეს და ივლიტას ეკლესია ანუ „ლაგურკა“ მიაჩნდათ. აქ იყო ცნობილი ხატი, რომელსაც შალიანს უწოდებდნენ. ძველად ხალხს სწამდა შალიანის ხატის დიდი ძალა, ამიტომ დანაშაულში შემჩნეულ პირებს ამ ხატზე დააუციებდნენ ხოლმე. არ ყოფილა შემთხვევა, რომ „ლაგურკას“ ძლიერი ხატის წინაშე ვინმეს სიმართლე დაემალოს.

საინტერესო თქმულება არსებობს ამ ხატთან დაკავშირებით: ერთხელ იმერეთის მეფემ სვანეთიდან ასი ვაჟაკი გაიწვია და გეგუთის დიდი ველის მოთიბვა შეუკვეთა. მეფემ მთიბავებს ვაღა

დაუდო — ამა და ამ დროს უნდა დაამთავროთ თიბვაო. მთიბავეებს შორის ერია ვინმე შალიანი. შალიანმა მეფეს სთხოვა, მარტო მე მოვთიბავ მაგდენ ხანში ევგუთის მთელ ველს და, რაც მერე გთხოვოთ, ის ამისრულეთო. მეფე დათანხმდა. დაიწყო შალიანმა და დანიშნულ დროზე მართლაც მორჩა თიბვას. მეფე თავის პირობაზე იდგა. შალიანმა მას რჩეული ხატი სთხოვა გასამრჯელოდ. მეფემ შეასრულა შალიანის თხოვნა და ხატი მისცა. შალიანმა ხატი ვაცის ტყავში გამოხეია და სვანეთში წამოიღო. კალელებმა შეიტყვეს, რომ შალიანს ძვირფასი ნივთი მოაქვსო, დაუხედნენ გზაში და წაართვეს. როდესაც ვაცის ტყავში გახვეული ნივთი გახსნეს, შიგ ხატი აღმოჩნდა. კალელებმა არ იცოდნენ, სად დაესვენებინათ ხატი, ამიტომ ასე მოიქცნენ: ორი მოზვერი შეაბეს უღელში, უღელზე ბოძი დააკრეს, ბოძზე ხატი დაამაგრეს და მოზვერები თავის ნებაზე გაუშვეს. მოზვერებმა გადალახეს მდინარე ენგური, განმარტოებულ გორის ფერდობს აუყენენ და ხატი წვერზე აიტანეს. მაშინ ხალხმა აქ ეკლესია ააშენა და ხატი შიგ დაასვენა. ხატი საგანგებო სკივრში ინახებოდა აბრეშუმში გამოხვეული. წელიწადში ორჯერ, წმინდა კვირიკეს და ივლიტას დღეობაზე ხატს ამოიღებდნენ და გარეცხავდნენ. ნარეცხი წმინდა წყლად ითვლებოდა. ეს წყალი ხალხის რწმენით ყველაფერს შველოდა და არჩენდა. წყალს ასხამდნენ ლამაზ სპილენძის დოჭში ანუ თუნგში და სოფლიდან სოფელში ატარებდნენ, რომ ხალხი ხატის მაგივრად წმინდა წყალზე დაეფიცებინათ.

წმინდა კვირიკეს ეკლესია შიგნიდან თითქმის მთლიანად მოხატულია. ესაა ცალკეული სტენები წმინდანთა ცხოვრებიდან. კვირიკეს ეკლესიაში ინახება მრავალი ხის ჯვარი და სხვადასხვა ხატი, რომელთა დიდი ნაწილი ოქროთი და ვერცხლითაა მოჭედილი.

წმინდა კვირიკეს ეკლესიის ეზოდან ხელისგულივით მოჩანს მთელი კალის თემი — ენგურის ქალები, რომლებიც პურის ყანებითა და სათიბებითაა აჭრელებული. სათიბებში კალელი კოლმეურნე მთიბავეები გაშლილან. ჩვენს ყურადღებას იქცევს ეკლესიის ქვევით, ენგურის ბალახმრავალ ქალებში: გამართული მთიბავთა შეჯიბრი. 10-12 ვაჟკაცი ამოსდგომია ერთმანეთს მხარში. სერულის დასაწყისში ცელებს გაოლსავენ, ყოინას დასცემენ და შეუტევენ სათიბს. შემდეგ ხმაური თანდათანობით წყნარდება. მთიბავეები ბოლოში გადიან და ისევ თავიდან იწყებენ ყველაფერს.

ნასადილევს მთიბავეებმა სიმღერა დასძახეს. ხმა საკმაოდ შორიდან მოდიოდა და კარგად ვერ ვარჩევდით, თუ რომელ სიმღერას მღეროდნენ. ალბათ „ყანსავ ყიფიანეს“ ან „შაი დილის“. კარგა ხანს ვუცქირეთ ამ სურათს, შემდეგ ეკლესიის დარაჯს გამოვემშვიდობეთ, შინ დავბრუნდით და იმავე დღეს მესტიისაკენ განვაგრძეთ გზა.

ოპროგნოზლოგის დიდოსტატები


მესტია ულამაზესი თემია ზემო სვანეთისა. ის შედარებით გაშლილ ადგილას მდებარეობს. სწორედ აქ უერთდება მდინარე ენგურს მარჯვენა მხრიდან წყალუხვი შენაკადი მესტიაჭალა. მდინარე მესტიაჭალა სათავეს ღებულობს ჭალათის და ლეჩხორის მყინვარებიდან, გზადაგზა კი მრავალი შენაკადი უერთდება. ისინი დაქანებულ ფერდობებზე მოედინებიან და უხვად მოაქვთ შლამი.

ისტორიული წყაროებიდან ჩანს, რომ მესტია წარსულშიც ზემო სვანეთის ცენტრს წარმოადგენდა. მესტიის ისედაც ლამაზ მდებარეობას უფრო ამშვენებს ირგვლივ შემოჭარული მთები, რომელთა კალთებიც ტყითაა შემოსილი. აღმოსავლეთიდან მესტიას გადმოჰყურებს კეკლუცი თეთნულდი. სამხრეთ-დასავლეთით ჩანს ლაჰლას მთა თავისი უზარმაზარი მყინვარებით. ჩრდილოეთითაც მთებია აღმართული და მათ უკან დგას ზღაპრული უშბა. სამხრეთითაც ტყით შემოსილი ლამაზი მთებია...

მესტიაში ძირითადი სოფელია სეტი. რაიონული ცენტრის ძირითადად ამ სოფლის ტერიტორიაზეა გაშენებული. თვით თემის სახელწოდება „მესტიაც“ ამ სოფლის სახელიდან უნდა მომდინარეობდეს. ჩანს, სოფელ სეტს წარსულშიც წამყვანი მნიშვნელობა ენიჭებოდა. მას ჰქონდა მდიდარი ეკლესია, რომელშიც წინათ მონასტერი ყოფილა და ერთ დროს თავისი ეპისკოპოსიც ჰყოლია.

დღეს რაიონულ ცენტრს ქალაქური იერიც კი დაჰკრავს. ქუჩებში ხალხის სიმრავლეა. ზაფხულობით აქ შეხედებით სხვადასხვა ეროვნების ადამიანებს — ტურისტებს. მესტიაში მოზრდილი ტურისტებაა. ტურისტებს შორის არიან არა მარტო საბჭოთა კავშირის სხვადასხვა კუთხის მოქალაქეები, არამედ უცხოელებიც.

მესტიაში სასტუმროში დავბინავდით და შემდეგ ეთნოგრაფიული მუზეუმის დასათვალიერებლად წავედით.



მულახი, სოფ კომაში

მესტიის ეთნოგრაფიული მუზეუმი მოთავსებულია ყოფილი ეკლესიის შენობაში. ეს შენობა შედარებით ახალია. იგი აუშენებიათ ძველი სეტის ეკლესიის ადგილზე. მუზეუმი მდიდარია მასალებით. ჰყავს კვალიფიციური კონსულტანტებიც, მაგრამ ჩვენი კონსულტანტობა მუზეუმის გამგემ, კაკო კვიციანმა იკისრა. როგორც წესი, დათვალიერება უძველესი კულტურის ნაშთებიდან დავიწყეთ. მუზეუმში განსაკუთრებით მდიდრადაა წარმოდგენილი ბრინჯაოს ხანა. აღსანიშნავია, რომ სვანეთში საგანგებო არქეოლოგიური გათხრები ჯერჯერობით არ ჩატარებულა. ბრინჯაოს ხანის ექსპონატები ნაპოვნია ოქროს მოპოვებისას. ცნობილია, რომ დიდი სამამულო ომის დროს ცხენისწყლისა და ენგურის ბასეინებში ოქროს პოულობდნენ. საგანგებოდ მოწყობილი არქეოლოგიური გათხრები, ალბათ მდიდარ მასალას მისცემს მესტიის ეთნოგრაფიულ მუზეუმს.

მუზეუმში საპატიო ადგილი უკავია რაიონის მკვიდრთა ყოფაცხოვრების ამსახველ მასალას. აქ ნახავთ სხვადასხვა დროის ქალისა და კაცის ტანისამოსის ნიმუშებს, ქალის სამკაულებს და მამაკაცის იარაღს. განსაკუთრებით საინტერესოა ქალის სამკაულების განყოფილება. ვერცხლისა და ოქროსაგან დამზადებული სამკაულები აქაურ მცხოვრებთა მაღალ გემოვნებაზე მეტყველებს.

მესტიის მხარეთმცოდნეობის მუზეუმში ინახება მრავალი ძველი ქართული ხელნაწერი ძეგლი. მათ შორის იერუსალიმის დიდი კანონარი X საუკუნისა, რამდენიმე ოთხთავი. აღსანიშნავია ოთხთავი XII საუკუნისა, რომელიც გადაწერილია იერუსალიმში ივანე ქანცხლიანის მიერ და იქიდან გამოგზავნილი ფხტურერის მთავარანგელოზის ეკლესიის დეკანოზის ხელით. კაკო დიდი სიყვარულით გვიჩვენებს ყოველივე ამას და გვიყვება მათ ისტორიას. ასეთი კულტურის ძეგლები კიდევ მრავლადაა გაფანტული რაიონის ეკლესიებში. მხარეთმცოდნეობის მუზეუმი ახალი დაარსებულია. ფაქტიურად ის ჯერ კიდევ შექმნის მდგომარეობაში იმყოფება და ამიტომ ყველაფრის შეგროვება ვერ მოესწრო. პატარა შენობა იმ მდიდარ მასალასაც ძლივს იტევს, რომელიც ამჯერადაა დაგროვილი. კაკო გვაცნობს მომავლის გეგმებს. განზრახულია მუზეუმისათვის დიდი შენობის აშენება. ეს შესაძლებელს გახდის ეკლესიებში გაბნეული მასალის შეგროვებას და გამოფენას. მასალა კი თავსაყრე-

ლია. სხვას რომ თავი დავანებოთ, მარტო ოქრომპედლობის ბრწყინვალე ნიმუშები რად ღირს.

თუმცა ბევრი რამ ჯერ კიდევ არაა შეგროვილი, მაგრამ მესტიის მხარეთმცოდნეობის მუზეუმის ამ სახალ დათვალეიერებაც ნათელ წარმოდგენას იძლევა ძველ სვანეთში ოქრომპედლობის განვითარების მაღალ დონეზე. მაღალი გემოვნებით მოქედილი ჯვრები და ხატები ხელოვნების ბრწყინვალე ნიმუშებს წარმოადგენენ. სპეციალისტების აზრით, ამ ჯვარ-ხატების ცხრა მეთედი ადგილობრივად ამზადებული. ცხადია, სვანეთში ოქრომპედლობის განვითარებისათვის შესაფერისი პირობებიც უნდა არსებულყო. პირველ ყოვლისა, ამისათვის საჭირო იყო მასალა ე. ი. ოქრო. ოქრო კი აქ საკმაოდ ბლომად მოიპოვებოდა.

ისტორიული წყაროებიდან ჩანს, რომ ენგურისა და ცხენისწყლის სათავეებში მცხოვრებნი უძველესი დროიდან ეწეოდნენ ოქროს მოპოვებას. ბერძენი გეოგრაფი სტრაბონი, რომელიც ძველი წელთაღრიცხვის I საუკუნეში ცხოვრობდა, წერს, რომ ენგურისა და ცხენისწყლის ბასეინებში მთებიდან ნიაღვარს ჩამოაქვს ოქრო, რომელსაც ადგილობრივი მცხოვრებნი იღებენ. საინტერესოა ოქროს მოპოვების იმდროინდელი წესი. სტრაბონის ცნობით, ოქროს მოპოვებისათვის იყენებენ ნადირის ბეწვეულს, რომელსაც ქვეშ უგებენ დაჩვრეტილ თუნუქს, წყალი მიწას გარეცხავს, ხოლო ოქრო ბეწვებში რჩება. ოქროს მოპოვების ეს წესი არც ისე პრიმიტიულია და დღესაც შეიძლება წარმატებით იქნას გამოყენებული.

ცხადია, ოქროს მოპოვებას და შემდეგ მისგან რაიმე ნივთის გაკეთებას სათანადო იარაღებიც სჭირდებოდა. უდავოა, რომ ადგილობრივ მცხოვრებლებს ჰქონდათ ასეთი იარაღები. ადვილად შესაძლებელია ამ იარაღებსაც ადგილობრივად ამზადებდნენ. დაბოლოს, ოქრომპედლობის ამ საუკეთესო ნიმუშების შექმნას სჭირდებოდა მაღალი კულტურა. თუ გავითვალისწინებთ იმდროინდელ საქართველოში არსებულ ხელოვნების მაღალ დონეს, რომლის ერთერთ წამყვან დარგს ოქრომპედლობა შეადგენდა, მაშინ შემთხვევით ამბად აღარ მოგვეჩვენება ენგურისა და ცხენისწყლის ხეობებში მცხოვრები ქართველების მაღალი კულტურა, რომლებმაც საერთო ქართული კულტურის განვითარებაში თავისი წვლილი შეიტანეს.


გულისყურით ვათვალიერებთ ოქრომკედლობის დიდოსტატების ნახელავებს. ოქროთი მოქედილი ყოველი ჩვარი. ყოველი ხატი თავისებურია. ლამაზი და საინტერესო. მათზე ოსტატურადაა გაშოსახული სხვადასხვა სცენები წმინდანთა ცხოვრებიდან. მაგრამ არც ერთი მათგანი არ ამქლავნებს შემოქმედის ვინაობას. არსად არაა აღნიშნული ოქრომკედლის გვარი. დავიწყებას მისცემია ამ დიდოსტატთა სახელები.

მუზეუმში ინახება „ბედნიერ სვანეთის ერთობილი ხევის“ დროშა ლომის სახედ შეკერილი. როცა ცხენოსანს ეს დროშა ხელში უჭირავს და ცხენს მიაქენებს, მაშინ დროშა იბერება და ლომს ემსგავსება. განსაკუთრებით საინტერესოა ამ დროშის ტარის ბოლო. რომელსაც შუბის ფორმა აქვს. ეს ვერცხლისაა და ოქროთია შეფერილი. შუბის პირის ორთავე მხარეზე გამოსახული არიან „ერთობილი ხევის“ მფარველნი.

მუზეუმის ექსპონატთა დიდი ნაწილი სხვადასხვა ცნობილ პიროვნებას შეუწირავს სვანეთის ეკლესიებისათვის. ცნობილია, რომ საქართველოს მეფეები და ერისთავები უხვად ასაჩუქრებდნენ სვანეთის ეკლესიებს. აღსანიშნავია, რომ იფაოის ეკლესია დავით აღმაშენებლის მხატვრის მიერაა მოხატული: ლატალის მაცხვარიშის ეკლესია დიმიტრი პირველის დიოს 1142 წელს მჭოუნატავთ. კედელზე გამოსახულია თვით დიმიტრი, მისი გვირგვინის კურთხევის სცენა და მისი ერისთავები. დიდ ყურადღებას აქცევენ სვანეთში ეკლესიებს თამარ მეფე, რუსუდან დედოფალი და სხვები, ისინი ძვირფასი ხატებით ამკობდნენ მათ.

მუზეუმში ინახება გორგი მესამის ნაქონი სურა და სასანთლეები. ყველა ეს ამკარად მიუთითებს იმაზე, რომ მთის ქართველობა ყოველთვის მჭიდრო კავშირში იყო ბართან, ბარის ქართველობასთან. ისინი მხარდამხარ იბრძოდნენ მტრის წინააღმდეგ. ერთმანეთს ხელს უწყობდნენ სამეურნეო საქმეებში და ერთად ქმნიდნენ საერთო კულტურას.

მუზეუმს აქვს ახალი ცხოვრების ამსახველი ექსპონატებიც. რომლებიც ნათლად გვიჩვენებენ, თუ რაოდენ წინ წავიდა ცხოვრება ენგურის ხეობაში. თუნდაც მარტო ძველი და ახალი მესტია შეადარეთ ერთმანეთს. ძველი სეტი, სადაც კულტურულ დაწესებულებებიდან მხოლოდ ეს ეკლესია იდგა, სადაც ახლა მხარეთმცოდნეობის



მესტიის სოფლები

მუზეუმი მოთავსებული, და ახალი სეტი — მესტიის რაიონის ცენტრი, ახალი ადმინისტრაციული შენობებით, მაღაზიებით, კულტურის სახლით, კლუბით, მოასფალტებული ფართო მოედნითა და ქუჩებით. შეადარეთ და ნათელი გახდება ცხოვრების წინსვლა-ახლის უპირატესობა ძველთან.

ჩვენ ამოვედით ახალ მესტიაში. ძველი არ გვინახავს. მხოლოდ ძველთაძველი კოშკები თუ მოგვცემდნენ წარსულზე მკრთალ წარმოდგენას, მაგრამ, აი, მუზეუმი დაგვეხმარა და ნათლად დავინახეთ სვანეთის წარსული და აწმყო. ეს არის მესტიის მხარეთმცოდნეობის მუზეუმის დიდი ღირსება. ეს არის ამ მუზეუმის თანამშრომელთა დამსახურება.

* * *

მესტია ზღვის დონიდან ათას ხუთასი მეტრის სიმაღლეზეა. წინათ აქ ხილი იშვიათი იყო. ამაზე ისიც მიუთითებს, რომ დიდი ნამყენი ხეები არსად ჩანს. უმეტესად პანტა ან მაქალო დგას. ველურ ხილს წარსულში აქ დიდი პატივი უნდა სდებოდა. ამიტომაცაა, რომ ყანებში ხელუხლებლად დატოვებული დიდრონი პანტები. ცხადია, თავისი ჩრდილით ეს პანტები მოსაველს აზიანებდნენ, მაგრამ მეღრნე ამას ყურადღებას არ აქცევდა. რადგან პანტის ნაყოფი უფრო საჭიროდ მიაჩნდა.

დღეს კი მესტიის თითქმის ყველა სოფელში შეხვდებით პატარ-პატარა ბაღებს. ისინი უმეტესად ეზოებშია გაშენებული. მაგრამ გვხვდება მოზრდილი საკოლმეურნეო ბაღებიც. ჩანს, მეჩიღობას კარგი მომავალი აქვს.

მეორე დღეს ადრე ავდექით, გარეთ გამოვედით და აღმოსავლეთისაკენ გავიხედეთ. გვინდოდა, ერთხელ კიდევ გვენახა კეკლუცი თეთნულდი. მაგრამ თეთნულდი ღრუბლებში იყო გახვეული. გული დაგვწყდა. ვინ იცის, იქნებ ისე წავსულიყავით, რომ ეს პატარალივით კეკლუცი მწვერვალი ვერც კი დაგვენახა. თავს იმით ვინუგეშებდით, რომ კიდევ მრავალი ლამაზი მწვერვალის ნახვა მოგვიწევდა. მათ შორის ყველაზე მეტად გვაინტერესებდა უშბა. როდესაც კალიდან მესტიისაკენ მიმავალნი უღვირის ქედზე გადავდექით, უშბას ღრუბლების საბურველი ჰქონდა შემოხვეული. კარგა ხანს ვუცადეთ. ბოლოს უშბამ ღრუბლები გადაიყარა და მულახის ლამაზ

სოფლებთან აღებუქდეთ ის ფოტოფირებზე. თანაც იმ იმედით წა-
მოვედით, რომ მალე უშბასთან უფრო ახლოს მივიდოდით. და, აი,
ახლა ჩვენი გზა სწორედ უშბის ძირისაკენ მიემართებოდა.

უ შ ბ ა

კავკასიონის მწვერვალებს შორის უშბა გამოირჩევა ვაეკაცური
იერით. ის უფროს ძმასავით დაჰყურებს ზევიდან შხელდის, მაზერის
და ჩათინის მწვერვალებს. უშბას უმეტესად ნისლი და ღრუბელი
ახვევია. ხშირად ცის მოსარკულ გუმბათზე ღრუბლის ფთილაც კი
არსად ჩანს, მაგრამ უშბას ამ დროსაც ან შევლევა ყაბალახი შე-
მოუხვევია თავზე, ან ბოხოხი დაუხურავს. შორიდან ცქერით ძნე-
ლია ამ ბუმბერაზის გულისნადების გამოცნობა. დროდადრო უშბა
ტანს დაიბერტყავს და თვალწინ აღიმართება მრისხანე რაინდის სა-
ხით. ხანაც მხოლოდ სარკმელს გამოამტკრევს ღრუბლების საბურ-
ველში, ცალი თვალთ გადმოხედავს მდინარე დოლრას ქალებს და
ცალყბად გაუღიმებს იქაურობას. ამ დროს თვალთმაქც ქალს უფრო
ჰგავს უშბა. მახსოვს, ერთმა ბეჩოელმა ხანდაზმულმა გლეხმა ნა-
დირობის ქალმერთ ღალს შეადარა უშბა, როცა მან წუთით მოიხს-
ნა ღრუბლების პირბადე და ცალყბად გაგვიღიმა. ზოგჯერ, კოკისპი-
რული წვიმის შემდეგ. როცა ირგვლივ ყველაფერი ჭანღში და
ღრუბლებშია გახვეული, უშბას ამაყად აუმართავს ქალარა თავი
ღრუბლებს ზევით. გულმოსულ ცას ხშირად დაუყრია სეტყვა და
ხოშკაკალი ურჩი რაინდისათვის, მაგრამ ქედი მაინც ვერ მოუხრე-
ვინებია. სეტყვით შექალარაებული უშბა ომებში გამოვლილ მრავ-
ალნაცად გოლიათს ჰგავს.

სხვაზე უკეთ უშბას გულადი ალპინისტები იცნობენ. ყველა
ერთხმად აღიარებს, რომ ის მრისხანე ბუმბერაზია, რომელთან შებმა
მხოლოდ რჩეულებს შეუძლიათ. მიუხედავად ამისა, ალპინისტებს
უშბა მაინც ყველა მწვერვალზე მეტად უყვართ. მე მინახავს, თუ
როგორი მოკრძალებით და სიყვარულით შესცქერიან ახალგაზრდა
ალპინისტები უშბას დოლრას ქალებიდან. მათ თვლებში ახალგაზრ-
დული ჟინი ელავს, რაც ძალაუვნებურად გარწმუნებს, რომ რამდე-
ნიმე დღის შემდეგ ისინი მართლაც შედგამენ ფებს უშბის წვერზე.


უშბას მოუყირკებელი სიყვარულით უყურებს ადგილობრივი ხალხი. წარსულში მრავალი თქმულება შექმნილა უშბასთან დაკავშირებით. ზოგი მათგანი ხალხს დღემდე შემოუნახავს. ამ ლაშავ თქმულებებში ერთი მაინც ყველას სჯობს:

დალი და ბეთქილი

განთქმული ვაჟკაცი იყო ბეთქილი. უშიშარი და უდრეკი, ახოვანი და ლაშავი. ბევრი გასათხოვარი ქალი ათენებდა ლამეებს მასზე ოცნებაში. მაგრამ ბეთქილი ნუგეშს არავის აძლევდა და მოზღვავებულ ენერგიას შრომასა და ნადირობაში ხარჯავდა. ხან სირბილში ეჭიბრებოდა ტოლ-ამხანაგებს. ხან ქვის ან ისრის ტყორცნაში ცდიდა მკლავს. ხანაც კიდაობაში მონაწილეობდა. ყველგან პირველი იყო ბეთქილი. ბადალი არ ჰყავდა. ხალხიც უსაზღვრო სიყვარულით შეჰყურებდა მის საამაყო და საიმედო შვილს. ვისაც გაუჭირდებოდა, ბეთქილი იქ იყო; მისი ძლიერა. მადლიანი მარჯვენა ყველგან სწვდებოდა და ყველას გულს იცებდა.

ნადირობაშიც არ ჰყავდა ტოლი ბეთქილს. მისი ისარი მიზანს არ სცდებოდა. მის თვალს არაფერი გამოეპარებოდა. კლდეს ჭიხვივით გადაევლებოდა და მუხლიც ჭიხვივით მოუღლეელი ჰქონდა. ხელცარიელი შინ არასდროს ბრუნდებოდა. მისი ნანადირევი მთელი სოფელი ეუთვნებდა იყო.

ერთხელ ბეთქილი უშბაზე წავიდა სანადიროდ. დიდხანს უნაყოფოდ იარა. ასე არასდროს მოსცარვია ხელი. ჭერ იყო და არჩვების ჯოგს გამოუცდელ მონადირესავით წაადგა თავს და დააფრთხო. შემდეგ ჭიხვებმა ჩაურბინეს ვერღაო და მშვილდ-ისრას მომარჯვებაც ვერ მოასწრო, ისე ამოეფარნენ თვალს. შუადღემდის იხეტიალა და ბოლოს გადაწყვიტა, შინ ხელცარიელი დაბრუნებულიყო. მაგრამ ესეც უმძიმდა სახელმოხვეჭილ მონადირეს. ეშინოდა — ვაითუ სახელი გამიტყდესო. მის ახალგაზრდა გულს კაეშანი ღრუბელივით ემოეხვია; დაჭდა და უძლურივით დაიწყო ცქერა აქეთ-იქით, სწორედ ამ დროს ბეთქილის თვალწინ თითქოს კლდემ მკერდი გახსნა და იქიდან ჭიხვი ამოვარდა. აი, ჭიხვი უკვე ქარაფებზე გარბის და ბეთქილი გაოცებული შეჰყურებს სასწაულებრივ სურათს. მერე მშვილდ-ისარს დასტაცა ხელი და ჭიხვს დაედევნა. კარგა ხანს სდია ნადირს



ენგურის ხეობაში მცენარე კლდებზე კი იკიდებან ფესუს

ვაჟკაცმა და გადმოკიდებულ კლდეებსა და თვალშეუდგამ ქარაფებში შეჰყვა. კლდეთა თავებიდან გადმოვარდნილი ჩახჩქერები თეთრი ქაფივით მოედინებოდნენ ჰაერში და ქვევით მტვერივით იბნეოდნენ ლოდებზე.

როგორც კი აქ შემოდგა ფეხი, ჯიხვი თვალთაგან გაუქრა ბეთქილს. ის ახლა გაოცებული იდგა ბუნების გრანდიოზული სურათის წინაშე. მყინვარების ზედაპირიდან არეკლილი მზის სხივები ლურჯად ღებავდნენ გამჟვირვალე ჰაერს. უამრავ ცისარტყელას ათასფრად მოექარგა უშბის გოლიათური მკერდი.

უცებ რაღაც ძლიერმა შუქმა მიიზიდა ბეთქილის ყურადღება. ყველაზე დიდი ჩანჩქერის ბოლოდან მოდიოდა ეს შუქი. იქით მიიხედა ბეთქილმა და გული შეუქანდა. ჩანჩქერთან იდგა ტანშიშველი ქალღმერთი დალი და ოქროსფერ თმას ივარცხნიდა. ვაჟკაცი ერთბაშად მოიხიბლა. დალის სილამაზეზე ბეთქილს ბევრი სმენოდა, მაგრამ თუ ესოდენ მომხიბვლელი იქნებოდა, ვერ წარმოედგინა.

ერთ ხანს ასე, ბეთქილისაქენ ზურგშექცევით იდგა დალი. შემდეგ ნელა შემობრუნდა და მისი ტანის სილამაზით დატყვევებულ ვაჟკაცს გულისმწველი ღიმილი ესროლა. ამ ღიმილს კი ვეღარ გაუძლო ახალგაზრდა ვაჟკაცმა. ბეთქილმა პირველად იგრძნო ქალის სილამაზის ძალა. ადგილს მოსწყდა, ქალთან მიიბრინა და მის ფერხთით დაემხო. დალმა ალურსი არ დააკლო სანაქებო ვაჟკაცს, და ხალხის საამაყო შვილი დაითანხმა სამუდამოდ მასთან დარჩენილიყო კლდეთა, ყინულთა და ნადირთა სამეფოში.

პირველად ქვეყანაზე უბედნიერეს კაცად თვლიდა თავს ბეთქილი. ულამაზესი დალის ალერსით და ტრფობით გამთბარი მისი გული ხარობდა და ჰყვოდა. ნადირის ძებნაც აღარ სჭირდებოდა. ჯიხვთა და არჩვთა ჯოგები გარს ეხვეოდნენ მათ; ახლოს მოდიოდნენ და ხელებს ულოკავდნენ, როგორც ნადირთა პატრონ ქალღმერთს, ისე მის საყვარელს. დალის სამფლობელოში კლდეებიც კი ჰყვოდნენ. ერთად იფურჩქნებოდა ვარდი და ია; ერთდროულად იგრძნობოდა გახაფხულის სიბოძო და სურნელება, ზაფხულის ძალა და მცხუნვარება, შემოდგომის ბარაქა და ზამთრის ვაჟკაცური სუსხი. ბეთქილიც კმაყოფილი იყო ბედით და თავის სატრფო დალთან ერთად დროს ღვინსა და სიხარულში ტარებდა.

მაგრამ დრო გადიოდა და ბეთქილს ხასიათი ეცვლებოდა. ქალ-

ღმერთის სამფლობელოში ცხოვრება მიწის შვილისათვის თანდა-
თანობით მოსაწყენი გახდა. სევდას შეიპყრო. ჯერ შეუძმნეულად
შეეპარა გულს კაეშანი, ხოლო შემდეგ ერთბაშად იმატა და ვაჟ-
კაცი მწარედ დააფიქრა. ბეთქილს მიენატრა თავისი სახლ-გარი,
თავისი ხაოხი, მოენატრა საყვარელი დედ-მამა, დები და ძმები, მოე-
ნატრა თავისი სოფლის მთა-გორები, ტყე და მინდვრები. უკვე უწინ-
დებურად აღარ ახარებდა ნადირთა ჯოგებში თავისუფალი ნაეარდი.
არც კლდეთა, ყინულთა და ჩანჩქერთა სილამაზე ატკობდა მის
თვალს, მაგრამ ცდილობდა დალთან ყოველთვის მხიარული ყო-
ფილიყო. სევდას გულში ღრმად მალავდა.

ბრძენი და შორსმჭვრეტელი იყო ქალღმერთი დალი. მას არ
გამოჰპარვია ბეთქილის ხასიათის ცვლილება. დალის გამჭვრიახი თვა-
ლები ვაეკაციის გულში იხედებოდნენ და იქ ყველაფერს კითხულობ-
დნენ. ერთ ხანს დალი მოთმინებით იცდიდა. ფიქრობდა, ბეთქილი
თვითონ გამანდობსო გულის წადილს. მაგრამ, როცა შეატყო, რომ
ბეთქილი ხმას არ იღებდა თავის გასაქირზე, მაშინ გადაწყვიტა ისევ
თვითონ დაეყო.

ერთ მშვენიერ დღეს დალი და ბეთქილი, ჩვეულებრივ, ერთ-
მანეთის ცქერით და ხვევით ტკებუოდნენ. ბუნება მათ ნეტარებას
შეჰხაროდა. მზეს ცისარტყელებით მოექარგა არემარე. სალი
აღდეები ლაღად გუგუნებდნენ ქალღმერთი დალის და მისი საყვარ-
ლის სადიდებელ ჰიმნს. ბროლივით კაშკაშა ჩანჩქერები სულის
ნაამებელ სიგრილეს აფრქვევდნენ სივრცეში. მიჯნურებთან ახლოს
მოსულიყვნენ ჯიხეთა და არჩეთა ჯოგებიც. ძონისთვის თავი მიე-
ნებებინათ და ყელმოლოერილნი შეჰყურებდნენ ტრფალების ზღვა-
ში მტურავ პატრონს. ჯიხვის ორი პატარა ნუკრი კი ფეხებს ულოკავ-
და მათ. თავდავიწყებამდე შეყვარებული ბეთქილი უსაზღვრო
ერთგულებას ეფიცებოდა თავის ქალღმერთს. ამ დროს მას სხვა
ყველაფერი დავიწყებოდა. გულის კაეშანიც თითქოს საღლაც მიმ-
აღლიყო და სულს სევდა აღარ უღრღნიდა.

დალი ჯერ მიამიტად ნებდებოდა ვაეკაციის ძლიერ მკლავებს
და თვითონაც ნეტარებდა. შემდეგ, თითქოს რაღაც მოულოდნელმა
აზრმა გაუელვაო თავში, ბეთქილის მკლავზე მიყრდნობილი თავი
მალლა ასწია და სატრფოს თვლებში ჯიუტად ჩახვდა.

შეკრთა ბეთქილი. ეუცნაურა დალის საქციელი. არ იცოდა, რას ნიშნავდა ყოველივე ეს.

-- შენს გულში სევდას ვხედავ, ბეთქილ, — მოესმა მას დალის დინჯი სიტყვები.

— შენ ყოვლისმხილველი ხარ, დიდო ქალღმერთო. — 'შეპლადა ბეთქილმა და ფერხით ჩაუვარდა იმას, ვისაც რამდენიმე წამის წინ ეხვეოდა.


— მერე რატომ არ გაანდობ გულისტქმას შენს მეგობარს, შენს დალის, — ამჯერად უკვე დაყვავებით გაისმა დალის ალერსიანი ხმა. მან თავისი თლილი თ. თები ბეთქილის ხშირ თმაში ჩარგო და მისი თავი მკერდზე ნაზად მიიხუტა.

გატყდა ბეთქილი. მან ყველაფერი ვულფხაზდღილად უთხრა დალის და ბოლოს სთხოვა — ცოტა ხნით სახლში გაეშვა. „დედ-მამას და ნათესავეებს მოვინახულებ და მალე დაევრუნდებიო შენთან“. ბოლო სიტყვებსაც გულწრფელად ეუბნებოდა ბეთქილი, რადგან დალის გარეშე ცხოვრება შართლაც ვერ წარმოედგინა მას.

ქალღმერთმა დალიმ შეიწყნარა ბეთქილის თხოვნა და შინ გაუშვა, მაგრამ იმ პირობით, რომ მალე ისევ დაბრუნდებოდა კლდეთა ყინულთა და ნადირთა სამეფოში.

დაბრუნდა შინ ბეთქილი. ხალხი ზეიმით შეხვდა საამაყო შვილის გამოჩენას. გაიმართა დიდი ღრეობა. ბეთქილის გულიც უსაზღვროდ ხარობდა სამშობლოს, ხალხის და ახლობლების ხილვით. მაგრამ სადარდებელიც ბევრი დახვდა შინმობრუნებულს. ხალხს ძვირად დასჯდომოდა ბეთქილის მიერ ქალღმერთ დალისთან ტყბილად გატარებული დრო. საუკეთესო ვაჟკაცის დაკარგვა ელვისებურად მოსდებოდა კიდით-კიდეს. რჩეული ვაჟკაცები ბეთქილის საქმბრად წასულიყვნენ უშბის კალთებზე. მოულოდნელად ამოვარდნილიყო გრიგალი. ცას შუბლი შეეკრა და მთებისთვის მეხთა სროლა აეტეხა. მძებნელებთაგან ზოგი უგზო-უკვლოდ დაკარგულიყო, ხოლო ზოგიც გრიგალს უფსკრულებში გადაეყარა. შინ თურმე ცოტადა დაბრუნებულა.

მიხვდა ბეთქილი, რომ ყველაფერი ეს დალის ნამოქმედარი იყო. მან დასძრა გრიგალი, რომ ნაპრალეებში და ხრამებში გადაეჩინება ბეთქილის საქმბრად წამოსული ხალხი. მიხვდა და მის გულში დალის სიყვარულაც გაჰქრა. კლდეთა და ჯიხეთა სამეფოში დაბრუ-



კვლევა თეთნულდმა ხეა ტოტებს შორის გამოიხედა.

ნებაზე ფიქრიც აღარ უნდოდა. გადაწყვიტა, მთელი ძალ-ღონით თავის ხალხს მიშველებოდა, მათთვის შეემსუბუქებინა კირი.

მალე ულამაზესი თანასოფლელის, თამარის. სიყვარულმაც დაიბუღა ბეთქალის გულში. თამარსაც შეუყვარდა სანაქებო ვაჟკაცი და ბეთქილმა გადაწყვიტა ცოლად შეერთო ის.

გაიმართა დიდი ქორწილი. სამი დღე-ღამე გრძელდებოდა ღრეობა. ყველა ლხინობდა და ხარობდა. ბოლოს გამართეს შეჩიბრი ისრის სროლაში, შუბისა და ქვის ტყორცნაში, სირბილში, ხტომაში და კიდაობაში. ძალას და ღონეს არავინ იშურებდა. ყველა ცდილობდა პირველი ყოფილიყო. იყო წმაური და მოწონების შეძახილები.

სწორედ ამ დროს უშბის კალთებიდან ვეება ჩიხვმა ჩამოირბინა. უდიერმა ნადირმა ხალხი ორად გააპო, შუაში გაირბინა და ისევ უშბის კალთებს აჰყვა ზევით. პირველად ყველა გაშეშდა ამ სასწაულისაგან. ყველა განცვიფრებული შეჰყურებდა თავნედ ნადირს ბოლოს გამოერკვნენ და თავი დამცილებულად იგრძნეს. ატყდა ყიჟინა. ვინმე უნდა დასდევნებოდა ჩიხვს და ისრით გაეგმირა ის. მაგრამ ვინ შეძლებდა ამას თუ არა ბეთქილი? მთელმა ხალხმა ბეთქილისაკენ იბრუნა პირი და მას მიაჩერდა იმედის თვალთ. და ბეთქილი დაედევნა ჩიხვს. მირბის ჩიხვი და უკან მისდევს ფეხმარდი ბეთქილი. მისდევს ჩიხვს და თან უკვირს: ასეთი გაკათული გზები სხვა დროს არასოდეს ენახა უშბის მკერდზე. მის წინ ფართო გზა იშლება, უკან მოიხედავს და გადაკიდებული კლდეები ჩანან მხოლოდ. მიხვდა ბეთქილი, რომ ესეც დალის ნამოქმედარი იყო, მაგრამ რას უშველიდა. უკვე გვიანი იყო. ბეთქილს მისდაუნებურად დალის სამეფოში ამოეყო თავი. მაშინვე ჩიხვიც გაქრა და მის ნაცვლად ქალღმერთი დალი გამოჩნდა. ცბიერი და დამცინავი სახე ჰქონდა მას. ბეთქილისათვის ცხადი გახდა, რომ გაბოროტებულმა ქალღმერთმა ყველაფერი ეს შურისძიებისათვის გააკეთა. ადგილზე შემოტრიალდა და უკან, უშბის ძირას შეგროვილ თავის ხალხს გადმოსძახა:—შშვიდობით, ჩემო ხალხო! მე ქალღმერთმა დალიმ დამლუპა და აწი ველარ მიხილაეთ. ახლა ერთი თხოვნა შემისრულეთ და უკანასკნელად მაჩვენეთ თქვენი ვაჟკაცური ფერხულიო. ხალხმა მაშინვე შეჰკრა წრე. ერთმანეთს ჩაეკიდნენ და

იწყეს ფერხული. ფერხულით დაიტირეს ქალღმერთ დალისგან დაღუპული მათი საყვარელი და საამაყო შვილი ბეთქილი.

ახლა ჩემმა ცოლმა იცეკვოსო — კიდევ ერთი თხოვნა გადმო-სძახა ბეთქილმა. თვალცრემლიანი თამარი წრეში გამოვიდა. ამან კიდევ უფრო აანთო გაბოროტებული დალის გული და კლდეზე გადმოკიდებული ბეთქილი უფსკრულში გადაჩნდა.

დაიღუპა გმირი ბეთქილი. მაგრამ ხალხმა გულში ღრმად შეინა-ხა საყვარელი შვილის ხსოვნა. მას სწამს, რომ ბეთქილის ფეხის დანადგამი ბილიკები ახლაც ატყვია უშბის კლდოვან მკერდს. ბეთქილის ძვლები ახლაც თეთრად ჩანან უშბის მწვერვალებზე. კედელი კი მისი სისხლითაა შეღებილი.

მეგზურობიდან ოსტატობისაკენ

დასაბამიდან მრისხანედ გამოჰყურებს უშმა მდინარე დოლ-რას, მესტიის და ენგურის ქალებს, სადაც ცხოვრება, ბუნე-ბის მკაცრი პირობების მიუხედავად, მუდამ წინ მიდიოდა და ვითარ-დებოდა. აქ გულმაგარი და მუხლმაგარი ქართველები ოდითგანვე ამუშავებდნენ მიწას, მწყემსავდნენ საქონელს, უვლიდნენ ფუტკარს, პოულობდნენ ოქროს და მისგან ხელოვნების საუკეთესო ნიმუშებს ქედდნენ. სოფლის მეურნეობაშიც შემოქმედი იყო უშბისძირელი ქართველობა და ოქრომქედლობაც. ამის ნათელსაყოფად საკმა-რისია დავასახელოთ დოლის პური, რომლის წარმოშობის კერად მეცნიერება ბეჩოს თემს მიიჩნევს, ან შევიაროთ მესტიის ეთნოგრა-ფიულ მუზეუმში, სადაც გამოფენილია ოქრომქედლობის საუკეთე-სო ნიმუშები.

მეურნეობის კიდევ ერთ დარგს მისდევდნენ მთის მცხოვრებნი. ეს იყო ნადირობა. ნადირის ხორცი და ტყავი მნიშვნელოვანი ფაქ-ტორი იყო მათი არსებობისათვის. მთაში ცხოვრება და განსაკუთ-რებით ნადირობა მთამსვლელობის უნარს მოითხოვდა ადამიანისაგან. უდავოა, რომ უშბისძირელები ბრწყინვალე მთამსვლელები იყვნენ. უამისოდ წარსულში მთა მთლიანად მოსწყდებოდა ბარს და დაი-ღუპებოდა. უშბისძირელები არა მარტო ზაფხულში ახერხებდნენ კლდოვანი ბილიკებით ბარში ჩამოსვლას, არამედ ზამთარშიც გადა-ლაზავდნენ ხოლმე დათოვლილ ზეკარებს და ბარიდან მთაში აქონ-დათ მათი არსებობისათვის საჭირო ნივთები და პროდუქტები. პო-

ნადირებს ხომ სულ შემოვლილი ჰქონდათ კლდოვანი მთები, სადაც კი ნადირს შეეძლო ფეხის მოკიდება. მათი სანადირო ხელსაწყოები მუჯრა და თხილამური ნამდვილი სპორტული ხელსაწყოებია. მიუხედავად ამისა, ბოლო დრომდე უშბის წვერი მაინც მიუყარებელი იყო მთის მცხოვრებთათვისაც. ის ნადირობის ქალღმერთ დალის სამფლობელოდ ითვლებოდა და მოკვდავთაგან არავის შეეძლო ზედ ფეხის შედგმა, თუ არ სურდა, ლეგენდარული ბეთქილის ბედი გაეზიარებინა.

ვინ იყო ის მამაცი, რომელმაც პირველად შედგა უშბაზე ფეხი? გადაჭრით შეიძლება ითქვას, რომ ლიტერატურა ამ მხრივ უსამართლოა. ხშირად ამტკიცებენ, თითქოს ჩვენი მწვერვალები პირველად უცხოელებს დაეპყროთ. ისინი მართლაც მოდიოდნენ კავკასიონის მწვერვალების დასალაშქრავად. მაგრამ ვინ იყვნენ მათი მეგზურები? ვინ მიუძღოდა მათ მწვერვალებისაკენ? ესენი იყვნენ ბეჩოელი და სეტიელი ქართველები, უშბისძირელები, მუხლმაგარი მონადირენი. ასე მაგალითად, 1903 წელს მურათიბ კიბულანი უშბაზე წინ მიუძღოდა გერმანელ ალპინისტებს, რომელთაგან ერთი მძიმედ დაშავდა და მურათიბმა დიდის ვაი-ვაგლახით ჩამოიყვანა ბეჩოში. მურათიბის მსგავსი მეგზურები ბევრნი იყვნენ იმ დროს. ისინი არ იყვნენ პროფესიონალი ალპინისტები, მაგრამ ბუნებრივი მონაცემები — თვალის სისწრაფე, გულისა და მუხლის სიმაგრე საშუალებას აძლევდათ წინ გასძლიაოდნენ სახელმოხვეკილ მთამსვლელებს. გადაელახათ ყოველგვარი სიძნელეები და ბუმბერაზი მთების მწვერვალებიდან ამაყად გადმოეხედათ მშობლიური სოფლებისათვის. დიახ, ეს მეგზურები იყვნენ, რომელთაც პირველად შედგეს უშბაზე ფეხი. ცბიერ ქალღმერთ დალის სამფლობელო პირველად ბეთქილის მემკვიდრეებმა აიღეს.

საბჭოთა ხელისუფლების დამყარების შემდეგ ალპინიზმს ფართო გასაქანი მიეცა საქართველოში. გამოჩნდნენ თავკაცები, რომელთაც ამ დიდი საქმის ხელმძღვანელობა იკისრეს. უშბისძირელებიც აქტიურად ჩაებნენ ალპინისტურ მოძრაობაში. ქართველმა ალპინისტებმა პირველად კავკასიონის სხვა მწვერვალები თალაშქრეს, უშბაზე კი ბოლოს მიდგა ჯერი. ეს იყო 1933 წელს. ქართველი ალპინისტები აღიოშნა ჯაფარიძის ხელმძღვანელობით პირველად



მანგის და უშბა სოფილ უშბანარიდან.

ავიდნენ უშბაზე. ასვლაში მონაწილეობდნენ ალექსანდრა ჯაფარიძე, იაგორა კაზალიკაშვილი და გიო ნიგურიანი.

მეორე დიდი იერიში უშბაზე მიიტანეს 1937 წელს. მამაც უშბისძირელთა ჯგუფი, რომელშიც შედიოდნენ გაბრიელ, ბექნუ და ბესარიონ ხერგიანები, კიკიკო ჩართოლანი და მაქსიმე გვარლიანი, განგებ შერჩეული უძნელესი გზით — აღმოსავლეთის მხრიდან გულის შყინვარის გავლით ავიდა უშბაზე და ამით საქართველოს ალბინიზმის ისტორიაში საფუძველი ჩაუყარა ტექნიკურად რთული ასვლების კლასს.

დაპყრობილ იქნა უშბა, მაგრამ უსისხლოდ მაინც არ მოიხარა ქედი ამ მრისხანე ბუმბერაზმა. 1945 წელს მან შეიწირა ქართული ალბინიზმის სიამაყე ალიოშა ჯაფარიძე. მასთან ერთად დაიღუპნენ ქელეშში ონიანი და ნიკოლოზ მუხინი. მათ უნდა განეხორციელებინათ უშბა-შხელდის ერთდროული ტრავერსი, რომლის მსგავსი მანამდე არ იცოდა ალბინიზმის ისტორიამ. მაგრამ რამდენიმეჯერ დამარცხებულმა უშბამ ამჯერად გულის ბოლმა ერთბაშად ამოანთხია და თავისი შავი ჩოხის კალთები ქართველ ალბინისტთა სისხლითაც შეღება.

სისხლით შეიღება უშბის მკერდი, მაგრამ ქართველი ალბინისტები ამ მარცხს არ შეუშინდნენ. მათ მოწინააღმდეგე ერთხილ კიდევ გაზომეს და უშბა-შხელდის მწვეკრვალებთან კიდილისათვის უკეთ მოემზადნენ.

მომავლის ლეგენდა

გაივლის დრო, უშბას ისევ ამაყად ექნება თავი აშვერილი ღრუბლებს ზევით, ისევე ქუხილით იდენენ თავიანთ კალაპოტში დოღრა, მესტიაკალა და ენგური, ამ მდინარეთა კალებში თავისუფალი ცხოვრება კიდევ უფრო წინ წავა, ხალისით იმუშავენ სოფლის მეურნე, მოხნავს, დათესავს, ყანას მოიწვეს. მთების გულიდან ძვირფას მადნებს უახლესი ტექნიკის საშუალებით გამოიტანს ადამიანი, ცხოვრებას ახალ-ახალი სიხარული მოემატება და მაშინ ვინმე ბეჩოელი ხანდაზმული გლეხი ზამთრის საღამოს მოგუზგუზე ბუხარის პირს სხვათა შორის ერთ ლამაზ თქმულებასაც მოუყვება თავის შვილიშვილებს:

ხუთი მამაცი ქართველი ვაჟკაცი შეება უშბას და შხელდას. მათ უნდა გაევლოთ ცხრა მწვერვალი. მსგავსი ტრავერსი ალპინიზმის ისტორიამ მანამდე არ იცოდა. ამინდს პირველად კარგი პირი უჩანდა, მაგრამ ვაჟკაცთა გამგზავრებიდან მესამე დღეს ცამ შუბლი მრისხანედ შეიკრა. დასავლეთიდან ქარის მოდენილი ღრუბლების ფარა ჯერ უწესრიგოდ ძიპოიფანტა ცის ლურჯ გუმბათზე. შემდეგ მას მეორე, მესამე და, ვინ იცის, მერამდენე ასეთი ფარა მოჰყვა. ყველა ერთმანეთში აირია, ერთმანეთს დაეჩახნენ და შეკქმნეს გამაყრუებელი ელ-ქექი. როდესაც განრისხებულმა ცამ პირველი მეზი ესროლა მთებს, მასთან ერთად ვაჟკაცის ცერის სიმსხო სეტყვის პირველი მარცვალიც დაეცა დედამიწას. მალე მიწის პირი ყინულის გუნდებით თეთრად დაიფარა.

სამუშაოდ გარეთ გასულ ხალხს უამინდობამ სახელდახელო თავშესაფარი მოაძებნინა. საბალახოდ გასული ნახირი ააფორიაქა. ააბლავლა და შინისკენ გამოდგნა.

სეტყვა კოკისპირულმა წვიმამ შესცვალა. ღვარცოფს მიჰქონდა არემარე. მთები შეიძრნენ. მრისხანე უშბა წელს ზევით მთლიანად ჯანლით შეიმოსა, თითქოს ამით შურიანი გულის ნადები აისრულა და მასთან შებმული ალპინისტთა ჯგუფი კაცთსამყოფელს შოსწყვიტა. ქარი უშბის წვერს მშრალ თოვლს აყრიდა, მკერდს თოვლ-ქუპას ახვევდა, ხოლო წელს ქვევით კოკისპირული წვიმა მოდიოდა.

მოიერიშე ჯგუფი უამინდობას სახელდახელოდ გამართულ კარავში შეეყუყუებინა. კარვის გამართვა კ. მათ იმ პატარა ბაქანზე მოასწრეს, რომელიც თვალშეუდგამ ქარაფებზე თითქოს ვილაციას ხელოვნურად მიუდგამსო. მყუდროებაც მეტი იყო ამ ბაქანზე, რადგან დასავლეთიდან მონაბერი ქარი თავზევით სცდებოდა მათ. სიძაგიეროდ. თოვლი და ხოშკაკალი ბარაქიანად იკიდებდა იქ ფეხს. მალე იმდენი ჩამოყარა, რომ თოვლიდან მხოლოდ კარვის თავილა ჩანდა. კარვის ბინადარნი შესასვლელთან თოვლს ხვეტდნენ, რომ ჰაერს შეელწია შიგნით. ამინდსაც აქედან უთვალთვალეზდნენ დროდადრო.


ოთხი დღე-ღამის განმავლობაში ცას შუბლი არ გაუხსნიდა. განუწყვეტლივ თოვდა და გაბმულად გაისმოდა ქარის გუგუნი, წივილი და ღრიალი. გააფთრებული ნადირივით დარბოდა გრივალი კლდე-ღრეებში. ის თითქოს თავგამოდებით ეძებდა უშბასთან შებ-

მულ ვაჟაკებს, ცდილობდა მათ თავშესაფარში შეეღწია და იქაურობა აეფორიაქებინა. მაგრამ მამაცად ხედებოდნენ კარვის ბინადარნი. კარვისთვის ბრძოლით წყდებოდა მათი ყოფნა-არყოფნის საკითხი და ისინი იცავდნენ მას. იცავდნენ მთელ ღამეს. ბოლოს გრიგალს ძალა აღარ ეყო, ის თანდათანობით მოეშვა, მოდუნდა და უკუიქცა. ამინდი გამოკეთდა. ალპინისტებმა იერიში განაგრძეს. ხახკლდოვანი ქარაფი გადაეღობებოდათ მათ, ხან ყინულის კედელი და ხანაც უფსკრული. მაინც მამაცურად მიიწევდნენ წინ თოკით ერთმანეთზე გადაბმულები, დაბრკოლებას დაბრკოლებაზე ძლევდნენ. ხან ერთი მიუძლოდა ჯგუფს, ხან მეორე. ამინდი წამდაუწუმ უარესდებოდა. ქარი კვლავ უბერავდა და ხოშკაკალს აყრიდა სახეში მოიერიშეებს. ხშირად მათი ბედი ბეწვზე ეკიდა. წონასწორობის ოდნავი დარღვევა და უფსკრულში გადაცვივდებოდნენ. მაგრამ ვაჟაკები ბეჭითად მიიწევდნენ წინ.

ამგვარი ჭაფით გაიარეს რვა მწვერვალი. საქმელი შემოელიათ. უამინდობამ დამხმარე ჯგუფთან კავშირი გააწყვეტინა. შიმშილი, ისიც მთაში, უღმობლად ასუსტებს ადამიანს. ის ყველაზე მეტად მუხლს აძაბუნებს, მაგრამ ხუთი გულადი მაინც შეუპოვრად მიიწევდა მიზნის დასასრულისაკენ. და აჰა! მთელი დღის ბრძოლით მათ დაიპყრეს მეცხრე მწვერვალიც. ახლა საჭირო იყო მწვერვალიდან დაშვება, მაგრამ უკვე საღამო ახლოვდებოდა და სადმე ღამის გასათევი ადგილი უნდა ეპოვათ. ამიტომ მწვერვალიდან ცოტა ქვევით დაეშვნენ და უნაგირაზე კარავი გამართეს.

მეორე დღეს ისევ გრიგალი ამოვარდა. მწვერვალიდან დაშვებაზე ფიქრიც არ შეიძლებოდა. კვლავ დასჭირდათ კარვის შენარჩუნებისათვის ბრძოლა. შიმშილიც უფრო და უფრო აწუხებდათ. გრძნობდნენ, რომ რალაც ბურანი ერეოდათ, მაგრამ ერთმანეთს ამხნეებდნენ. გადაწყვეტილი ჰქონდათ უკანასკნელ ამოსუნთქვამდე ებრძოლათ. მთელი დღე გაგრძელდა გრიგალთან ქიდილი. საღამოს ქარი ჩადგა და ამოსუნთქვის საშუალება მიეცათ. მათი ბედი მეორე დღის ამინდზე ეკიდა.

დილას ადრე გაღვიძათ, მაგრამ კარავში ხუთის ნაცვლად მხოლოდ ოთხნი იყვნენ. ერთმანეთს უხმოდ გადახედეს გაკვირვებულუბმა. სიჩუმე გაგრძელდა. ხმის ამოლებას ვერც ერთი ვერ ბედავდა ოთხივემ ზანტად დაიწყო საძილე ტომრებიდან ამოდრომა. შიმშილი-



Երևանի քաղաքի և հարևան լեռների տեսարանը:

საგან სხეული დამძიმებოდათ, თავბრუ ეხვეოდათ. როდესაც საძი-
ლე ტომრებიდან გამოძვრნენ, მაშინ კარვის კარი შეიხრა და მეხუ-
თე შემოვიდა. დამწუხრებული სახეები ყველას ერთბაშად გაუბრ-
წყინდა. თურმე მეხუთეს ყველაზე ადრე გაღვიძებოდა, ამდგარიყო
და გარეთ გასულიყო, რათა ამინდი შეემოწმებინა, დასაშვები გზა
შეერჩია.

როდესაც ოთხივე მოემზადა, რომ გზას დასდგომოდნენ. მეხუ-
თემ უბის ჯიბეში ჩაიყო ხელი და იქიდან შაქრის მოზრდილი ნა-
ტეხი ამოიღო. შაქრის დანახვისას დანარჩენებს გაკვირებისაგან
თვალეები გაუფართოვდათ, პირში ნერწყვი ჩაუდგათ. მეხუთემ აუჩ-
ქარებლად შაქრის ნატეხი მარცხენა ხელში დაიჭირა, მარჯვენით
შარვლის ჯიბიდან დანა ამოიღო, შაქრის ნატეხი ოთხად გატეხა და
ამხანაგებს დაურიგა. არც ახლა ამოუღია ვინმეს ხმა. ყველამ მორჩი-
ლად გამოართვა თავისი ნაწილი, ოუმცა იცოდნენ, რამ ეს შაქრის
ნატეხი ის უკანასკნელი ულუფა იყო, რომელიც სხვებმა ნაშინვე შე-
კამეს, მეხუთემ კი მთლიანად შემოინახა და გაკვირების ყამს ისიც
ამხანაგებს მისცა. როდესაც მწვერვალიდან უვნებლად ჩამოვიდნენ,
ყველანი აპობდნენ. ეს შაქრის ნატეხი რომ არ გვქონოდა, დავილუ-
პებოდითო. ასე გადაარჩინა ვაჟკაცის ნებისყოფამ და შაქრის ნატეხ-
მა ხუთი მამაცი ალპინისტი.

უშბის გმირი

ბეჩოს თემი. სოფელი უშხვანარი. აქ ცხოვრობს ალპინისტების
გულწრფელი მეგობარი და უხვი მასპინძელი დიასახლისი მაკრინე
ქურდიანი. მას ლამაზი და კეთილმოწყობილი კარ-მიდამო აქვს.
სახლის უკან მოლიანი სწორი მინდორია. ამ მინდორიდან ხელისგუ-
ლივით ჩანს ბეჩოს გადასასვლელი, მახერის. უშბის და ჩათინთაუს
მწვერვალები. ამიტომაც საღამოობით ამ მინდორში იკრიბებიან
ალპინისტები, გეგმებს ადგენენ და მთების სიღამაზით ტკბებიან.

მთების საღამო დარში ყველგან ლამაზია, მაგრამ სოფელ უშხვა-
ნარის საღამო მაინც უბადლოა. მდინარე დოღრას ქალებიდან
მზეს სხივები მთლიანად აუკრეფია. ირგვლივ მთების ჩრდილები
წევს. მხოლოდ ბუმბერაზები არიან შუქში გახვეულნი და ისიც წელს
ზევით. ცა მოწმენდილია. მარტო უშბის წვერზე ქანაობს ობოლი

ღრუბელი. ის ხან გაიწელება, აღმოსავლეთისაკენ გაგრძელდება და ქალის მანდილივით ფრიალებს ქარის ფრთებზე, ხანაც უშბის წვერს ირგვლივ შემოეხვევა, ხან მთლიანადც გაქრება. მაგრამ მალე ისევ უშბის წვერზე ამოყოფს თავს. უშხვანარში კი მაკრინეს ეზოში ალპინისტები შეკრებილან და ხვალინდელ დღეზე მსჯელობენ.

— ძია ბექნუ, ამინდზე რას იტყვი? — ეკითხება გამოცდილ მთამსვლელს ახალგაზრდა ალპინისტი. რუსთაველი ფოლადის მდნობელი იასონ ბერუაშვილი. ბექნუ ჯერ უშბას გახედავს, შემდეგ ლაპლასკენ შემობრუნდება. ლაპლას მყინვარებს მოსარკული ცა დასცქერის, მაგრამ ბექნუს თვალს არა გამოეპარება რა. მან ყველაზე დიდი მყინვარის თავზე შენიშნა პატარა ღრუბელი, რომელიც თითქოს მყინვარს გაპვლესოდა.

— აედარია მოსალოდნელი, — ამბობს ბექნუ და მზერა ისევ უშბაზე გადააქვს. იასონი გაკვირვებით შეჰყურებს ბექნუს.

— როდის გაფუქდება ამინდი?

— ხვალ.

— დიდხანს გაგრძელდება აედარი?

— ოთხი-ხუთი დღე.

— მამ გამოდარება არ გვლირსებია!

— რატომ არა, იწვიმებს, იწვიმებს და გამოიდარებს.

— ჩვენ კი ხვალ გვინდოდა იერიში დაგვეწყო უშბაზე.

— არ გირჩევთ.

იასონი უკმაყოფილოა. ის შუბლშეკრული იცქირება ლაპლას მყინვარისაკენ. ღურბინდსაც იმარჯვებს, მაგრამ გაავდრების აშკარა მანიშნებელს ვერაფერს ამჩნევს.

— ნუთუ ის ციქნა ღრუბელია გაავდრების ნიშანი? არ მჯერა, — დაასკვნის იასონი და ღურბინდს ახლა უშბისკენ მიმართავს.

— ენახოთ, — ხმადაბლა, ოდნავ შესამჩნევი ღიმილით პასუხობს ბექნუ და კიდევ ერთხელ გახედავს ლაპლასს.

— გაავდრდება, — ბეჯითად უმატებს ცოტა ხნის შემდეგ და ხილნარში შედის.

მეორე დღეს მზიანი დილა თენდება უშხვანარში, ახალგაზრდა ალპინისტები გახარებულნი არიან. მხოლოდ ბექნუ შეჰყურებს ექვით მოწმენდილი ცის გუმბათს და ჰორიზონტებს. იასონი რიხით დიაარება ამხანაგებს შორის, ხელში ღურბინდი უქირავს და მწვერ-

ვალებს ათვალეირებს. ახალგაზრდული სისხლი უდუღს და ყოველ წამს მზადაა უშბასთან შესაბმელად. აი, ჩაფიქრებულ ბექნუსაც ნათურა გვერდით.

— ძია ბექნუ, ხომ ვითხარით, არ გაავდრდება-მეთქი ბექნუს ელიმება.

— ვნახოთ. — ჩვეულებისამებრ მოკლედ პასუხობს ის და ისევ ლაპლას ზევრავს.

მზემ შუა ცაზე აიწია. ლაპლას მთაზე ღრუბელი თანდათანობით გაიზარდა. ის ჯერ მყინვარს მოსწყდა, ჰორიზონტს გაეკრა და, თითქოს ნიშანი მისცაო დანარჩენებს — ცოტა ხნის შემდეგ ღრუბლების მოზრდილი ფარა გამოჩნდა მთის გაღმვიდან. მალე დამხდური მათში გაერია და ნაშუადღევს ცის მთელი გუმბათი შავლეგა ღრუბლებით დაიფარა. ხოლო როცა მზე მთებს იქით ჩაიწურა, პირველი მეხიც გავარდა.

ვანშმის წინ მაკრინეს სამზარეულოში ცეცხლს შემოსხდომოდნენ ალპინისტები. გარეთ კოკისპირულად წვიმდა. ასეთ ამინდშ-ალპინისტებს წარსული ასვლების მოგონების საღერღელი აეშლე-ხათ ხოლმე. მათ ახსოვთ ამინდიც და უამინდობაც. მხოლოდ იასონი ვერ უდებს გულს ვერც მოყოლას და ვერც სხვის მონაყოლის მოსმენას. წამდაუწყუმ გარეთ იხედება. ამინდს სწყყევლის. ბოლოს ბუხრისპირს ჩაფიქრებით მჯდომ ბექნუსთან მიდის და მის გვერდით ჯდება:

— ახლა როდის უნდა გამოიდაროს!

— გამოიდარებს. — დინჯად აიმედებს მას ბექნუ და თან ელიმება.

— უშბაზე აუსვლელად რუსთავეში ვერ დავბრუნდები.

— მოესწრები. საამისო ამინდიც დადგება. იერიშის დაწყების წინ აჩქარება არ ვარგა.

ბექნუ ისევ ფიქრებში ჩაეფლო. ეტყობოდა, იასონის გულის-ტკივილს თვითონაც განიცდიდა. თვითონაც ხშირად ყოფილა ამ დღეში. მთამსვლელობა ჭაბუკმა დაიწყო. მალე ბრწყინვალე მთამსვლელის სახელიც მოიხვეჭა. ჯერ კიდევ 1937 წელს ჭაბუკი ბექნუ ხერგიანი გაბრიელ და ბესარიონ ხერგიანებთან, ჭიჭიკო ჩართოლანთან და მაქსიმე გვარლიანთან ერთად უძნელესი გზით იპყრობს უშბას და ქართული ალპინიზმისათვის მსოფლიო მნიშვნელობის



„წყალნიშნით დაქანებულნი აღმასებრ უფსკრულა ცვიინა“.

გამარჯვება მოაქვს. შემდეგ წარმატება წარმატებას მოჰყვება. არ არის კავკასიონზე არც ერთი ძნელად ასაღები მწვერვალი, რომელზეც ბექნუს ფეხი არ შეედგას. 1950 წელს ბექნუ ხერგიანი ივანე მართან, გოჯი ზურებონთან, კიკიკო ჩართოლანთან და მაქსიმე გვარლიანთან ერთად ძონაწილეობს შხელდა-უშბის საქვეყნოდ ცნობილ ტრავერსში. აქ მან გაიარა უძნელესი და ურთულესი გზა, რომლის გავლაც მრავალი სახელოვანი ალპინისტის ოცნება იყო. ის იყო მოწმე და მონაწილე შაქრის ერთი ნატეხის ამბისა.

ბექნუ პამირშიც იყო. აქაც უმაღლეს და ურთულეს მწვერვალებზე ავიდა. ბევრი აქვს მოსაგონარი. და, აი, ზის და იგონებს. ორონდ თავისთვის, უხმოდ.

— ძია ბექნუ, ძნელია ჩვენი მარშრუტი? — ესმის ფიქრებში წასულ ბექნუს იასონის კითხვა და სიამოვნებს, რომ ამინდიდან საუბარი სხვა თემაზე გადავიდა.

— ძნელია.

— მაინც რას შეედრება?

— ძნელია. ერთხელ ვცადეთ, მაგრამ ვერ ავედიო.

— როგორ, თქვენ ვერ ახვედით?!

— ვერ ავედიო.

— მირიდა ნუთუ შეუძლებელია?

— შეუძლებელი არაფერი არ არის. თქვენ აიღებთ იმ კედელს. თავმდაბალია და სიტყვათმოკლე უშბის გმირი. მას სწამს, რომ უშბის იმ კედელს, რომლის აღებაც ერთხელ თვითონაც სცადა და ვერ აიღო, ახლა ახალგაზრდები აიღებენ.

მზისა და თავისუფლების საღიღებელი ჰიმნი

ბინად ჩვენც მაკრინესთან დავდექით სოფელ უშხვანარში. აქვე იყვნენ ქართველი ალპინისტები სპორტის ოსტატ დიმიტრი ობოლაძის მეთაურობით. ისინი უშბაზე საიუბილეო ასვლისათვის ემზადებოდნენ. ოცდახუთი წლის წინათ, 1933 წელს, პირველად დაიპყრეს უშბა ქართველმა ალპინისტებმა. საიუბილეო კომიტეტის წევრობ ალექსანდრა ჯაფარიძე ამ პირველი ასვლის მონაწილეა. მას თმა უკვე თეთნულდივით გასთეთრებია, მაგრამ სიმტკიცე მაინც უშბისა აქვს შემორჩენილი.

ალპინისტებთან ადამიანს არ მოსწყინდება. უყვართ ობუნჯობა, სიმღერა, თამაში. მხოლოდ უამინდობას თუ შეუძლია მათი სახის მოლუშვა, მაგრამ არც მაშინ სხედან გულხელდაკრეფილნი. მწვერვალთან ახლოს მიდიან, გარს უვლიან და ზვერავენ მისადგომებს. ამასობაში დარიც დადგება. ალპინისტები დროს არ კარგავენ და მაშინვე იერიშს იწყებენ.

როდესაც ჩვენ უშხვანარში ჩავედით, ალპინისტები უშბის დასაზვერად იყვნენ წასულნი. გვიან სალაძოს დაბრუნდნენ შინ. ბევრი ხეტიალისაგან დაღლილიყვნენ, მაგრამ ჩვენს განზრახვას — ხვალ სოფელ გულისკენ გაგვესეირნა, მათაც მაშინვე დაუჭირეს მხარი

დილას ადრე ვისაუზმეთ და მაშინვე სოფელ გულისკენ გავუღეკით გზას. თუ ამინდი ხელს შეგვიწყობდა, გულის მყინვარზეც უნდა ავსულიყავით.

სოფელ მაზერის ზევით მდინარე დოღრა ორ შენაკადად იყოფა. მარჯვენა შენაკადი სათავეს ღებულობს მაზერის მთიდან, ბეჩოს. იქითა ქედისა და შდუგრას მთიდან. მარცხენა შენაკადი კი — უშბის ძირიდან, კერძოდ, გულის მყინვარიდან და უშბის პირდაპირ ჩამყოლი ტყით შემოსილი მთებიდან. გულისკენ მიმავალი გზა სწორედ ამ მარცხენა შენაკადის ნაპირს მიჰყვება.

წინ სახელოვანი ალპინისტი ბექნუ ხერგიანი მიგვიძღვის. ცხადია, გზას არ ავცლებით. ბექნუმ აქ ყოველი ბილიკი იცის. ის ზოგჯერ შედგება, გაგვაჩერებს და გვიყვება იმ მთის, იმ ხევის და იმ მყინვარის ამბებს. ჩვენს შორის არიან ბუნებისმეტყველების სხვადასხვა დარგის სპეკიალისტები. ზოგი კლდის ქანებს სინჯავს. ზოგი მცენარეულობას აკვირდება, ხოლო ზოგიც მწერებით და ფრინველებითაა დაინტერესებული. ერთი რამ მაინც ყველას ყურადღებას იქცევს: მცენარეულობით ესოდენ მდიდარ ტყეებში ფრინველთა სიმცირე ეცემა ადამიანს თვალში. საქმის მცოდნეები გვეუბნებიან, რომ, საერთოდ, ჩვენი ტყეები ღარიბნი არიან ფრინველებითო, ალბათ ასევე ღარიბნი არიან ეს ტყეები მწერებითაც. ამას ჩვენი ექსპურსიებიც გვიდასტურებენ. თუმცა ვულის გზაზე რამდენიმე საინტერესო მწერს და მათ მატლს მაინც გადავაწყდით.

ერთ ხანს რიყე-რიყე მივდივართ. შემდეგ მდინარე კვლავ ორ ტოტად იყოფა. მარჯვენა ტოტში ანკარა წყალი მოედინება, ხოლო

მარცხენაში — შავად ამღვრეული. ესეც ბუნების საოცრებაა. ორივე ტოტი თითქმის ერთიდაიგივე მთის ძირიდან დებულობს სათავეს და ერთმანეთისაგან კი სავსებით განსხვავდებიან. წუხანდელი წვიმის შედეგი არ არის ეს. წუხელ ყველგან წვიმდა. ბექნუ გვეუბნება, რომ „შავი ღელე“ ყოველთვის ამ ფერისაა.

გულისკენ მიმავალი გზა აქ ოდნავ მარცხნივ უხვევს და თეთრი ღელის ნაპირს მიჰყვება. მალე თეთრ ღელესაც მარჯვნივ ვტოვებთ და ტყეში შევდივართ. აქ გზა მოკლე აღმართით რალაც თავისებურ ქედზე ადის. ამ ქედის სიმაღლე თეთრი ღელის დონიდან 40-50 მეტრამდე იქნება და სიგანე კი არა უმეტეს 20-25 მეტრისა. შუაში სამარხილე გზა მიდის. გზის ორივე მხარეს ტყე გასდევს. ტყეში არის: წიფელი, რცხილა, ბალამწარა, მუხა და სხვა. ბოლოს ეს ქედი ერთბაშად იშლება და შედარებით ფართო მინდვრებში შევდივართ. აქ არის გულულების სათიბები და ყანები. კულტურული მცენარეებიდან უთესიათ სხვადასხვა სახის თუ ჭიშის ხორბლეული და კარტოფილი. ამ მინდვრებიდან ჩანს სოფელი გულიც.

სოფელი გული ზღვის დონიდან 1950-2000 მეტრის სიმაღლეზე მდებარეობს. ბეჩოს დანარჩენი სოფლები და კერძოდ უშხვანარო კი 1.500 მეტრის სიმაღლეზეა. სიმაღლეში 500 მეტრის განსხვავება ბევრ რამეში იჩენს თავს. გულში უკვე აღარ არის ისეთი ბაღები, როგორიც ეს სოფელ უშხვანარშია. სოფელი გული იმ ზონაშია, სადაც ტყის ზოლი თითქმის მთავრდება და სუბალპური და ალპური ზონები იწყება.

სოფელ გულში სულ თორმეტი კომლია. სოფლის თავში განცალკევებით დგას პატარა ეკლესია, რომლის ეზოში ნეკერჩხლების მოზრდილი კოროშია აქოჩრილი. სოფლის მარჯვნივ გულის მყინვარიდან მოედინება წყალუხვი ღელე, რომლის მარჯვენა ნაპირზე მუავე წყარო გამოდის. ეს ვედა სიცხარით უფრო სუსტია, ვიდრე მესტიის ან ბეჩოს თემის ვეძები. საერთოდ, აქ ძირითადად ორი სახის ვეძას არჩევენ. შედარებით უფრო ცხარეს, რომელშიც გაზი მეტია, „სგიმს“ ეძახიან. ხოლო ნაკლებ ცხარეს, ე. ი. სოსტგაზიანს — „მორელს“. გულის ვედა სწორედ მორელია.

სახლები გულში უმეტესად ახალი ტიპისაა. სოფელში არის ოთხწლიანი სკოლა. სწავლის გასაგრძელებლად ბავშვები ჩამოდიან ბეჩოს სამუშალო სკოლაში. ეტყობა, გულელ ახალგაზრდებს წიგნო



შხ. ტყე და ჰავა.

უყვართ. რამდენიმე ადგილას დავინახეთ დერეფანში მჭდარი ვაჟი თუ ქალიშვილი გაშლილი წიგნით ხელში. აი, ერთი ბიჭუნა წისქვილში გამოუტანიათ, წისქვილის კართან ქვაზე ჩამომჭდარა და გატაცებით კითხულობს მიხეილ ჯავახიშვილის „არსენა შარაბდელს“. მას ხელს არ უშლის დოღაბის ტრიალით გამოწვეული ხმაური და სარეკელას ჩხაკუნს.

ჩვენი ყურადღება მიიქცია იმ ფერდობის რელიეფმა, რა მელზეც სოფელია გაშენებული. ეს ფერდობი ერთგვარად ამოწეულია მთის ფართო მკერდიდან და თითქმის მართლაც გულის მოყვანილობისაა. იქნებ ამიტომაც შეერქვა სოფელს „გული“. ყოველ შემთხვევაში, გულელს შეუძლია თამამად გაიმეოროს პოეტის სიტყვები:

„მთის კალთაზე სახლი მედგას,
ხეც ხარობდეს ათიოდე,
იისფერად განუწყვეტლად
ცაში კვამლი ადიოდეს.
გასახრდელი ბიჭი მყავდეს,
გოგო მყავდეს თაფლის თვალი,
შავგვრემანი მამას ჰგავდეს,
დედას — მისი თეთრი ქალი“

კარგი ხატვრაა! გულელი ვაჟაკები ნამდვილად წარმოსადგენი არიან, წელში გამართულნი და სახეგახსნილნი: ეტყობა, უყვართ ბავშვებიც. ყოველ ეზოში სამი ან ოთხი პატარა დარბის. ყველას კარგად აცვია. ერთ ეზოსთან ვჩერდებით. ბექნუს ნაცნობი ოჯახია. თვით ბექნუს ხომ აქ პატარა ბავშვებიც იცნობენ. შინ მხოლოდ დიასახლისი იყო და გულით მიგვიპატიჟა. ჩვენ საამისოდრო არ გვქონდა და ზრდილობიანი მადლობა გადავუხადეთ. სწორედ ამ დროს უკნიდან ვაჟაკური ხმა შემოგვესმა:

„გზაში რატომ დგახართ, შინ შებრძანდით!“

მივბრუნდით და ახოვანი ლამაზი ვაჟაკი დავინახეთ. ცხვირსახოცი თუბლზე ოფლს იწმენდდა. მარცხენა ხელი დატვირთული ცხენის აღვირისათვის ჩაევლო. ბეჩოს მალაზიაში ხორბალი უყიდია და ოჯახში მოიტანა. კარგი პურ-მარილი მოგველის სტუმართმოყვარე გულელებთან, მაგრამ ჩვენ გადაუღებელი საქმე

გვაქვს და გზას განვაგრძობთ მყინვარისაკენ. გვინდა, რაც შეიძლება ახლოს მივიღეთ უშბასთან, კარგად დავინახოთ მწვერვალთა მეფე.

გულის მყინვარიდან დაბრუნებულებმა მდინარე დოღრას ქალებს საღამოს ვუწიეთ. მზე უკვე დასავლეთის მთებს აძოფარებოდა და მისი სხივები მხოლოდ უშბის და მაზერის წვერებს ანათებდა. ივეულებრივი შეუპოვრობით მოღელავდა ხმაურიანი დოღრა, მოაგორებდა ლოდებს და ერთმანეთზე ახეთქებდა მათ. მუხლის მოსასვენებლად მდინარის ნაპირას ბექის თავზე ჩამოვსხედით. ამ დროს მაღლიდან სიმღერის ხმა მოგვესმა, რომელიც ხან წყდებოდა და ხან ისევ გაისმოდა, თითქოს ქარის ტალღებს მოჰქონდა ეს ხმა. დავინტერესდით, ყველანი ფეხზე წამოვდექით და გაღმა ქალებში დავიწყეთ ცქერა. მომღერლები არ ჩანდნენ. ხმაზე ეტყობოდა, რომ გუნდი მღეროდა, მაგრამ სად? ცნობისმოყვარეობამ აგვიტაცა და მაღლობზე ავედით. ახლა მთელი სიგრძით გამოჩნდა დოღრას იქითა მხარე სოფელ მაზერიდან ბეწოს იქითა ქედის ძირამდე მომღერლები მალე დავინახეთ. შდუგრას მთის ძირში შეგროვილიყვნენ კოლმეურნე მთიბავეები და სახლში წამოსვლის წინ მღეროდნენ მზისა და თავისუფლების სადიდებელ ჰიმნს „ლილეს“. მაღლობზე მდგარი დოღრას ნაპირიდან შედარებით დაშორებული ვიყავით და ამიტომ სიმღერის ხმაც უკეთ აღწევდა ჩვენამდე. გუნდის ხმას აძლიერებდა მთების გამოძახილი. ისეთი შთაბეჭდილება რჩებოდა, თითქოს უშბაც ფერხულში იყო ჩაბმული და თავის ძლიერი ხმით ბანს აძლევდა მომღერლებს. მაზერსაც მხარი მოება მათთვის და შდუგრასაც. თითქოს თვით მღვრიე დოღრას ტალღებიც აპყლოდნენ „ლილეს“ ჰიმნს. კარგა ხანს გაგრძელდა სიმღერა. კარგა ხანს ვუვლებდით ყურს სულგანაბულნი. ბოლოს თანდათანობით შესუსტდა მომღერალთა ხმა. ხოლო, როცა უშბის მწვერვალს მზის უკანასკნელი სხივი მოსწყდა, სიმღერაც შეწყდა. ახლა კვლავ მდინარე დოღრას გუგუნის ჩაგვესმა. შეუპოვრად ეხეთქებოდნენ მისი მღვრიე ტალღები უზარმაზარ ლოდებს. ცოტა ხანს კიდევ ვიცდიდით სიმღერის განახლების მოლოდინში. თან გვინდოდა გაგვეგო, თუ რასთან დაკავშირებით მღეროდნენ მთიბავეები „ლილეს“ შდუგრას ძირას. სიმღერა არ განახლდა და მაშინ შინისკენ დავიძარი. ჩვენი ცნობისმოყვარეობა პირველმავე შემხვედრმა ახალგაზრდებმა დააკმაყოფილეს. მაზერელ კოლმეურნეებს

დღეს ჭალებში თიბვა მოუთავებიათ. ამასთან დაკავშირებით მათთვის დიასახლისებს ჯერი და ცოტა სასმელი მოუტანიათ. როცა ჩვენ დოლრას ნაპირას ჩავედით, მთიბავეები სადილს სიმღერით ამთავრებდნენ. თურმე „ლილეს“ ხშირად მღერიან აქ შრომის დროს. მზისა და თავისუფლების სადიდებელი ჰიმნი თავისუფალ ხალხს დღეს შრომის ჰიმნად გადაუქცევია.

უშვანარის მისადგომებთან კიდევ ერთხელ დაგვეწია „ლილეს“ ხმა. მივხვდით — მაზერელი კოლმეურნეები სიმღერით შედიოდნენ თავიანთ სოფელში.

შინმოსულებს მაკრინესთან თბილი და გემრიელი ეახშამი დაგვხვდა. ნავახშმევს მალე დავეწეკით, რადგან დილას ადრე უნდა ავმდგარიყავით და გზა განგვეგრძო ენგურის ნაპირების ჩასწვრივ.

თქმულება ჩიყვი


ჯერ კიდევ ქვემო სვანეთში ვიყავით, როცა ჩემი ამხანაგები ჩიყვით დაინტერესდნენ და სოფელს ახალგაზრდებს ამის შესახებ სიტყვა ჩამოუგდეს.

— ჩიყვი თურმე ძველად იყო გავრცელებული ჩვენში, — პასუხობდა მათ თხუთმეტ-თექვსმეტი წლის ყმაწვილი, — ზოგს ადამიანის თავისოდენა ჩიყვი ჰქონია.

ჩიყვიანობას მეც მოვესწარი, მაგრამ მე მხოლოდ ერთი ჩიყვიანი მახსოვს — მეზობელი სოფელი ლუკა. ძალიან დიდი ჩიყვი ჰქონდა და, როგორც კი ჩვენი სოფლის გზებზე გამოჩნდებოდა, მაშინვე ავედენებოდით ბავშვები და ვაბრაზებდით. უფროსები გვიჩაგრდებოდნენ, მაგრამ ჩვენ მაინც ჩვენსას არ ვიშლიდით. ლუკაც ადრე მოკვდა. ახლა მხოლოდ ზოგ წყაროს შერჩა „ჩიყვიან წყაროს“ სახელი. და, აი, ჩემზე ათი-თორმეტი წლით უმცროსი თანასოფელი ამ ამბავს ისე ჰყვება, როგორც ძველ თქმულებას.

ჩიყვის კერები ფართოდ იყო გავრცელებული მთელი დედამიწის ზურგზე, მაგრამ მათი სიხშირე განსაკუთრებით მთიან რაიონებში შეიმჩნეოდა. ასეთი რაიონები იყო: ჰიმალაი, ალპები, კარპატები, ამერიკის მთიანი მხარეები, ეთიოპია და სხვა. ძველად ჩიყვს ჩვენს მთებშიც მკვიდრად ჰქონდა ფეხი მოკიდებული.

ჩიყვს დიდი უბედურება მოსდევდა. იქ, სადაც დაავადებდა



ფიქვი ლაღზე ენგურის ხეობაში.

ხშირი იყო, ბევრი იბადებოდა ყრუ-მუნჯი და კრეტინი. ჩიყვის პრობლემა ერთ-ერთი მნიშვნელოვანი საზოგადოებრივი პრობლემა იყო ყველგან.

ძველი მკვლევარები ჩიყვის განვითარების ახსნის საკითხს ცალმხრივად უდგებოდნენ. ისინი გადამწყვეტ მნიშვნელობას ანიჭებდნენ ერთ რომელიმე ფაქტორს, რომელიც ჩიყვის განვითარებას უწყობს ხელს. ამიტომ ბუნებრივია, რომ ამ საკითხში თავიდანვე აზრთა სხვადასხვაობა არსებობდა. ჩიყვის გარშემო შეიქმნა რამდენიმე თეორია. ამ თეორიებს შორის საყურადღებოა: 1. იოდის უკმარობის თეორია, რომელიც ჩიყვის გამომწვევ მიზეზად თვლის ორგანიზმში იოდის სიმცირეს; 2. ე. წ. წყლის თეორია, რომელიც ჩიყვის განვითარებას მოსახლეობის სასმელი წყლის ქიმიურ შემადგენლობასთან აკავშირებს, და 3. ინფექციურ-ტოქსიკური თეორია, რომლის მიხედვითაც ჩიყვს წარმოშობს ინფექციური ბაქტერიები.

ძველად სვანეთში ჩიყვის განვითარების თითქმის ყველა შემთხვევითი პირობა არსებობდა. ჩანს, ერთ-ერთ მნიშვნელოვან ფაქტორს წარმოადგენდა სასმელი წყალი. ზოგიერთ წყაროს დღემდე შერჩენია „ჩიყვიანი წყაროს“ სახელი. სადაც ეს წყაროებია, ჩიყვიც მასიურად ყოფილა გავრცელებული მოსახლეობაში... იგი გავრცელებული ყოფილა ამა თუ იმ მდინარის აუზშიც. მაგალითად, ყველა მკვლევარი და მოგზაური. რომელიც კი სვანეთის ჩიყვს შეხებია. ერთხმად მიუთითებს მდინარე ხელედურას ხეობაზე. ამ ხეობაში მდებარე სოფლებიდან კი გამოირჩეოდა სოფელი ხელედი. მაგრამ თვით ხელედშიც არათანაბრად იყო გავრცელებული ჩიყვი. ის გაცილებით ძლიერ იყო მოღებულა ქვემო ხელედში, ვიდრე ზემოში. ხალხურ ზეპირსიტყვაობაში ამის შესახებ ნათქვამია:

„ზემო ხელედი — ყველა ბლუები,
ქვემო ხელედი — ყველა ჩიყვიანები“.

ან კიდევ:

„ზემო წანაში — ყველა ბანძეოები,
ქვემო წანაში — ყველა ჩიყვიანები“.

მსგავს მოვლენას ადგილი ჰქონია ჩოლურის თემშიც.

აქ ყველგან ერთი და იგივე კანონზომიერებაა. უოველთვის სოფლის ან თემის ქვემო ნაწილია მონათლული ჩიყვიანების ბუდედ. ჩანს, ზემო სოფლელები, ან სოფლის ზემო-ნაწილში მცხოვრებნი იყენებდნენ მდინარე წყალს და აბინძურებდნენ, ქვემოთ-ოები კი უკვე გაქუქყიანებული წყლით სარგებლობდნენ. ეს უწყობდა ხელს მათთან ჩიყვის ძლიერ განვითარებას.

სვანეთში ჩიყვის განვითარებას ხელს უწყობდა აგრეთვე ბოსტნეული კულტურების სიმცირეც. ბოსტნეული კულტურები ადამიანის ჯანმრთელობისათვის მრავალმხრივია სასარგებლო. თვით ჩიყვის განვითარებისათვის მნიშვნელობა უნდა ჰქონოდა შემდეგს: ეს მწვანე მასა, რომელსაც ადამიანი ბოსტნეული კულტურების სახით ღებულობს, შეიცავს ორგანიზმისათვის ადვილად მისაღებ იოდს. მეორეც, ბოსტნეული კულტურები შეიცავენ ორგანიზმისათვის აუცილებლად საჭირო ვიტამინებს. ვიტამინების ნაკლებობა კი ერთ-ერთი ხელშემწყობი ფაქტორია ჩიყვის განვითარებისათვის.

მართალია, ძველად სვანეთის მცხოვრებნი უხვად იყენებდნენ ბოსტნეული კულტურების შემცველ ველურ ბალახებსა და ხილს, მაგრამ ველურ ხილს არ შეეძლო ბოსტნეული კულტურების სრულფასოვანი შეცვლა.

უფრო სწორი იქნება, თუ მოკლედ ვიტყვი, რომ ძველ სვანეთში ჩიყვის განვითარების ყველაზე ძლიერი ფაქტორი იყო დუბჭირი ცხოვრება, სიღარიბე. მხოლოდ ცხოვრების პირობების გაუმჯობესებას შეეძლო მოესპო ჩიყვი და ეს ასეც მოხდა. საბჭოთა ხელისუფლების დამყარების შემდეგ სვანეთში ხალხის ცხოვრება მკვეთრად გაუმჯობესდა. გაყვანილი იქნა გზები, რამაც შესაძლებელი გახადა მოსახლეობისათვის საჭირო პროდუქტების მიწოდება, გაიხსნა საავადმყოფოები და საექიმო პუნქტები; ხალხი კულტურასა და განათლებას დაეწაფა. გაჩაღდა ჩიყვის წინააღმდეგ ბრძოლა.

სხვა მრავალთა შორის, რომელთაც თავისი წვლილი აქვთ შეტანილი ჩიყვთან ბრძოლის საქმეში, განსაკუთრებული პატივისცემით უნდა აღინიშნოს აწ განსვენებული ექიმის, შესანიშნავი ალბინისტის, მოქალაქის და ადამიანის დოცენტ იოსებ ასლანიშვილის სახელი. ის იყო ბრწყინვალე მკვლევარი ჩიყვის გავრცელების მიზეზებისა საერთოდ და კერძოდ სვანეთში. ის მუდამ ახლოს

იდგა ხალხთან და ეხმარებოდა შათ. ამიტომაც, რომ იოსებ ასლანი-
შვილის ხსოვნას წმინდად ინახავს ცხენისწყლისა და ენგურის ხეო-
ბებში მცხოვრები ხალხი. სხვათა შორის, სოფელ უშხევანარში მაკ-
რინე ქურდიანთანაც მეცნაურა კედელზე დაკიდებული, ჩარჩოში
ჩასმული სურათი.

— ეს ვინ არის? — თითით ვანიშნე პორტრეტზე მაკრინეს.

— ო, ეს კარგი კაცის სურათია, ჩვენი სოსო ასლანიშვილია.
არ იცნობთ?

მაკრინე ადგა, კედელთან მივიდა და მანდილის ყურით პორტ-
რეტზე გადაფარებული მინა გაწმინდა. მის მოქმედებაში ცხადად
დავინახე ის დიდი სიყვარული, რომლითაც აქაურ ხალხში სარგებ-
ლობდა იოსებ ასლანიშვილი.

გაქრა ჩიყვი სვანეთში, ახალმა ცხოვრებამ დაამარცხა საუკუ-
ნეების განმავლობაში ფესვმტკიცედ გამჭდარი სენი. დღეს მასზე
მხოლოდ თქმულება დარჩა, რომელსაც მოკლედ და უდარდელად
მოუყვა ჩემს ამხანაგებს სასაშელი თმაქოჩორა ბიჭი.

შუადღის მზე დასცქერის ენგურის ღრმა და ვიწრო ხეობას.
ხმაურით მოჰქრია მდინარის მღვრიე ტალღები. შეუპოვრად ებრძ-
ვიან ისინი ორპირად ამართულ კლდეებს და ცდილობენ კალაპოტის
გაფართოებას. ამ ადგილას გალიაში დამწყვედულ ძლიერ ნადირს
ჰგავს ენგურ-მდინარე. ფანტასტიკური ურჩხულივით მიიგრაგნება
კლდოვანი კალაპოტის ხვეულებში. მდინარის ორივე მხარეზე ციცა-
ბოდ ამართული მაღალი ფერდობები ტყითაა შემოსილი. ჯერ ფოთ-
ლოვანი ტყე, შემდეგ წიწვოვანი და შემდეგ ისევ ფოთლოვანი. სულ
ზევით კი ალპური ხალიჩები ან შიშველი კლდეებია, რომელთაც მდი-
ნარის ნაპირიდან თვალი ძლივს სწვდება. თოვლიანი მწვერვალები
კი უკვე არსად ჩანს. დილიდან თანდათანობით ვშორდებოდით მათ
და, აი, უკვე მთლიანად ამოეფარნენ თვალს. ყველაზე ამღვლელებელი
მაინც უშხასთან გამომშვიდობება იყო. ბეჩოდან ალიონზე წამოსუ-
ლები ეცერს გამოვცდით თუ არა, უკან მივისედეთ და ერთხელ
კიდევ გავოცდით ბუმბერაზი უშხის შესახედობით. მას ამაყი თავი
ამჭერად სრულიად უღრუბლო სივრცეში აღემატა. წელს ზევით

მზის სხივები ეთამაშებოდნენ, ხოლო წელს ქვევით ჩრდილი ნაბადივით ეხვია. ამ ადგილიდან უშბა ენგურის ხეობის უძლეველ გუშაგს ჰგავს. წარსულში ალბათ მომხდურ მტერს შიშის ზარს სცემდა მრისხანე იერით. დღეს კი მოგზაურობის მოყვარულთა გაოცებას იწვევს.


უკან დაეტოვეთ გოლიათი მთები, მაგრამ ენგურის ხეობაშიც გოლიათურ იერს ატარებს ყველაფერი. ტყეში — წიფელი, ნაძვი და სოჭი, მდინარის პირას — უზარმაზარი ტინები, ხოლო თვით კალაპოტში — ვეება ლოდები. ადგილობრივი მოსახლეობა დევის ქვეებს უწოდებს მათ. ძველი დროიდან აქვთ ამ ლოდებს შერქმეული ეს სახელი. ძველი რწმენით ბოროტი დევები უზარმაზარი ძალისანი იყვნენ. ისინი ცდილობდნენ დაუდგარი მდინარის დაგუბებას და ხალხის მოზრჩობას. ამიტომ კლდიდან დიდ ლოდებს გლეჯდნენ და მდინარეში ყრიდნენ, მაგრამ ამაოდ. გოლიათური ძალისა იყო ენგურ-მდინარეც. თავისი ტალღებით ეჭახებოდა ლოდებს და მათ აქეთ-იქით ყრიდა. აი, ერთი ასეთი ლოდი ჩვენს თვალწინაა. ის შედარებით ღრმად გდია მდინარეში და ენგურის მომცრო ტოტი ჰყოფს ჩვენგან. საერთოდ, ჩვეულებრივი ლოდია, მაგრამ ზედ ფიქვი ამოსულა. სწორედ ამით მიიქცია ჩვენი ყურადღება და მის პირდაპირ შევდექით. ეს როგორ?! ლოდზე ფიქვს ფესვი გაუდგამს! მოზრდილი ხე ტინის ნაგლეჯზე, სადაც ნიადაგის ნატამალი არ ჩანს. ან რა გააჩერებს ნიადაგს! ადიდებისას. ენგურის ტალღები უსათუოდ თავზე გადავლეებიან ლოდს. ერთხელ კიდეე ახმაურდნენ ჩვენი ფოტოაპარატები. ბუნების ერთი მომხიბვლელი სურათი კიდეე აღვებეჭდეთ ფოტოფირზე.

— სჯობს აქ დავეუცადოთ ავტომანქანას, — გვეუბნება ხელმძღვანელი, — აქ იყოს ჩვენი ტურისტული ლაშქრობის დასასრული, აქ, ენგურის შუაში დაწოლილ უზარმაზარ ლოდზე ამოსულ ფიქვთან.

უხმოდ ვეთანხმებით. მდინარის ნაპირას დაყრილ ქვეებზე ვსხდებით და ავტომობილის მოლოდინში ყველა მოგონებებს ვეძლევიტ. მოსაგონარი კი ალბათ ყველას ერთი და იგივე გვაქვს, რაც იმ მოგზაურობის დროს ვნახეთ და განვიცადეთ. მდინარესთან ყველაზე ახლოს მე ვიყავი და ლოდზე ამოსულ ფიქვს გაყურებდი. თვალწინ მორიგეობით ჩაირბინეს იმ სურათებმა, რომლებმაც მოგზაუ-

რობაში დამაინტერესეს. მე ვხედავდი წარსულის მავნე ტრადიციების ნაშთებთან დაჭიდებულ ვაჟკაც თემრაზს, გამარჯვებით კმაყოფილსა და დოინჯშემოყრილს; ვხედავდი უშგულელ ახალგაზრდა ზურაბს, თავაზიანსა და დინჯს; ვხედავდი კალელ მექორწილებს და ლასდილის ზეკართ გადმოსულ ავტომანქანაში მოცეკვავე ქალ-ვაჟს, ვხედავდი დარბაისელ უშგულელ კოლმეურნეებს, მათ ახალ სახლებსა და ძველ კოშკებს. ვხედავდი შუბისწვერად ამართულ გორაზე აშენებულ კვირიკეს ძველთაძველ ეკლესიას, უღვირის მთაზე ცისფერ ტბას, მულახის თემის ლამაზ სოფლებს, მესტიის რაიონულ ცენტრს — მოასფალტებული ქუჩებით, ახალი სახლებით და მდიდარი ეთნოგრაფიული მუზეუმით. ვხედავდი მაკრინე ქურდიანს, ალპინისტების მეგობარს და ალპინიზმის ენთუზიასტს, მის ეზოს სოფელ უშხვანარში — უშბის და მაზერის ძირას. ვხედავდი საქვეყნოდ სახელმოჩენეჟილ ალპინისტს ბექრუ ხერგიანს, დიჯსა და ჩაფიქრებულს; ვხედავდი სვანეთის ულამაზეს მთებს — შემოსილთ მარადი მყინვარებით; ამ მთათა ტყით შემოსილ ფერდებს, მათ ტანზე ჩამომდინარ მდინარეებს, ჩანჩქერებსა და ჩქერალებს. ვხედავდი მომავლის მგზავრს, რომელიც ჩვენს კვალზე ივლის და ჩვენზე მეტ საინტერესოს და სასიხარულოს ნახავს; ვხედავდი ყოველ ამას და გული სიამაყით მევესებოდა, რომ მუხლმა გამიძლო, გულმა არ მიმტყუნა.

ტკბილი ფიქრები ავტომობილის გუგუნმა დაგვიფრთხო. შოფერს დავენახეთ და მანქანა ჩვენს პირდაპირ ვაეჩერებინა. მანქანაზე მოვთავსდით. ერთხელ კიდევ გავხედე აღმა ენგურის ხეობას. ლოდზე ფესვგადგმულ ფიქვს ნიავე არხევდა და თითქოს თავის რხევით გზა მშვიდობისას გვისურვებდა. კიდევ რამდენიმე წუთი და ჩვენი მანქანა ლალად მიჰქროდა ენგურის ნაპირების ჩასწვრივ. ხეობა თანდათან ფართოვდებოდა.



სარჩივი

შორეული მთების სურნელი	5
სამი ციხე და ხალხის ისტორია	9
ვენახიანი სვანეთი	12
ძველისა და ახლის კიდილი	19
ცხენისწყლის სათავეებისაკენ	29
ლასდილის ხეკარზე	42
ურგული	59
ენგურის ნაპირების გასწვრივ	72
„გაურ გაგხე“— ხალდელთა ლაშქრული	76
ოქრომჭედლობის დიდოსტატები	84
უშბა	91
დალი და ბეთქილი	92
მეგზურობიდან ოსტატობისაკენ	99
მომავლის ლეგენდა	102
უშბის გმირი	106
მხისა და თავისუფლების სადიდებელი ჰიმნი	110
თქმულება ჩიყვზე	116